



5. 6. 90

5E. 6.

VIDA

A7









MARCI HIERONYMI  
V I D Æ  
CREMONENSIS

CANONICI REGULARIS LATERANENSIS

ALBÆ EPISCOPI  
ORATIONES TRES  
PRO CREMONENSIBUS

Quæ in Cominiana editione desiderantur.

EDITIO ACCURATISSIMA.



VENETIIS, MDCCLXIV.

~~~~~  
TYPIS NOVELLIANIS.  
SUPERIORUM FACULTATE, AC PRIVILEGIO.







## LECTORI BENEVOLO

T Y P O G R A P H U S .



Uas Marci Hieronymi VIDÆ  
 Patritii Cremonensis, olim Ca-  
 nonici Regularis Lateranen-  
 sis, Albæ demum Episcopi  
 perelegantes Orationes tres,  
 injuria temporum sibi propemodum ereptas  
 hactenus doluerunt latinæ eloquentiæ ama-  
 tores ingenui, has ab exemplaribus admo-  
 dum raris, alterum quod Cremonæ anno  
 eodem 1550, quo ex Civitatis suæ depu-  
 tatione coram amplissimo Mediolanensis Se-  
 natus Ordine Marcus ipse Hieronymus

A 2

Vi-

4  
 VIDA octuagenarius Vir de Religione , de  
 Patria , de Litteris optime meritus , mense  
 Quintili recitavit ; alterum quod Parisiis  
 anno 1562. prodit fideliter sumptas , at-  
 que prælis meis nunc accuratissime cufas  
 accipe , benigne Lector , totique Litterariæ  
 reipublicæ de tam pretiosa sibi aucta sup-  
 plectili gratulare . (\*)



NOI

---

(\*) Quo ad ea , que hoc nostro sæculo fuerunt in Vidam  
 a Iusto Vicecomite , & a Carolo Antonio Tantio typis  
 divulgata , videatur anonyma Epistola veri Amici ad ipsum  
 Carolum Antonium Tantium italico idiomate scripta , &  
 a Iosepho Mazzucchellio successore Mulatesta Mediolani im-  
 pressa anno 1760. , cui Epistole , iudicio a delectis Censoribus  
 factæ , Auctoris nomen subinde per pagella mantissam præfixum  
 fuit sub hoc titulo Difesa del P. D. Paolo Onofrio  
 Branda , e di Monf. Marco Girolamo Vida , composta  
 dal P. D. Giulio Maria Grandi Ch. Reg. di S. Paolo .

# NOI RIFORMATORI<sup>5</sup>

Dello Studio di Padova.

**A** Vendo veduto per la Fede di Revisione, ed Approvazione del P. F. *Filippo Rosa Lanzi* Inquisitor Generale del Santo Offizio di Venezia nel Libro intitolato: *Marci Hieronymi Vida Cremonensis Canonici &c. Orationes tres*, non v'esser cosa alcuna contro la Santa Fede Cattolica, e parimente per Attestato del Segretario Nostro, niente contro Principi, e buoni costumi concediamo Licenza a *Gio: Battista Novelli* Stampator di Venezia, che possi essere stampato, osservando gli ordini in materia di Stampe, e presentando le solite Copie alle Pubbliche Librerie di Venezia, e di Padova.

Dat. li 6. Aprile 1764.

( Sebastian Zustinian Ref.

( Alvise Vallareffo Ref.

( Francesco Morosini 2. Cav. Proc. Ref.

Registrato in Libro a Carte 201. al num. 1154.

*Davidde Marchesini Segretario.*

Adi 8. Aprile 1764.

Registrato nel Magistrato Eccellentiss. degli Esecutori contro la Bestemmia.

*Francesco Gadaldini Segretario.*

A 3

DE-

# D E P U T A T I O

## C I V I T A T I S C R E M O N Æ

Ex Libro *Provisionum* anni 1549. fol. 65.  
qui in Archivo Cremonensi asservatur.

*In Congregatione diei Martis, 21. Maii 1549.  
habita per Nobiles DD. Deputatos Regimini Ci-  
vitatatis Cremonæ, inter alia, sic fuit ordinatum.*

**D**Emum exposuit Dominus Bartholomeus Oxius, qualiter in lite, seu controversia occasione præcedentiæ vertente inter Cremonenses & Papienses, per quamplures literatos hujus Civitatis factæ fuerunt diversæ Scripturæ, & allegata jura in honorem, & gloriam hujus Civitatis contra dictos Papienses, quæ collectæ fuerunt, ut trasmittantur ad Reverendiss. Episcopum Albensem, cum quo de hoc factum fuit verbum nomine istius Magnif. Communitatis, ut ea reducat in Orationem elegantem in defensionem Patriæ. Qui obtulit libentissime laborare pro Patria, in nulloque deficere juxta vires ingenii sui; quæ Oratio, postquam facta fuerit, impressioni danda, ut cunctis innotescat, & super hoc dandas esse literas præfato Reverendiss. Episcopo cum ipsis Scripturis,

Ideo præfati Magnifici DD. Deputati ordinaverunt, & ordinant dictas omnes Scripturas transmittendas esse præfato Reverendissimo Episcopo Albensi cum literis Magnificæ Communitatis, ejus Reverend.

ren.



7  
rendissimam Dominationem rogando, ut dignetur,  
& velit facere, & componere, seu illas reducere  
in aliquam Orationem elegantem addendo, &  
diminuendo, murando, & corrigendo prout sibi  
melius videbitur, & placuerit pro gloria, & ho-  
nore hujus Civitatis, & postquam illam Oratio-  
nem composuerit, ordinauerunt ut supra, quod  
imprimi debeat ad eternam rei memoriam, & ut  
omnibus clarius jura, honos, & gloria Civium Cre-  
monensium elucescant, & cognoscantur, partico-  
posito, & obtento per omnes &c.

*Epistola Civitatis Cremonæ ad Episcopum  
Albensẽ Marcum Hieron. Vidam.*

0000000000000000

REVERENDISSIMO MONSIGNORE.

**P**Er la controversia tra la Città nostra, e Pavia della precedentia, sapendo quanto la S. V. Reverendissima ha a petto l'onore della Comune Patria, mandiamo con questa nostra, per Messo a posta, diverse Scritture, & primamente le ragioni dedotte in nome nostro nanti l'Eccellentiss. Senato di Milano, poi le ragioni de' Pavesei, finalmente diverse cose raccolte per alcuni in favor nostro; onde preghiamo sommamente V. S. Reverendiss. che si voglia degnare di veder il tutto, e ridurlo, come gli parerà, in una

A 4

etc.

elegante Orazione in difesa dell'onore della Patria, la quale poi intendiamo far imprimere, & esibirne copia a ciascuno di quel Senato, il quale pare, che voglia decidere questa Causa quanto più presto; nè vorremmo mancare dal canto nostro all'onor pubblico; & la maggior confidenza abbiamo in V. R. Signoria, che in ciò esponderà tutte le forze, & ingegno suo, & oltre gli altri obblighi, la Patria principalmente avrà questo a V. R. S., alla quale bacciamo con debita riverenza la mano.

Da Cremona, alli 30. Maggio 1549.

*Obbligatissimi Servitori*  
Li Presidenti  
Al Governo di Cremona.

MARCI HIERONYMI VIDÆ  
ORATIONES TRES  
PRO CREMONENSIBUS  
IN CONTENTIONE PRINCIPATUS  
CUM PAPIENSIBUS  
*H A B I T Æ*

Coram Excellentiss. Mediolanensi Senatu  
Anno 1550. Mense Quintili.

THE  
LIBRARY OF THE  
MUSEUM OF  
ART AND HISTORY  
OF THE  
CITY OF  
NEW YORK  
1000 5th Ave.  
New York 10028  
1900

JACOBI ANTONII BEVILAQUÆ  
EPISTOLA  
AD JO: FRANCISCUM AFFAITATUM

Præfixa editioni Parisiensi anni 1562.

JOANNI FRANCISCO AFFAITATO  
CO: PATRONO SUO

JACOBUS ANTONIUS BEVILAQUA  
S. D.



*Mor, quo Patriam meam semper  
prosecutus sum, is fuit,  
ut quamvis ab illa decem an-  
nos abfuerim, illius tamen  
nunquam immemor extiterim,  
quæ mihi quoque in memoriam redegit tem-  
pus illud, quo JO. CAROLUM AFFAI-  
TATUM patrem tuum nobilissimum, ac  
optimum virum, quo parente tu maxime  
dignus es, & amare, & colere cæpi. Nec  
minori observantia te amplexus sum; id  
quod, & libenter testatus fuisset re ipsa;  
quan-*

quando aliqua occasio mihi sese obtulisset, quæ cum mihi expectatione tardior daretur non parum animo angebar. Nam cum utrisque deberem, nec me hoc tanto ære alieno liberarem, indignus videbar, qui talem, tantumque patrem observaverim, bonitatisque paternæ heredem filium colerem hac tam nobilis, antiquæve familiæ amicitia. Sed ecce cum hac mecum cogitarem, ad Impressores Lutetiæ Parisiorum (illic enim commorabar) me consero, animi causa oblectandi. Dum illic multa lectu dignissima imprimerentur, & inter hæc Cremonensium hæ ACTIONES denuo luci dabantur. Quo dulcissimo nomine commotus, cum quia videbam ab omnibus doctis, qui tum illic aderant, summe laudari, tum quia Patriæ, nomen insculptum, & impressum erat, duxi illas edendas alicujus maximi viri patrocinio, & auspicio. Tu mihi preesto adfuisisti, qui & hoc munere dignus, & Regis nostri Regum maximi, & optimi gratia decoratus, nominis tui splendore munus hoc amplificare potes. Huc accedit, quod scimus, & quanti apud Venetos illos Christianæ fidei optimos, & custost-

stodes, & patronos sis, quorum authoritas nostrum hoc munus admodum decorabit; qui cognitis animi tui præclarissimis dotibus, in novam societatem, quam **CALCIAM** appellant, ascriverunt. Nec immerito; Sciunt enim quantum splendoris huic societati nomine tuo sis additurus. In quam cum primum acceptus, & illa præclara magnanimitatis tue signa, & munera reliquisti, quæ Te, Patriamque nostram admirabilem in omnia secula reddiderunt. Nec hic testabor quantopere te omnes laudent, ac admirentur, jam divulgato tantæ liberalitatis tuæ nomine. Quod cum homines audiunt, **PATER** ille tuus munificus & liberalis succurrit, qui olim Italorum frigore, fameque contabescentium multa milia a **MESSII** expugnatione abeuntium aluit sua impensa, singulisque multos denarios dedit, qui loco viatici essent in Patriam redeuntibus. Qua sola liberalitate (taceo alias innumerabiles illius Viri vires) se magnanimum, ac generosum Cremonensem præstitit, immortalemque famam comparavit. Quid enim hoc Nomine Cremonensi, ac domo **AFFAITATA** dignius di-

*dici potest? Ne te verborum longa serie  
diutius retineam, Librum hunc Tibi conse-  
crabo, meque dedam, te etiam, atque etiam  
orans, ne ab eorum numero me segres,  
qui te, & amant, & observant. Vale.*

*Parisiis, Kalen. Augusti, MDLXII.*

CRE-





## CREMONENSIIUM

## ACTIO PRIMA.

*Adversus Papienses in Controversia  
Principatus.*



Ubi quæso gentium sumus? quo me  
vertam, Patres? Hic locus mihi  
alias animo semper gratus, aspe-  
ctuque jucundus nunc oculos meos  
valde offendit, qui quocumque in-  
ciderint, vident omnes homines  
in risum effusos. quæ novi hujus judicii nova  
forma? Videor hic mihi onus Ætna gravius su-  
stinere, meque pertædet huc unquam pedem in-  
tulisse, ubi omnibus derisui esse conspicio tam  
nos, qui nihil commeruimus, quam adversarios  
nostros, qui soli sunt in culpa; tam in nos, quam  
in eos conversi utrosque oculis notant, rident  
mediusfidius vel ipsi hujus Curie parietes, neque  
me mea fefellit opinio, initio cum hanc caus-  
sam mihi a meis Civibus delatam susceperem.  
Sciebam equidem hanc vicinis Civitatibus allatu-  
ram nostri irridendi facultatem. Sciunt ipsi quam  
in-

invitus, ægreque suæ, ac totius civitatis voluntati acquieverim, non quod homo Cremonensis defugerem Papiensium congressum, & certamen vocantium in quæstionem, & controversiam rem, quæ nullam habet dubitationem, & contentione non magnopere dignam, Cremonensium ne Civitas an Papiensium sit præstantior, cum maxime adversarios facile vinci posse non ignorarem: verum me multum, Patres, ab hac actione retrahebat, ne gravitatem civitatis nostræ, quæ semper frugi habita est, conferrem cum levitate eorum, qui ex Papiensibus has turbas tam alieno tempore commorunt; neve necessariam defensionem nostram opponerem eorum inani, ac supervacuæ provocationi, meque, ac civitatem meam sociorum, ac totius vicinitalis irrisui exponerem; cum primo aspectu, & specie ipsa hæ contentiones inanes videantur, & esse hominum otio nimis abundantium, cum non de potentatu, sed de principatu tantum agatur; quod aliqui ex iis, qui habiti sunt sapientes, inventi sint, qui universum terrarum orbem haberent pro domicilio, communique omnium gentium municipio. Non possum negare, Judices, rem magis gravem, vestrisque auribus, & hoc loco magis dignam in quæstionem venire potuisse, fateorque hic non agi de fortunis totius Europæ, neque de Italiæ, aut utriusque Civitatis libertate, ac salute, de liberis, de focis, laribus, atque aris, neque in discrimen venire, utra Civitas alteri præscribat, imperetve; concedoque hanc disceptationem facile potuisse, aut potius debuisse omitti; non quod nesciam ejusmodi

con-





contentiones non modo inter præclara municipia, sed etiam inter maximas provincias, regna etiam quandoque amplissima extitisse, easque præstantissimis Imperatoribus disceptatoribus dijudicatas fuisse, & suum cuique locum, gradum, ac dignitatem attributam, prælatasque semper fuisse eas Civitates, gentes, ac nationes, quæ aliis dignitate præstarent, cum certamen honoris plerumque a virtute profisciscatur. Sit sane vero res ut libet, sitque quæstio plane de nugis, ut risus vester, ac totius curiæ mihi declarare videtur. Soli tamen irridendi, accusandique sunt adversarii, omnisque in eis culpa residet, qui negotii credo inopia, primi, inepte sane, tam alienis temporibus huic controversiæ initium fecere, qui, inquam, hoc tempore nos de honoris, ac dignitatis possessione antiquissima, in qua semper fuimus, neque vi quidem, neque clam, neque precario, ambitiose dejicere adorti sunt, nec verentur Civitati nostræ præclarissimæ Romanorum coloniæ suam qualemcumque conferre, & etiam, si diis placet, præferre, Papiam dico, ne forte, si qui adsunt exteri, & peregrini, putent me de aliqua amplissima, atque opulentissima urbe loqui, cui isti exæquari contendant Cremonam oportere, plenam dignitatis Civitatem, talemque, qualem vos ipsi optime nostis. Quæ tandem igitur ambitio, aut levitas populi Cremonensis videri debet, quem necessitas in hanc actionem detrusit? cogimur adversus eos, qui nostram dignitatem, atque estimationem insolentia labefactare, atque in discrimen adducere conantur, nos tueri, enitique, ut

B

quem

quem nobis statum, ac dignitatis locum majores nostri præstantissimi viri velut optimam hæreditatem diu collectam reliquerunt, nos summis opibus, atque omnibus studiis fortiter dimicando retineamus, neque oscitantes silentio patiamur nos de possessione honoris, qui semper est habitus nostræ Civitati, ab istis deripi, atque avelli. Nullos hominum usquam gentium esse puto, tam despicientia rerum humanarum insignes, ac singulares, qui honorem suum, ac dignitatem cum tueri possint, contemnant. Si qui vero hic sunt, qui, nobis provocatis, laceffitisque sæpius, censeant satius fuisse ab inanibus istis contentionibus abstinere, agunt hi quidem nobiscum severe nimium, nimis graviter, nimis prisce: ad hunc gradum philosophiæ, fateor, populus Cremonensis nondum pervenit. Sed merito tota Civitas erexit se penitus in defendenda retinendaque dignitate sua consentiens, certa non pati ullo unquam tempore se a Papiensibus anteiri, neque tantum unquam dedecus Cremonensi nomini imprimi, atque inuri, neque huic causæ, aut tempori indormire, &, quemadmodum olim Scytharum genti non multo post orbem conditum adversus Aegyptios provocantes, dum utraque natio de antiquitate generis decertaret, causam dicere licuit, itidem sibi apud nos æquum fore se defendere arbitratur, quod olim duæ principes Græciæ civitates, Spartæ, atque Athenæ inter se dimicantes, & aliæ quamplurimæ fecerunt tanta contentione, ac si in eo posita fuissent omnes utrarumque fortunæ. Verum hic vos ipsi, Patres, præclare Civitatem

no.

nostram omni ambitionis, ac levitatis suspitione liberare potestis apud hos, qui nos audiunt, & culpam hanc omnem in adversarios transferre. Nemo vestrum, qui in Consilio adessis, non meminit, quomodo ab initio se habeat res, hujusque disceptationis, & causæ vos ipsos nobis esse auctores, vos ipsi, inquam, [scitis enim] Cremo- nenses non modo invitastis auctoritate vestra, ut ad levissima Papiensium postulata responderent, verum etiam Senatusconsulto vestro, literisque Cæsaris nomine conscriptis ad hujus causæ de- fensionem impulistis; vos ipsi hanc quæstionem constituistis; hujus consilii te maxime auctorem fuisse serunt, Jacobo Philippe Sacce, qui huic Col- legio præses, & judicio præsides, & a te, ut sa- pienter cætera, id sapientissime factum credimus, ut tanta controversia, quæ nullo pacto sopiri po- tuit, judicio extingueretur, quod propter eos, qui frequentia sua ornant confessum vestrum, di- ctum volo; nos non tam libenter, quam necessa- rio in hoc certamen descendimus. At vero, ut nos a culpa omnino esse sejunctos non tantum verbis, ac testibus evincamus, verum etiam re ipsa hac luce clarius ostendamus, cives mei re- ctis sensibus euntes mihi mandarunt, re, causa- que integra, ut æquissimam conditionem Papien- sibus proponerem, quam si sequantur, non recu- samus, quo minus secundum eos lis detur. An- tiquissima sententia est, Patres, non esse æquum aliquem in contentionem honoris, ac dignitatis venire cum eo, a quo officiis superari æquissimo animo patitur. Si Papienses volunt nobis ada-  
qua-

quari in pendendis vestigalibus, tantumque, quantum Cremonenses Cæsari, ac Reipub. penitare, nec recusant nobis pares esse in extraordinariis oneribus subeundis, cum duris, formidolosisque temporibus ex privatorum pecuniis ærarii angustiis est subveniendum, pecuniæque omnibus provinciæ municipiis, ac coloniis æquabiliter pro cuiusque censu, ac fortunis imperantur, non ultra pugnamus, nec recusamus eis honore, ac dignitate exquiri: hanc conditionem æquissimam si accipiunt, causa dicta est, magis re, quam Oratione defensa, nec ulterius progrediemur. Quid hæretis, Papienses? agite, conficite rem sine controversia. Quid dissimulatis? Quid tergiversamini? Quid vos horsum illorsum torquetis? ex æquo, & bono hoc totum iudicium transigi potest, id effici-te, & me totum ad vos traducetis, uno verbo facile potestis & nos, & vosmetipsos otiosos reddere, atque occupatissimos Iudices hac molestia liberare; videte quam facili cum adversario pugnetis. Accipitis ne conditionem? eja vero accersite, adducite fidejussores, prædes date, aut sponsores, qui nomina faciant; stipulemur, restipulemurque; conscribantur conventa publicis literis, concipiantur verba Decreti ab hoc Sanctissimo Senatu. Alterum è duobus honeste non potestis recusare, aut nos officio anteite, aut impares dignitate nobis cedite; nihil certe tertium esse posse nemo non videt. Quod quidem animadvertit olim vir acutissimus Franc. Taberna rerum extraordinariarum totius provinciæ disceptator, qui tibi, Gonzaga Ferdinande præclarissime, in ad-  
ventu



ventu Philippi Hispanorum Regis, hac ipsa de  
caussa turbantibus omnia Papiensibus, ac prope  
tumultuantibus percunctanti, utrinam anteponendi  
essent, nulla interposita ad cogitandum mora, ut  
vir in jure Civili valde exercitatus, statim res-  
pondisse dicitur, eam Civitatem omnino præfe-  
rendam, quæ magis censa esset, quæve grandio-  
rem pecuniam in ærarium referret, tum ex vesti-  
galibus, qui nervi sunt imperii, tum ex pensi-  
tatione extraordinaria, cum *ἐπιμετρία* provinciæ  
imponuntur. In manu vestra est, Papienses, si vos  
tanta ambitio stimulat, adeoque honoris speciosa  
imagine ducimini, voti compotes fieri; eja agite  
parvo negotio principem locum arripite; invadite  
nobis ultro concedentibus in dignitatis nostræ pos-  
sessionem; caussa nostra, ut libet, hac conditio-  
ne estote reges, vel saltem, quod sæpe jactare  
soletis, tetrarchæ, atque dynastæ; per nos etiam  
Mediolanensium Civitati, a quò vestra temeritas  
parum abest, vestram urbem regiam anteferte;  
quid ambigitis? quid cunctamini? quid agitis?  
quid sit? amitteris ne socordia vestra talem, ac  
tantam negotii benegerendi occasionem? huic ne  
tempori tam commodo, atque opportuno indor-  
mietis? expergiscimini tandem, hic viri estote;  
cavete ne vos ulterius progredientes eo temere de-  
mittatis, unde postea non liceat regredi; cogita-  
te, atque impensius consulite, an hæ contentio-  
nes sint vobis ex usu; ita res potius inter nos  
transigatur, quam demus sermonem, & risum vi-  
cinitati; hic terminus esto nostrarum contentio-  
num. Ut video, Judices, erubescunt adversarii,

reformidantque oblatum ultro a nobis honorem, quem modo nobis invitis præripere tantopere con-  
nitebantur. Intellego, natura sæpe fit, ut quæ  
optamus, cum nobis negantur, ea ardentius cu-  
piamus; cum vero eadem obvia sunt, atque ob-  
lata, tanquam vilia, ac vulgo patentia despiciamus  
quadam quasi satietate, ac fastidio affecti.  
Jam illos piget ambitionis, ac temeritatis; jam  
moniti agnoscunt, quam temerarie concupierint  
id, quod si affectuti fuissent, esset potius sibi one-  
ri, quam honori; eos tandem pœnitet erroris,  
suamque amentiam, si minus verbis, saltem re  
ipsa deprecantur.

Videtis eos, quæ negata totis sensibus concu-  
pierant, eadem facta eis adipiscendi potestate, ac  
copia respuere, atque concessa averfari, aut adeo  
perturbati sunt, ut utrum præstet non videant.  
Atqui ex eorum vultu, nutuque, & significatione  
videor mihi intelligere, Papienses causam omnem,  
quominus propositam sibi conditionem sequantur,  
conferre velle in fortunæ, & temporum iniquita-  
tem, & uti inopiæ, & egestatis excusatione; nec  
cogitant homines parum considerati, esse portenti  
simillimum, ubi cum inopia conjuncta est arrogan-  
tia, superbiaque invenitur egestati implicata. Ca-  
puam Romani sapientissimi viri ferre non pote-  
rant, non tam ob nimias, & formidolosas ejus  
opes, quam ob Capuanorum arrogantiam, qui li-  
cet alterius civitatis legibus parerent, ei tamen  
se magistratuum speciosis nominibus adæquare  
nitebantur, & id propter veteres Capuam su-  
perbiæ domicilium dixerunt. Quod quidem in

Capuanis magis ferendum erat, quod ea Civitas tunc adeo opulenta, adeoque varia copia rerum referta erat, ut altera Roma haberi posset: cum vero sint opes vestrae tenues admodum, atque infirmæ, ut vos metipsi pro causa vestra adducere videmini, quæ est ista arrogantia, & superbia petere vos anteferri illis civitatibus, quibus neque censa, neque dignitate, aut rerum gestarum gloria, ut postea ostendemus, vos adæquare potestis, quæ pro hujus imperii dignitate, ac gloria paratam semper pecuniam habent, quam ærario sumministrant, Cæsarique in summa difficultate nummaria largius subveniant? Credite mihi, opus est quaesito in primis iis, qui ambitiose volunt videri lauti, atque aliis honoris specie, & simularo splendore præferri student; contemnitur inopia, calcatur egestas, sed hunc locum postea suo tempore fortius urgebimus. Decidi, Patres, a maxima spe, in quam jampridem adductus eram, pacis, & compositionis, libenterque hoc subdiosum munus, aut potius onus, quod necessario susceperam, ita transacta re, honestissima declinatione a me abjecissem, sed ut video, longe me fecellit opinio, omnis spes oculi a me elapsa est, nihil hercle actum est, adversariis conditionem a nostris latam recusantibus, mihi que videor de spe dejectus quasi decurso spatio a calce ad carceres denuo revocari; exclusus igitur a portu, & profugio, fungar officio meo, ut potero. Verum antequam ad Causam ingrediar, non possum non iterum præfari, quam inviti, quam nolentes, quam ægre nostri Cives in hanc palæstram de-

scenderint, quantavis adversariorum intemperantia provocati, vestraque, ut dixi, auctoritate confirmati, & Cæsaris ipsius imperio adacti atque compulsi, quod quidem magis dolenter, quam inimice citra omnem simultatem faciunt, vix dici posset, quam in amicitiiis retinendis, conservandisque firmi, constantesque nostri semper fuerint, neque ad eas dirimendas omni vento impellantur. Vetus inter Cremonenses, & Papienses intercedit usus, fuitque olim utraque Civitas plurimis, maximisque beneficiis ultro, citroque datis, & acceptis, ut inter sociorum populos decet, conjunctissima, atque usque ad hoc tempus inter nos consuetudines, amicitiasque jungebamus ad prisæ probitatis rationem, & ut beneficia in eos nostra testata declarant, eorum calamitates nunquam duximus a nobis alienas. Omnibus vero officiis amicitiae a nobis diligenter, sancteque servatis, cum potius beneficiis, quam injuriis, eis certandum esset, illi nulla nostra culpa nobiscum inimicitias suscipiunt, dirimuntque veterem nostram conjunctionem tot annorum consuetudine confirmatam, ac prope consecratam, nescio qua re inducti, nisi quorundam hominum illius municipii certandi cupidorum levitate, atque audacia; non enim ad omnes hæc culpa pertinet, nihilque harum rerum factum est publico Civitatis consilio, quinimmo qui apud eos sunt sanæ mentis, moleste ferunt ista ab audacissimis perniciosissimisque civibus suis moveri. Cives mei nihilominus moderati, & alta quadam mente præditi nolunt omnino quantumque eorum temeritate, injuriisque laceßiti ab  
hu.

humanitate in agenda causa desciscere, non tam ad laudem indipiscendam, quam ad vitandam vituperationem animati; itaque me iusserunt moderate, & humane, remissiusque, quoad res patietur, ac citra similitudinem, salvoque jure nostræ veteris amicitiae causam dicere, nec illud municipium alioqui honestum in discrimen vocare, magisque eorum maledictis respondere, quam eos nostris laceffere. Novimus sane multos ejus municipii bonos, ac moderatos homines, honestasque familias, quibus exploratum habemus, ut dixi, hanc inanem, planeque supervacaneam, ac plenam inutilitatis controversiam summopere displicere; verum apud illos, ut etiam vitio temporum in plerisque aliis munitioribus municipiis sit, nunc regnant cives deterrimi, in principemque locum in Civitatem invasere, atque omnia possunt; & id quidem hominum genus esse solet plerumque abjectum, egenum, litigiosum, improbum, ingenio malo, pravoque, qui aut rei suæ, aut negotii inopia ad rei communis gubernacula obrepunt, paulatimque decuriati, positi in aliquo numero ea, quæ sunt municipii communia, domum suam rapaces avertunt in rem suam convertentes. Istos, ut aliqui vocant, vespillones si quaesieris, omnibus horis in Decurionum aula reperias, donec ex egentissimis, & mendicis ad magnas opes perveniant; ab iis pestibus Populi insciente Civitate, mox etiam bonis reclamantibus civibus constat esse hanc seditionem sine mente, sine ratione, atque consilio comperimus; seditionem dixi; quo enim alio nomine aptius appellem hanc  
repen-

repentem insolitamque amborum populorum commotionem, atque discordiam? cum ambæ Civitates antea semper fuerint duo sub eodem capite concordissima membra. Sed videte, per Deum immortalem, quam mihi difficultatem creet civium mearum moderatio, quantum eorum temperantia meam actionem debilitet, dum mihi certos fines, ac terminos præstituunt; lacessunt Papienses nos insolenter, atque inimice pugnandi cupidi, dum se se intolerantissime sine ratione efferunt: æquum erat nos eos quasi extra ripas redundantes coercere, & eorum superbiam, fastidium, atque arrogantiam retundere, & parari, ut ajunt, referre; At nostri placatius, remissiusque me agere volunt, idque a me petunt, summeque contendunt, ne omnes ad unum Papienses oratione jugulem, sed eos tantum amice coarguam, quorum insania coorta est hæc quæstio, perinde ac si cum amicissimis agerent, nihil omnino me dicere volunt extra causam, quod communiter ad ejus municipii alioqui honesti ignominiam redundet, quantumvis eorum maledictis provocati, ut hic non sit mihi tam quærenda copia, quam in dicendo modus: videtis quam mihi religionem iniiciant, quibus me vinculis illigent, intra quas carcerum angustias currere jubeant, quos inquam mihi cancellos circumdent; quin etiam, ut intimos meorum sensus vobis penitus aperiā, iccirco me potissimum ad hoc agendi munus elegerunt, non quod in nostra Civitate non sint quamplurimi, qui eloquentia, ac dicendi facultate me longe antecellant, sed quia animi mei quædam naturalis leni-

lenitas, ac moderatio usu eis semper nota, ac spectata fuit, nec quicquam a me tragicum, atque præfractum, quodve non sit moderatissimi, ac pacatissimi sensus, metuere, aut certe expectare possint. Ego equidem non discedam ab officio in tantæ rei dimicatione, enitarque, ne invisa sit, aut ingrata oratio nostra, mihi que ita moderabor, ut & Civibus meis satisfactum sit, & adversariis minus doleat; quos extra hanc causam benevolentia prosequimur; eos satis mihi fuerit ad sanitatem reducere; quod quidem me effecturum spero, si eos orationis lumine detractis alienis laciniiis, & ambitionis indumentis, quibus se falso ornant, denudavero, omnibusque, & etiam ipsis, qui, & quales sint palam ostendero. Si quod tamen interdum a me in agendo acutè dictum parum commodum inconsulte exciderit, quod non tantum in paucos illos temerarios, qui nobis periculum creant, prolatum videri possit, sed totum municipium leviter resperferit, nullo pacto, civium meorum voluntati ascribant, neque mihi tamen fraudi esse velim, sed inconsiderantiæ meæ, atque imprudentiæ, aut potius errori attribuant, qui non potuerim omnia circumspeditione assequi, & stadium currens interdum nimium, aut dexter, aut sinister offenderim in curricula septa, atque in cancellos incurrerim. Quis, obsecro, est in medicina tam peritus, atque exercitatus artifex, qui, cum in corpore morboſo aliquid est ejusmodi, quod nisi amputetur, vitiosum reliquo corpori noceat, adeo enucleate, adeo ad præscriptum feces, ut non aliqua parte ad vivum pene-

penetret, sanasque, & integras corporis partes non interdum acie perstringat? nihil proferam acerbum auditu, nihil contumeliose, nihil inimico animo, ut ea civitas, quicquid a me dictum fuerit, sine offensione in bonam partem accipere possit, nisi forte alterius Civitatis cum altera comparatio quippiam per se offenderit. Hujusmodi enim collationes cum contentione in aliquorum animis odium generare solent. Alteram quoque difficultatem priore haud quaquam minorem mihi creat meorum civium moderatio, qui super omnia mihi præscribere, ut de nostræ Civitatis statu, dignitate scilicet, virtute, rebus gestis, atque fortunis, idest de nostra mediocritate verba faciens modice quidem, timideque id facerem, atque omnino pauca dicerem, nequid ei arrogem, quod nobis invidiam apud hanc coronam constare possit, sed plura relinquerem in auditorum animis, qui utramque Civitatem optime norunt, cogitanda, itaque difficilem quandam temperantiam postulant. Sed quæ ista est tam restricta præfinitio? hæc Oratoribus relinqui solent libera, & infinita, ut, ubi opus sit, excurrere, ac spatium possit Oratio. Qui, inquam quæso, id a me fieri queat, cum Oratio tota in utriusque municipii contentione, ac comparatione versabitur? potero ne sine sceleris suspitione suis laudibus defraudare eam Civitatem, quam nemo vestrum, Patres, non novit splendore civium honestam, omnibus rebus ornatam, instructam, atque refertam? potero ne, inquam, hoc faciens non vereri, ne vos ipsi in aliquam suspicionem inducamini,



mini, me ab adversariis, pretio, aut gratia labefactatum huic causſæ appositum fuiſſe prævaricatorem? Parendum eſt tamen communi Civium meorum ſententiæ, decurrendumque per ea ſpatia, quæ mihi ſunt præfinita; utar ſaltem eo temperamento, ut quicquid protulero, quod in laudem, & commendationem meorum redundet; illud adeo ſit clarum, & omnibus notum, ut nullus arrogantia, aut jaſtantiæ locus eſſe poſſit: præ tamen innuam, quam dicam. Veſtræ ſapientia tunc erit, judices, animis veſtris, veſtra intelligentia plura comprehendere, quam mea Oratione explicatum fuerit. Quæ autem a me dicentur, boni conſulatis, velim, memineriſque in omnibus Orationis noſtræ partibus Cremonenſes veſtros nulla cupiditate inflammatos, nulla malevolentia, aut invidia ſuffuſos in hoc certamen deſcendiſſe, neque a nobis adverſarios laceſſitos fuiſſe, ſed ab illis negotium nobis nulla cauſa exhiberi cæptum, tantumque nos de ornamentis noſtris retinendis officio diſputare, non ſtudio litigare de augendis. Spero hodie veſtris æquiſſimis ſtudiis fretus efficiam, ut luce clarius, ſublata omni nube videre poſſitis, quam Papienſes, qui tam insolenter tot Reges, tot Tetrarchas, & Tyrannos jaſtare ſolent, ſint nobis impares, quam longe ſint inferiores. Convincam eos tum re ipſa, quam ſub oculis veſtris ſubjiciam, figamque in animis, tum locupletiffimis argumentis, exploratiſque rationibus, & veruſtiſſimis hitoriis, ideſt incorruptis, & integris teſtibus, parumque eis proderit, quod compertum habeamus, attuliſſe in judi-

dicium externi hominis eruditi quidem, atque disertum, quem multa mercede conduxere, paratam, ac meditatam orationem, cujus præstigiis nos de possessione dignitatis nostræ deicere sperant. Nos autem freti vestra æquitate, causæque confisi non adhibuimus peregrinam eloquentiam, sed simplicius agemus nostrate oratione contenti, qua nobis satisfactum erit, si rem in veritatis lucem protulerimus. Quod futurum haud equidem despero duce ratione, quæ mihi ex bona fide agenti semper præsto erit, & menti meæ clarissimum lumen præferet, quando necessitas, non libido me, meosque cives in hanc causam detrusit, cum inducti jam nostra sponte essemus, ut multum de jure nostro decederemus, quo inter nos aliqua concordie ratio constitueretur. Vestram, Judices, virtutem, justitiam, fidem, integritatem hodierna dies ostendet in tam illustri, in tam ab omnibus expectata causa, cum tanta præstantissimorum virorum frequentia, tanto præclarissimæ Provinciæ concursu, in oculis totius Italiæ agendum sit.

Quæ Cremonensibus sit ratio, & causa cum Papiensibus, jam audistis Judices. Jam intelligitis a Papiensibus vocari in quæstionem, & controversiam Cremonensium dignitatem, esseque contentionem de loco, deque amplitudine, agi, inquam, inter utramque Civitatem de principatu. Si mihi causa deesset, aut juri nostro diffiderem, omissis iis, quæ nobiscum faciunt, poteram Civitatem meam in gradu dignitatis suæ, ac statu tueri opposita longi temporis possessione, quam usu nostros legitime cepisse facile probare possem, ut

ut agerem Prætoris interdicto, UTI POSSIDETIS, contra Papientes, qui nos omnibus viis conantur inde deturbare. Poteramus luculentissime omnium ætatum, temporum, ac Civitatum memoria usque in hanc diem probare, nos in perpetua stabili, ac constanti possessione, neque vi, neque clam, neque precario permanisse, atque post Mediolanenses inter Provinciæ Legatos nostris Legatis primas semper delatas fuisse in publicis sessionibus, tam in omnibus ludis ob publicam læticiam indictis, quam in apparatissimis pompis in funere clarissimorum virorum celebratis. Possemus citare hujusce rei testem hanc ipsam Civitatem vestram, totam Provinciam, omnemque Vicinitatem, cum nulla contrariæ memoriæ queat esse satis explicata recordatio. Audebunt ne id contra hiscere adversarii? Non existimo, eos ita pudorem, & verecundiam deposuisse. Tametsi priusquam me audissent, nisi sint mihi primo litis ingressu, cum viderent causam suam hære, nescio quid voluisse dicere de possessione. Nam cum intelligerent nullum aditum ad se tuendum patere, consilium fugæ incertæ, ac periculosæ, ne dicam desperatæ capientes decreverant uti quodam diverticulo, si non certo, at saltem non nullo, ne ultro plane cedere viderentur. Et cum se omni aditu circumcludi conspicerent, ne qua effugere quirent, in hanc quasi cloacam per tubulos sese demittere cogitaverant.

Ajebant enim nescio quem recentem rerum scriptorem (Coriarium, si recte memini, nominant) qui Mediolanensium annales conscribit, attestari

in exequiis Joannis Galeacii Vicecomitis Mediolanensium Ducis inter Civitatum Legatos, qui ex tota Provincia convenerant ad comitandum, honestandumque funus, principem locum Papienses præ nostris tenuisse. Nunquam ego, ingenue fateor, Judices, legeram istos Annales, quos meo deinde jussu familiares mei ad me attulerunt. Nihil mihi longius fuit, quam exploratum habere, quanta esset Scriptoris dignitas, quodve scriptio-  
nis genus, ut deinde judicare possem, quanta ejus dictis fides, & auctoritas deberetur. Sumpsi librum in manus. Dii magni! horribilem, ac novam historiarum congeriem! ad primæ paginæ aspectum cohorrui: dum latine saltem scriptam historiam expecto, incido in verba, quorum usus vulgaris, ut a nutrice loqui ille didicerat, nec ea quidem valde bona. Visus sum mihi audire hominem loquentem ex eorum genere, qui ad nos ex vallis Tellinæ tabernaculis frequentes venire solent, ut se minuta mercedula nobis locent ad deferenda onera omnibus expositi. Pergo, ut possum, ulterius legendo, & vim mihi metipsi quodammodo afferro. Dii immortales! quo stomacho, quanta nausea, neque enim illico pervenire potui ad historię locum, quem optabam; quoniam in fronte tam vasti, & immanis libri bullus se mihi index obtulit, qui me eo via quasi compendiaria perduceret. Pene risu mihi disrupta sunt latera, dum animadverto, qua dignitate, quanta tam rerum, quam verborum majestate scriptor iste impleat omnes numeros, quo ordine omnia digerat, atque distinguat, quamve exacte leges historię in scriben-

scribendo servarit, quam diligens sit, & semper mirus in describendis epulis, ut fideliter, ac religiose singula fercula semper enumeret, ne unum quidem omittat usque ad vilissimi jusculi scutellam descendens, ut jam desinamus demirari Sîmiæ Dodonææ improbitatem Græcis historiis mandatam fuisse. Non potui, fateor, durare, quousque ad locum pervenirem. Legant, quibus est ferreus stomachus, quive hoc genere eloquentiæ delectantur. Nam quis est iste Coriarius homo novus, recensque scriptor, ut ejus dictis, aut scriptis opus sit tantum fidei haberi? atqui dicent, scripsit annales: quasi vero omnium annalibus debeat fides. Quid si illi essent hominis novi, recentisque scriptoris, quem plerique vestrum, Judices, vidisse potuissetis istiusmodi res scribentem? Quid si hominis idiotæ, illiterati, stupidi, omnia perverse, præpostereque scribentis, sine ulla arte, sine usu, sine legibus, sine ratione, in summa rerum omnium ignoratione versantis, usque eo, ut se ipsum quoque ignoraret? Quid si, ut breviter omnia complectar, essent ANNALES VOLUSI, & quæ sequuntur apud lepidissimum Pœtam? Ego equidem non plane, affirmo Coriarium istum talem esse; viderint tamen ipsi; ajo vero, ea, quæ iste scripsit de illo funere, non ipsum præsentem spectasse cum nondum esset natus, sed ab aliis audita retulisse, in quibus falli potuit, atque memoria labi, quod quidem licet suspicari, si idem judicium adhibuit in indagandis explorandisque rebus, quibus ipse non interfuit, quod ad easdem scribendas attulit: ponit enim sæpe pœ-

tæ aliqujus figmenta pro historia rerum gestarum, eisque fidem adjungit, ut Veneris adventum in Italiam cum toto Amorum comitatu, ostenditque se plane ignorare alias in poemate, alias in historia observandas esse leges. Quid? Nonne quoque fieri potuit, ut ea, quæ pertinent ad istas exequias, expiscatus fuerit ab aliquo Papiensi, qui piaculum esse non duxerit aliquid pro Patria mentiri? præsertim cum intelligam, eam Villam, in qua isti Annales confecti fuerunt, non multum disjungi ab agro Papiensi. Si ista Religio valet, Judices, ut cum primum quispiam historiam orditur, statim summa fides ei ab omnibus mortalibus debeatur, jam improbi homines, ut quantumvis longi temporis usucapiones in judiciis probare possint, pretio, & largitionibus inducent levissimum quemque nebulonem, ac Sycophantam ad scribendum annales, qua illi veluti religione consecrati summam illico auctoritatem assequantur in dandis testimoniis, quorum fidem sanctam esse oporteat.

Quod vero addunt Papienses nostris Legatis suos iterum prælatos fuisse in exequiis Francisci Sforcie II. Mediolanen. Ducis, commentitium prorsum est, & plane falsum: nec nobis, si necesse esset, & ad nos spectaret probatio, deessent testes plurimi gravissimi, & integerrimi viri, qui eorum commentum refellere possent, attestarique primas nostris Legatis tributas fuisse tam in illius Principis pompa, quam in Alfonso Avari Valli exequiis, quæ summo apparatu, atque magnificentia celebratæ fuerunt ad omnem ostentationem.

nem. Evinceremus item in adventu Cæsaris habitam fuisse Mediolori dignitatis nostræ rationem, nostrosque Papiensium Legatis honore antecessisse. Constat item inter simulacra Civitatum totius Provinciæ, quæ certo ordine collocari solent in fornicibus ad ipsius Provinciæ ostentandas opes, atque potentiam extructis magnificentia plusquam regia, effigiem nostræ Civitatis prælatam fuisse Papiensi simulacro, ut major honos haberetur ei Civitati, cui maxime debebatur. Quæ etiam ratio haberi solita est ab Imperatoribus ipsis, cum Senatus datur Civitatum Legatis, cui rei contrarium nunquam adversarii probare poterunt. Nisi, Judices, civitas nostra jus suum, quo undique circumvallata est, solidum, firmum, atque in re ipsa infixum haberet, poterat nullo negotio se tueri in dignitatis suæ possessione, petereque a vobis, ut vestro interdicto interposito, uti possideremus, ita possideremus. Verum cum nobis se ultro offerat via simplex, lata, aperta, directa, atque perpetua, qua ad nostrum facile pervenire possimus, non est quod occultas, inusitatas, & minus tritas quasdam semitas, angustas, spinosas, ac tortuosas exquirere velimus. Qui metuunt, & omnia suspecta habent, ut fugitivi, & qui decoxerunt creditoribus iudicum sententiis addicti, ne capiantur, dedanturque, omnia diverticula, omnes flexiones indagare solent, omnes quærere solitudines, omnes Mæandros, atque Euripos persequi, ut visi sunt nunc facere velle Papienses, quibus omnia in causa defunt, præter frigidas quasdam, & jejunas calumnias. Iis igitur mirandum in mo-

dum arridet illa subtilis, & exquisita juris cautio, ac formula, qua licet fundi possessionem usurpare manu furculum, vel de via defringendo, nec considerant, ut quis in firma, ac stabili honoris, & dignitatis, primarumque partium possessione esse dicatur, quanto temporis spatio, quotiesve opus sit cum prælato fuisse illis, quibus dignitate vult præstare. Nec magnopere distinguunt jus illud, quod corporatum dicitur, ab illo, quod est sine corpore, putantque statim vicisse, si vel tenuiter probare queant semel suos Legatos ante nostros auditos ab Imperatore nihil ista animadvertente, & majoribus negotiis occupato, aut ab Imperatoris ipsius statore istarum contentionum ignaro, & fortasse etiam largitionibus corrupto, priore loco semel citatos fuisse: etiam rogo si rem furtivam considerent contra Legem Attiniam, neque adesset bona fides? etiam si vis, aut dolus intervenisset? etiam si talis possessio esset plane contra leges, & rationi adversaretur, ut minor majori antecederet? Non possum adduci, ut credam adversarios in sententia perstaturos, ut audeant nobiscum possessionis nomine agere, ne continuo tam insignis mendacii turpiter convincantur. Si alterutri partium in hac causa actio possessionis convenit, certe nostris non posset negari, qui semper, ut præcellentes honore, & dignitate, prælati fuerunt in omnibus pompis, & publicis sessionibus, si adversarii sapiunt, non conicient se in has juris tam incerti, tam tortuosi, tam multiplicis angustias. Quod si tandem fecerint, ut etiam vera forent, quæ ementiuntur, tale esset, ac si quis  
in



in via publica pallium mihi detraxisset, statimque a me conventus, & in jus vocatus excipiat se possidere, postuletque a prætore, ut ex edicto si-  
bi liceat pallium retinere: existimas ne illum præ-  
tor tuebitur in istiusmodi possessione? an potius,  
ut furem, in vincula coniectum supplicio afficien-  
dum judicabit? non est meum adversario præscri-  
bere quemadmodum in causa ab eo agi velim:  
Si se tamen Papienses in has difficultates detruse-  
rint, cito intelligent ad quos scopulos res suas  
appulerint. Nos vero in hac dimicatione, recta,  
ac certa tendamus via, & cum adversariis, præ-  
sertim in tam bona causa, non ex callido, &  
versuto jure, sed ex æquo, & bono agamus, dum-  
modo ob id nobis non obstruatur via, quo mi-  
nus quoque, si usus fuerit, quacumque illi effu-  
gerint, possimus persequi. Cum præsertim causa  
agatur apud eos Judices, qui præcis quibusdam  
tenuibus, ac supervacaneis controversiarum, aut  
potius calumniarum ramusculis queunt quæstionem  
in re fundatam constituere, & quacumque velint,  
actionem dare; cum vel prætoriis exceptionibus  
multæ excludi possint actiones. Hi vero, ad quos  
omnis fere Cæsaris potestas ab ipso Cæsare trans-  
lata fuit, aut saltem cum eis communicata, multo  
maxime possunt rejectis inanibus, ac supervacuis  
verborum disceptationibus ( spoliū actionem vo-  
cant ) quæ hic nullum usum habent, ad rem  
quæstionem omnem revocare. Quid est enim opus  
circuitione, atque anfractu potius, quam directo,  
cum sine re nulla verbi vis esse possit, & eos  
Judices habeamus, quorum studium semper fuit,

ut non malint constituere juris actiones, quam tollere controversias?

Disquiramus igitur, quæ res efficere possint, ut Civitates aliæ aliis dignitate præcellant, ut Papiam cum Cremona conferentes videamus utra sit præstantior. Hoc erit omiſſis crebris quibusdam quasi levis armaturæ excursionibus, velitationibusque rem cominus aggredi, & in arcem causæ invadere. Quæ Civitates student aliis excellere, debent aliquam præstantiæ causam afferre, aut Vetustatem, aut Nobilitatem originis, aut certe majores Opes, aut Civium ampliorem Numerum, aut populi Virtutem, quæ latissime patet, & unde omnium recte factorum proficiſcitur gloria, vel Libertatem, vel optimam Legum Institutionem; hæc enim septem reperio, propter quæ urbes aliæ aliis præstare possint. De libertate autem nihil mihi magnopere elaborandum, cum utrumque municipium, aut plane liberum sit, aut pari conditione unius imperio parcat; neque enim nos unquam dicam servire, cum tam lenis, ac mitis imperii æquifimis Legibus obtemperemus. Tametsi reliqua sex arbitror esse perspicua, omnibusque palam esse, quantum in cunctis Cremonenses emineant, præferendique sint Papiensibus, quantumve ea omnia in nobis sint potiora, nihilominus mihi dicendum est sigillatim de omnibus, & ordine certo discernendum: Dabo operam, ut, quoad res patietur, minimo cum fastidio vestro id fiat. Ac de amborum urbium quidem antiquitate prius, quæ in primis ei Civitati est necessaria, quæ alteri vult præstare. Illud enim municipium habitum fuit a  
Ma.

Majoribus nostris nobile, quod antiquum: quod quidem non tantum in urbibus, aut oppidis servatur, sed etiam in plerisque aliis rebus constans est, ac perpetuum, ut quod antiquius probatur, id potius, meliusque, ac sanctius esse comprobetur. Quamobrem etiam in communi loquendi usu usurpamus, ut cum aliquid nobis carum esse innuere velimus, nihil eo nobis antiquius, sanctiusque esse dicamus. Magnam profecto vim vetustatis esse, antiquitatisve, nemo est qui ignoret, majoremque auctoritatem, & fidem veteribus, & priscis, ut ajunt, viris haberi nemo ibit inficias; quod quidem religiose semper servatum fuit apud Lacedemonios, quorum spectata, & nobilitata virtus semper fuit: apud nos etiam videmus non modo Tempia, ac Delubra, verum etiam sepulcra semper fieri vetustate sanctiora. Quid? nonne homines quoque seniores semper majori inter alios ejusdem conditionis, & status honore digni habentur? quod frequentissime Homerus pictor diligens, & naturæ fictor innuit. Ac de municipiis quidem, quod quæstionis nostræ proprium est, cum M. Antonius objiceret C. Octavio ignobilitatem generis, quod Pater ejus Aricia natus esset, quod, inquit Cicero, iste municipium non contemnit, qui Aricinum tantum despicit nobilitate antiquissimum? Antequam de antiquitate utriusque urbis differam percutandum est mihi ab adversariis, quinam sint ipsi, Papienses ne, an Ticinenses esse velint, aut forte quipiam alii: Eadem ne sit Papia, quæ Ticinum, ut plane intelligam quibuscum mihi sit res, &

actio constituenda: non enim mihi satis exploratum est quod variis nominibus appelletur, neque rationes, quas illi afferunt pugnautes idem esse Papiam, & Ticinum, ita esse satis firmas arbitror, cum nullum hujusce sententiæ locupletem auctorem habeant. Quod si ea diversa sint, delibarent adversarii utrius municipii dici velint principes. Si malint esse Papienses, ut ubique gentium nominantur, viderint ipsi unde id nomen originem traxerit. Ego certe novi nuperum, & recentissimum esse, nec uspiam auditum, lectumve, nisi post Longobardorum in Italiam adventum. Atqui Ticinum, reor, Papiam esse contendit, quod si eis negavero, æstuabunt, scio, nec facile id satis firma auctoritate probare poterunt. Contrarium nos possumus affirmare, cum C. Plinius scribat, Ticinum conditum fuisse non procul a Pado. Quod homo Italus, & idem Transpadanus ignoraret Ticinum oppidum vicinius esse Ticino tam nobili fluvio, quam Pado. Stephanus item Græcus Scriptor idem oppidum ponit apud Ravennam, quæ non multum abest a Pado: Dicant isti quam propinqua sit Ravennæ sua Civitas, quam Ticinum esse pugnant, an prope Ravennam recte dici possit, a qua distare constat CL. millia passuum: dicant etiam unde illæ immortales inimiciæ, quas cum Ravennatibus gerunt: ipsi me nutu intelligunt. Sed liberaliter agamus cum adversariis, illisque assentiamur dantes ultro, quod contententes minime obtinere possent, fateamurque Papiam Ticinum esse: dicant tamen quando Ticinum Papia est vocari desita: adhuc  
non

non erit mihi probatu difficile nos multo antiquiores esse Ticinensibus, plurimosque annos ante fuisse Cremonam, quam Ticinum, quod quidem evincere possum plurimis, integerrimisque testibus, qui sine odio, & invidia rem, sicut est, enarrabunt, neque ullus subornationi locus esse apud eos possit. Omnis enim nostra Oratio in hac parte ex Historia, quæ est vetustatis nuntia, emanabit tanquam ex augusto fonte; nec in medium adducam, quæ memoria, aut testimonio alicujus incerti auctoris recentis, atque idiotæ, qui suspectus esse possit, sint introducta, sed ea tantum, quæ vetustissimorum annalium literis, & clarissimis scriptorum monumentis testata sunt, ac testificatione sempiterna consignata. Multa mihi ideo prætereunda, quæ de incunabulis urbis nostræ afferri possent memoriæ prodita a Scriptoribus non nullis. Pauca tantum dicam, & ea sane pernecessaria, ne hic videar nimis ambitiose obruere velle adversarios antiquitatis testimoniis. Non igitur contendam urbem nostram ab Hercule, quod multi affirmant, conditam; neque eam a Trojanis initium habuisse, adversariis que condono illum nescio quem Cremonem, quem scriptum reperi nomen Cremonæ de suo nomine indidisse; remitto etiam illis Brenonem illum, quem ajunt Palantis socium temporibus Delboræ apud Hebræorum gentem Judicis, ac Disceptatoris controversiarum ejus gentis instituti urbem nostram condidisse, primumque Brenoniam de suo nomine appellasse, quæ mox paucarum literarum mutatione, ita ferente usu, dicta sit Cremona; neque multum

multum elaboro, eam, ut scriptum quidam reli-  
quere, quondam ab Hercule liberatam fuisse gi-  
gantum latrocinio, qui aliquando cum iis locis in-  
sedissent, omnem eam oram infestabant. Hæc om-  
nia adversariis condonata volo, nisi forte ipsi, cum  
de sui municipii origine agent, fabulis, & somniis  
inniti voluerint monstra, & portenta narrantes,  
& Papiam temporibus Assueri Persarum Regis a  
Senonibus fuisse conditam, ut ajunt, nescio quem  
nullius auctoritatis Scriptorem Stephanardum so-  
mniasse, quæ tota sunt commentitia, & nullis an-  
nalibus suffulta, ne eos ego quoque ad Delboræ  
Hebræi, de quo paulo ante, tempora multo an-  
tiquiora revocem. Si, Judices, de prima origine  
urbis nostræ agimus, est adeo vetusta, ut plane  
ignoretur, quando primum cœperit, superetque  
omnem vetustatis memoriam. Cinctam vero fos-  
sa, ac muro, propugnaculisque, & munitiorem  
redditam a Romanis comperio clarissimis nobi-  
lium Scriptorum monumentis, testimoniisque in-  
corruptis ante bellum Punicum, ut esset, que-  
madmodum ait Cornelius Tacitus, propugnacu-  
lum contra Gallos trans Padum agentes, & si  
qua alia vis per alpes irrueret. Ingruente igitur  
in Italiam Annibale, T. Sempronio, & P. Cor-  
nelio Confs., a Romanis, ut ait post Polybium  
T. Livius gravis auctor, Cremona circumdata mu-  
ris fuit simul cum Placentia, & utræque deductæ  
Coloniæ, singulisque decreta sex milia hominum,  
qui utrique municipio præsidio essent. Hic sædela-  
psus est Cornelius ipse alioqui luculentus, & gra-  
vis historiarum Scriptor, quod tunc conditam a  
Ro-

Romanis Cremonam arbitratus sit , cum cincta muris fuit , & deducta Colonia , atque in hac re profecto major fides habenda Polybio , qui græce historiam Romanam conscripsit , non modo , quod antiquior , sed quod etiam diligentia nemini historiarum Scriptori habeatur inferior . Is enim , cum jam decretæ provinciæ Consulibus , quos memoravi , sortitusque esset Cornelius Hispaniam , T. Sempronius Africam cum Sicilia , omni , inquit , studio ad perficiendas Colonias incumbunt , quas circa Padum in Gallia inchoaverant , jam ædificata erant oppida ; jussi sunt oppidani , ut intra triginta dierum spatium convenirent , decreta singulis coloniis sex milia hominum . His verbis liquet agi hic tantum de oppidorum munitione , quæ jam erant condita , & aliqua incolarum frequentia habitata , cum inquit oppidanos jussos esse intra triginta dies in oppida convenire . Fefellit Tacitum , quod Polybius ait , in eoloco , omnem operam Romanos navasse per eos dies perficiendis coloniis , quas cæperant ; quasi vero ibi nulla essent ædificia , antequam Coloniæ ducerentur , sed locum omnino vacuum muro cingerent , cum potius Romanorum consuetudo fuerit , ut quæ oppida infrequentia nacti essent , eo colonias deducerent , ut Albam , Velitras , Signiam , Circeos , Norbam , Lavicum , Cales , Fregellas , Luceriam , Sueffam , Minturnas , Pontiam , Casinum , Soram , Carseolos , Narniam , & complures alias , ex quibus pleræque fuerunt ante conditam Romam ipsam . Quin etiam quamvis non licebat in id municipium , quo semel Colonia ducta fuisset , iterum

rum deducere prima florente, atque incolumi, tamen deficiente incolarum numero tum bello, tum pestilentia, aut aliqua alia vi suppleto salvis auspiciis reduci poterat, ac renovari, quod quidem Cremonæ contigit, & Placentiæ; namque post primo colonias deductas L. Scipione, & C. Lælio Cons., querentibus Cremonensium, & Placentinorum Legatis in Senatu colonorum inopiam, aliis belli casibus, aliis pestilentia absumptis, ut idem refert Livius, quosdam etiam tædio accolarum Gallorum reliquisse Colonias, decrevit Senatus, uti C. Lælius Consul sex milia familiarum conscriberet, quæ in eas Colonias dividerentur, & ut L. Aurunculejus prætor triumviros crearet ad eos deducendos. Creati M. Acilius, L. Valerius P. filius, L. Valerius C. filius Tappo. Quo fit, ut illa Cornelii annorum supputatio de urbis Cremonæ origine convincatur, quod clarissime Asconius Pedianus haud obscurus auctor admonet Cremonam asserens, priusquam a Romanis ducta esset Colonia, conditam fuisse a Gallis, qui ea loca occupaverant; id sane nemo diligens historiarum existimator ibit inficias, sed esto rejectis Polybio, Livioque incorruptissimis testibus, præteritque Asconio, soli Cornelio credatur, plurimosque annos ab antiquitate originis nostræ urbis detrahimus, quos Papiensibus, agentes cum eis liberaliter condonemus. Condita sane fuerit Cremona tunc, cum P. Sempronio, & T. Cornelio Cons. primum deducta fuit Colonia; non poterunt tamen negare fuisse Cremonam, antequam Annibal cum Poenorum exercitu in Italiam descendit, cum



cum nondum neque Papiæ, neque Ticini oppidi nomen usquam terrarum audiretur. Interea vero apud eosdem scriptores præter id quod modo dictum fuit de origine urbis, in eodem bello Punico reperitur Cremonensis nominis frequens mentio, ut apud eundem Livium, cum Romani occupati bello Macedonico, Insubresque omnes, Cenomani, & Boii excitis Selinibus, & Iluatibus, cæterisque populis Ligustinis Amilcare duce Placentiam invadere, captamque, & direptam incendere, Cremonam deinde magno malo suo, ut postea suo loco dicetur, repulsi frustra tentarunt, sexcentisque aliis in locis ejusdem belli Punici temporibus apud eundem Livium, cæterosque Scriptores populi Cremonensis mentionem reperiatis. Cum vero de Ticino oppido in eorundem Scriptorum annalibus illis temporibus ne verbum quidem, sitque tum apud eos tam mirum de illo silentium, tum apud cæteros omnes tam infrequens mentio, audacter dico, & magna voce dico, oppidum vestrum, Papienses, seu Papiam, seu Ticinum malitis, illis temporibus nondum uspiam gentium fuisse, cum id sit quoque, non, ut multa alia oppida, devium, ac semotum, sed loco valde opportunum, fierique non potuerit, quin utrique exercitui Romano, ac Poeno contingerit sæpius per agrum vestrum saltem iter facere. Non tacuisset proculdubio T. Livius nomen insignis admodum municipii, ubi scribit, Romanos Ticinum amnem ponte junxisse, ibique Castellum imposuisse, cum idem vel Tumulos vicum ignobilem, atque obscurum nominet. Item  
cum

cum Scipio accepisset cladem illam nobilem Ticinensem, narrat idem auctor, cum trajecto Pado exercitum deduxisse, cum valde opportunum Romanis fuisset in oppidum Ticinum, si tunc fuisset conditum, se recipere: quo ita tacite transito in tanta exercitus Romani trepidatione, tantaque rerum turbatione, ac necessitate, quis poterit adduci, ut credat illud oppidum tunc extare? Indicate vos per Deum, quo in loco Livius ipse in tanta historiarum congerie illis temporibus de vobis, deque vestro municipio verbum ullum proferat. Docete apud quos alios rerum Scriptores memoriam vestri nominis reperire queam, cum nominis Cremonensis fama perceleberrima sit ubique dissipata, toties consignata, ac consecrata apud Polybium, C. Cæsarem, Livium in ea quoque parte historiarum, quæ nuper reperta fuit, Plutarchum, Cornelium Tacitum, Vellejum Paterculum, Asconium, & alios multos; quorum non modo annalium literis, ac monumentis memoriarum proditi sumus, sed etiam nobilium, & antiquorum poetarum voce laudati. Hi sunt nostri Stephanardi, aut Coriarii, ut posthac de antiquitate, nisi plane nihil scitis, ac sentitis, nobiscum contendere desinatis, nisi etiam forte locupletiores auctores, magisque incorruptos testes, qui magis sine odio, & invidia loquantur, expectetis, idest nisi plane desipiatis, cum res ipsa loquatur nobis tacentibus, neque ullus tergiversandi locus vobis relinquatur. Agite vero antiquitate victi, contendite de Originis Nobilitate, deque utriusque municipii conditoribus disseramus,

mus, videamusque utrum illustriora habuerit initia.

Magnus ille, & divinus auctor princeps ingenii, & doctrinæ Plato in libro, qui Menexenus inscribitur, inducit Socratem laudantem Atheniensium civitatem, quod majorum origo haud peregrina fuerit. Hanc laudem Civitas vestra minime est consecuta, cum, si quid C. Plinio haud ignobili auctori credimus, Ticinum oppidum conditum fuerit a Leviis, & Maricis barbaris, atque subalpinis Populis, quorum apud scriptores omnes infrequens mentio. Cremona vero Civitas pervetus optimis conditoribus divinitus constituta fuit, ut vobis modo assentiamus, gratificemurque, tunc primum conditam fuisse, cum deducta fuit Colonia; mirabilis deinde ejus fuit progressio, & ad omnem excellentiam, ut postea demonstrabo, incredibilis cursus factus; non a Liguribus, Gallicisve, aut barbaris quibusvis posita est, sed a populo rerum omnium domino, atque omnium regum, omnium nationum, gentiumque victore initium habuit. Dicam enim bona fide rem, sicuti est, explicaboque incunabula urbis nostræ, ac plana faciam, ut rerum nemo diligens indagator non ita esse fateatur, neque non nobiscum sentiat. In illo pulcherrimo, ac feracissimo tractu oræ mediterraneæ, quam Cenomani habitant inter Padum, & Ollium flumina, propter ubertatem agrorum, solique bonitatem, pro comperto habemus plurimos incolas, qui sparsim in locis circumvicinis habitabant, vicos, & tabernacula posuisse, adeoque ibi ædificia increbuisse, ut jam  
spe.

speciem, & amplitudinem urbis præberent intuentibus; ut principio dici possit potius nata, quam a quoquam urbs condita, ut modo de Athenis dicebamus, nondum murorum manitione septa erat, sed tenui fossa, exiguoque aggere pro vallo se incolæ tuebantur adversus ferarum, latro- numque incurfus. Romani deinde sub adventu Annibalis primo coloniam duxere, murisque firmissimis cinxerunt. Hinc tanta accessio municipio facta est, ut brevi tempore, ut ait Tacitus, colonorum numero, opportunitate fluminum, ubertate agrorum, nexu, connubiisque finitimorum populorum mirum in modum adoleverit, florueritque, bellis externis diu intacta, civilibus obnoxia, semperque deinceps Cremonenses officio, ac fide singulari esse se Romani seminis, ac generis sobolem comprobarunt, eligentes potius omnia extrema pati, quam tantillum a Romanorum Imperio dissentire, ut par erat Civitatem, quæ non tantum amicitia, ac societate Romanis conjuncta esset, sed etiam cognatione, potiusque eadem cum populo Romano dignosceretur. Omnium enim Coloniarum, quæ a Romanis deductæ erant, hæc erat Lex, ut colonis ager viritim divideretur, illi vero stipendia, & milites ex censu darent, & pari jure cum populo Romano in ferendis suffragiis Romæ citarentur. Id nemo in dubium vocabit, qui veteres annales diligenter perspexerit. Omnia ego hic si populi Cremonensis fortiter gesta, in quibus enituit ejus coloniarum fides, & virtus in auctores, majoresque suos, a quibus originem traxere, commemorare voluero, neque mihi

hi tempus suppetet, neque latera sufficient. Sed ea potius mihi tunc recensenda erunt, cum de populi nostri virtute, officio, ac fide suo loco dicetur. Satis nunc fuerit probasse Cremonam esse populi Romani Coloniam iterum deductam. Quod quidem omnibus exploratum esse debet, tum tantorum auctorum testificatione, tum hoc argumento, quod Majores nostri in fide semper perstiterunt erga populum Romanum, cujus sanguiserant, & propago, neque unquam detrectarunt munera militiæ ad Senatus, populi que Romani præscriptum obediens. Ut autem omnia hujus rei desint argumenta, cessentque rationes omnes, & testimonia scriptorum omnium, res ipsa per se liquet iis, qui omnino in Civitate nostra non peregrinantur, cum usque in præsentem diem audiant multarum, non dicam omnium, familiarum Cremonensium nomina cum Romanis, Latinisve familiis convenire, & intelligant easdem omnino esse, quæ in prima, & secunda Coloniz deductione Roma ad nos profectæ sunt, nomenque adhuc retinent. Nollem esse multus in eis omnibus numerandis; veruntamen, quoniam originis nostræ a Romanis deductæ hinc indubitata vestigia, indicia certissima, & argumenta colligi possunt, allego vos ad ea, quæ nuperrime de hac re scripsit Civis noster eruditissimus. Collegit enim supra sexcentas familias civitatis nostræ, quas Romanas fuisse nemo inficias ire potest, cum aliquæ sint omnino eadem, nomenque integrum adhuc retineant, aliquæ propter linguæ latinæ interitum, tantamque immutationem corrupte quidem enun-

D

cian.

ciantur paucarum literarum vel fuga, vel obreptione, mutationeve præpostera, aut inversione, attamen eadem esse, quæ Romanæ fuerint, agnosci possint. Multos etiam vicos agri nostri Scriptor diligentissimus enumerat, qui a familiis Romanis nomen duxerunt. Quid? quod etiam circa pondera, & mensuras nulla est in Italia Civitas, cujus ratio iis quoque temporibus magis conveniat cum Romanorum ratione. Jam satis planum fecimus Cremonenses Papiensibus præferendos tam antiquitate, quam nobilitate originis, quæ duo satis esse possent, si adversarii mentis essent suæ, nisi que essent insigniter impudentes, ut ab hac contentione sua sponte discederent: quæ cum sint manifesta, non urgebo diutius hunc locum. Dicant isti, si possunt, quam frequens sit in veterum annalibus sui municipii mentio, a quibusve conditum fuerit. Si alios conditores, quam quos C. Plinium referre dixi, commenti fuerint, tota eorum res erit nugatoria. Jam intelligitis, Papienses, his duabus rebus stabilitis totam causam vestram concidisse, neque verbum ullum mihi potestis respondere in re tam perspicua, & ab omnibus explorata. Agite vero cæteris in rebus, quas proposui, quanta sit præ illorum municipio Civitatis nostræ præstantia. Etenim, Judices, contendo, nos non in aliquibus tantum excellere, atque Papiensibus anteferri oportere, ita ut in aliquibus superati cedamus, ut de pictoribus loquentes Z. ulim longe cæteris præstantiorem in mulieris corpore pingendo affirmarunt, in alio vero picturæ genere ab aliquibus anteiri; sed omnibus

nibus in rebus a Cremona Papiam antecelli evincam.

Igitur inter ea, quæ Civitates alias aliis præstantiores reddere solent, in primis reperio per se id facere posse Civium ipsorum numerum, atque frequentiam. Nihil enim Civitatem esse convenit, quam quandam hominum consociationem, & communitatem eodem jure viventium. Sparsim prius in agris homines habitabant; ut vero adversus ferarum, aliorumque hominum vim, virium, opumque communione tutiores essent, cæperunt congregati simul habitare, quæ concilia, conventiculave, aut cœtus a principio jure sociatos civitates appellarunt, civesque dicti, qui conjunctione, & societate ejusmodi concilia facerent. Cum igitur numerus Civium sit radix omnis, & fundamentum, statusque ipsæ Civitatum, sine quo, neque esse, neque consistere possunt, sicuti sine aquarum collectione flumina esse nequeunt, quo major numerus Civium convenit, eo majorem, amplioremque, & præstantiorem Civitatem esse necesse sit, quod in fluminibus, ut in eadem similitudine perstemus, clarius videmus, quæ majore copia aquarum nobiliora semper fiunt, quod nemo est tam aversus a vero, tam præceps, ac mente captus, qui non videat. Mihi in animo est hanc Orationis partem leviter perstringere, quoniam de re illustri, & omnibus plane nota loquor, neque eget recondita quadam ratione, neque adversarios eo dementiæ processisse arbitror, ut velint solitudinem cum frequentia conferre; dicam tamen nonnulla propter circumstantes, quo-

rum aliqui fortasse, ut peregrini nullam utriusque Civitatis notitiam habent. Si antiquissimum quodque tempus spectandum, comperio nullam a principio Cremonensis nominis ætatem fuisse, qua nostra Civitas non fuerit jam tum frequentissima; quod quidem nemini dubium erit, qui meminerit testatum esse, ac consignatum annalium monumentis, cum primum a Romanis septa fuit muro, ab eisdem eo fuisse statim missa tria milia familiarum, quæ primis loci incolis, & indigenis adjecta possent justum numerum amplissimæ Civitatis efficere; etsi quando bellis pro Imperio Romano susceptis exhausta fuit, atque attrita, statim semper a populo Romano suppletus est justus Civium numerus. Prope est incredibile, quam brevi ea Civitas multis, & magnis cladibus receptis post casus semper resurgere potuerit, creveritque deinde in magnam multitudinem. Tempestate Annibalis Pœni cum nusquam terrarum essent Papienses, nondumque auditum esset usquam gentium Papiæ, aut Ticini oppidi nomen, in eam magnitudinem jam creverat Cremona, ut exercitus Gallicani vim, atque obsidionem multorum dierum Hasdrubale Carthaginienſi duce sustinere potuerit. Ut vero conjicere possimus quanto hostium numero oppugnata fuerit, tradit Livius eruptione a nostris facta, ingruentibus auxiliariis Romanorum copiis urbem obsidione liberatam, Gallorumque exercitum, cæso Pœno duce, profligatum, cæsa, captave supra quinque, & triginta Gallorum millia. Apertissime Strabo summæ auctoritatis Scriptor testatur Cremonam frequentissimam



amam fuisse, eamque, & Placentiam circum Padum celeberrimas Civitates vocat, cum idem vix nudum nomen Ticini oppidi proferat. Sequenti vero ætate post annum 286. ex quo deducta fuit primum a Romanis colonia, quam celebre fuerit ejus urbis nomen, si quis scire velit, refert Cornelius Tacitus, orto civili bello temporibus Vitellianis, cum Vespasianus jam imperio aspiraret, Cremonam, dum Vitellio Imperatori fidem, quam dederat, præstare nititur, a Vespasiani militibus, Antonio duce, igni, ferro, manu, copiis oppugnatam, demum captam, atque combustam, eoque irrupisse quadraginta armatorum millia, amplioremq; fuisse calorum, & lixarum numerum, qui ibi erant. Refert etiam obiter idem historiarum Scriptor tunc eodem magnam Italiæ partem convenisse statò forte in eosdem dies Mercatu, fuisseque jam tunc tanti nominis amplissimam Coloniam, ut ea capta, sectaque ab hostibus tota Italia consenserit, ne quis prædam a militibus coemeret, quod quidem causa fuit, ut & rarus inventus fuerit sector, & prædandi modus fieret, militesque abeuntes inutilem prædam relinquerent voci præconis frustra subjectam. Edixit quoque deinde ipse Antonius urbis magnificentia indutus, ad id etiam hortante Vespasiano jam rerum potito, ut captivi dimitterentur, fora, & templa, quæ regię Urbis speciem præseferabant, restituerentur, reedificata mox theatra, aliaque publica Ædificia reposita, ut brevi, ubertate agrî, opportunitate fluminum, colonorum numero, nexu, connubiisque finitimarum gentium, totiusque

Italix commercio in pristinum statum, fortunamque reddita fuerit. Taceo quantum jam tum ex duobus præliis in agro nostro apud Bebraicum commissis conjici liceat de numero, ac multitudine populi Cremonensis, cum semper alter exercitus opibus, ac copiis magna ex parte ejus Civitatis constatus fuerit. Mitto quanti momenti fuerit Cremona alteri partium, cui favebat in bello Civili, quod Cæsar contra Pompejum gessit; mortuo quoque Cæsare in alio bello Civili inter Augustum, & Brutum, Cassiumque, quæ rerum Scriptores luculentissime prosecuti sunt, cum interim de vestris hominibus mirum apud omnes silentium. Sed id olim fuerit, quod vobis totum remitto. At vero si forte placet magis præsentem fortunam spectari, numerumque, & frequentiam colonorum utriusque municipii, qui nunc sunt, & adhuc vivunt, inter nos conferri, non detrectabimus certamen. Vix adducor, ut credam vos ita desipere, ita nihil sentire, ut ultro in hanc palæstram descendatis, quo vestra impudentia ab omnibus mortalibus cognoscatur; nam etiam sine mea Oratione res ipsa vobis respondere possit. Nihil igitur comparandi causa dicam, ne vobis plane sim ridiculus, Judices, qui utriusque Civitatis non modo templa, & fora, & vias publicas inspexistis, sed etiam agros sapius, & vicos peragrastis, vestrisque in animis insedit facies Urbis utriusque. Cum mihi municipium vestrum, Papienses, aliquo suscepto itinere pertranseundum est, primo ingressu (dii boni!) qui me semper perfundit horror præ mira solitu-  
di.

dine! nihil infrequentius, nihil, pro divum, atque hominum fidem! reliquius, nihil desertius, magisve solitarium, ut ipsius solitudinis, aut vastitatis domus esse videatur. Semicluse tabernæ fere omnes, vacuæ apothecæ, frigent mercatorum, publicanorumque tabernacula, squalent omnia. A porta ad forum semper pervenio, antequam duos, ad summum tres obvios habeam, & illos quidem squalidos tanquam diuturna fame confectos, & male vestitos servorum quasi habitu sordidatos; & in ipso quoque foro solitudo. Si Papiæ adimas nobiles adolescentes, qui ibi commorantur, non animi causa, sed ut se variis doctrinis propter Magistrorum conductorum copiam excolant, nullum neque in montibus oppidum infrequentius reperiatis. Non dico id vobis insultandi gratia, sed magis pro societate, ac vicinitate nostra vicem vestram doleo, neque vos omnino contemnimus, quos, dum in calamitate tabescitis, eadem fortuna fere semper afflictos exercet, ut fieri solet in terris, in quibus bellum acerbum, & diuturnum versatum fuit. Atque hic equidem Papienses haud ego fortunam vobis adversam objicio, sed ignaviam potius, atque inertiam infector: quippe omnibus hujus ditionis Urbibus, omnibus municipiis, coloniis, & præfecturis, vicis quoque, & pagis commune fuit bellum, totaque Italia pervagatum est; omnia tamen alia municipia, & loca non tantum propter soli ubertatem, verum etiam propter hominum industriam, legumque optimam institutionem, & morum sanctitatem in pristinam fortunam resti-

tutâ sunt; cui rei argumento esse potest, quod jampridem cæterorum oppidorum arva ubique cultissima spectamus, restituta celebritate, & frequentia virorum, ac mulierum; in agris autem vestris, dii immortales! quæ vastitas? quæ solitudo! quam deserta, inculta, atque relicta omnia! Quæ, inquam, Barbaria vastior, quæ horridior solitudo? Illac iter habens, tanquam per deserta Lybiæ iturus, nisi ducem mercede conductum tecum habeas, nusquam reperias, qui tibi erranti, hæsitantive iter commonstret. Contra vero si ad nostra respicias; timide ingredior, Judices, loqui de frequentia nostræ Civitatis, de Populi Cremonensis magnitudine, deque Urbis honestissimæ amplitudine, & celebritate; scio enim quidvis cuivis florentissimæ Civitati facile posse contingere. Deus Optime Maxime hominum ipsorum sator, cujus nutu, atque imperio sola terrarum firmanur, positæ sunt Urbes, atque a principio institutæ Civitates, serva diu quæso hunc populum incolumem, atque florentem ad utilitatem hujus Sacrosancti Imperii, cui Cremonensis Civitas integram, illibatamque fidem semper præstitit, opesque suas, & copias semper promptas habuit. Tuque unici Filii a Deo innenarrabili partu æternum geniti, a te solo afflatu divino haud fabulose concepti Magna Parens, eademque Virgo, Cæli Regina, Mundi universi Domina, hominum generis tua precatione, ac conciliatu sospitatrix, quam semper post Deum est venerata, veneraturque quotidie nostra Civitas cultu præcipuo, posito amplissimo in optima Urbis parte  
tem.

Templo affabre , lauteque struſto. & vos cæleſtes Animi principio rerum a Deo creati , Divi. que omnes cælites , quos virtus , pietasque , & merita præclara , accedente propenſa in Vos Dei benevolentia , ac liberalitate ex hominibus in cælum evocarunt , adeſte pientiffimo populo , & qua plurimum polletis apud Deum gratia , eum ſedulo juvate . Peſtilentiam ſaltem , & barbararum nationum vim , bellaque avertite , variasque cæli injurias longe a civibus prohibete : ipſi a nobis induſtria noſtra , ac navitate famem propulſabimus , noſtroque labore procul arcebimus egeſtatem ; valeant Cives , ſint incolumes , ſint florentes , ſit illa Civitas , quæ principibus Civitatibus , ut æquum eſt , ſemper ultro ceſſit , æquales ibenter tulit , cum inferioribus non arrogantibus le exæquari paſſa eſt non invita . Incredibilem in ſinodum , Judices , nunc frequens , ac celebris eſt noſtra Civitas , non in foro , publiciſve lociſtantum , verum etiam omnibus viis , vicisſque , & angiportis ubique maximi virorum , & mulierum conventus , puerorum præſertim ultro citroque diſcurrentium , tantaque paſſim copia , vis , & numerus , ac multitudo civium omnium generum , omnium ætatum , atque omnium ordinum , viri , ac mulieres omnis fortunæ , & loci , ut continenter tota die perpetuum quaſi agmen huc illuc procedere putes , magnamque credas Italiæ partem ad mercatum effuſam huc conveniſſe . Videre eſt quotidie plenum , & refertum forum , repleta omnia Tempſa , tabernæ opificum , & apothecæ frequentiffimas , omnes gradus baſilicarum ab omni  
Givi.

Civium ordine compleri. Taceo cum septima quaque die ex oppidis vicinis, vicisque, ac pagis in agro nostro dispositis ad statum mercatum convenitur, qui concursus, quæ effusiones ex omnibus agris fiant; non si ipsa se Papia convulsa sedibus suis, conflataque tota in homines transmutet, poterit minimæ parti tantæ celebritatis respondere, eritque nihilominus præ tanta frequentia mira solitudo; mitto istos mercatus, ac nundinas; omnes Dies hic putes quasi Divorum immortalium festos atque solemnes celebrari. Nondum de selectis nobilissimorum, ac principum Civium conciliis, ac conventibus, quas sodalitates vocant, mihi instituitur sermo; reservo hanc Orationem ad illum locum, cum de Civium nostrorum humanitate, atque hospitalitate verba faciam; id autem nunc affirmo, & audacter dico, nullam Urbem in Italia pro capto esse frequentiore, ac magis celebrem. Non vos latet, Judices, Cremonam non esse mœnium ambitu admodum spatiosam, sed potius civium numero, quam murorum circuitu amplam; & ne diutius vos morer, præsentis ætate, post concursum tantarum calamitatum, post tot acerba, & diuturna bella, toties variante fortuna, benignitate Dei optimi Maximi Cremonensis populus censetur adhuc supra XL. millia Civium. Quam vero frequens hominum quoque sit ager noster, ex agrorum ipsorum cultura quivis facile judicare possit. Tu in primis tamen, Gonzaga Ferdinande, hujus rei optimus arbiter esse potes, cui sæpissime contingit Cremonam divertiri. Memini equidem

dem olim cum te a nobis abeuntem Mantuam  
 versus aliquot stadia profecutus fuisset, mihi cum  
 admiratione quadam dixisse, videri tibi agrum  
 Cremonensem totum ubique quasi perpetuum su-  
 burbium, & id quidem, cum ob cultionem, tum  
 ob hominum frequentiam: admirabaris mecum  
 tot vicos, tot pagos, castella quoque, & tam fre-  
 quentes villas, domos, ac tabernacula, cum vi-  
 deres incredibilem hominum vim, ac copiam ubi-  
 que obviam, fierique ad Te undique mirificos  
 concursus, plenis viis, maxima vociferatione,  
 atque applausu, nec poteras satis admirari tantas  
 hominum ex villis, atque ex omnibus vicis effu-  
 siones, meminique me tunc tibi hac occasione  
 dixisse, hac ratione intelligere, quod in sacris  
 Hebræorum literis incredibile, & quasi fabulosum  
 videtur, Ninivem civitatem apud Assyrios tantæ  
 longitudinis describi, ut vix trium dierum itinere  
 queat pertransiri, fuisse, inquam, in eo tractu tam  
 frequentes Domos, & pastorum tabernacula, agrum-  
 que ita habitatum, ut speciem ubique cujusdam  
 magnæ urbis præberet. Jam vero dimissa tandem  
 de frequentia disputatione, ordo earum rerum, de  
 quibus mihi differendum in comparatione initio  
 actionis proposueram, interpellat, ut de censu, at-  
 que opibus, & fortunis utriusque Civitatis dispu-  
 tare ingrediar, facultatesque amborum populo-  
 rum invicem conferam.

Video hic, Patres, vestrum aliquos frontem  
 contraxisse, quasi de re minime necessaria, ac per  
 se illustri me loqui velle non admirentur modo,  
 sed etiam stomachentur, quasi velim conferre ege-  
 sta.

statem, inopiamque omnium rerum cum copia, ac saturitate. Oratio nostra ( fateor ) huc invitata prolapsa est, quando etiam cives mei hanc partem, aut omnino relinquendam, aut pudenter, admodum, & levissime tangendam monuerunt re magis, & sua facultate freti, quam Oratoris copia, ne unde nobis invidia conslari possit, videremur de fortunæ beneficiis intoleranter gloriari, & inde Civitati nostræ commendationem eam ducere, quæ possit esse etiam sine virtute, cum majores nostri illam solam commendationem, & laudem appetendam esse semper duxerint, quæ esset ad gloriam: dicam tamen, Patres, libere, quod hacce de re sentio. Licet semper sanctitate disciplinæ ornamenta Patriæ in virtute, & industria posita habuerimus, attamen etiam fortunæ benignitatem non aspernamur, gaudemusque aliquam fortunam consecutam fovisse ingenii, ac virtutis nostrorum hominum præstantiam, nec divitias omnino contemnimus, quas etiam ab antiquissimis Romanorum sapientibus viris bonæ dictas fuisse comperimus, cum boni in abundantia divitiarum possint esse meliores, quod opes ipsæ virtutis exercendæ largam, opportunamque materiam præbeant plurimisque gratificandi facultatem. Neque ullo pacto rei familiaris amplificationem parvipendendam esse duco, modo opes nostræ non tantum nemini noceant, sed etiam potius, ut bonitatis instrumentum communi utilitati serviant; modo, ut breviter dicam, magis animus noster sit dives, quam arca, divitiasque expetamus, habeamusque magis, ut sint ornamenta ingenii, quam  
ad



ad voluptates perfruendas. Parum esset, fateor, si Civitas nostra esset tantum opibus firma, copiis locuples, & divitiis affluens, nisi foret etiam gloria ampla, & virtute honesta, sicut majores nostri præclare ab initio fundatam eam nobis reliquerunt: quod etiam Aristoteles vir acutissimi ingenii sensisse videtur, ubi dixit, opulentioribus doctrinam, atque nobilitatem magis adesse convenire. Antequam ad hæc aggrediar, Judices, mihi pleniore voce præfandum est, meos Cives haud plane credere Papiensibus res esse ita tenues, atque attritas, ut ipsi videri volunt, quo se subducant oneribus, quæ propter ærarii angustias publice civitatibus Provinciæ interdum imponuntur, quove minimi censeantur; aut si est eorum res, & fortuna, ut prædicant, id omne ipsorum ignaviæ, atque inertię ascribunt. Neque agrum illum censent esse adeo sterilem, atque jejunum, quem si colerent non ad ubertatem elicerent. Ego tamen in hac fortunarum disputatione, ne adversarii exostulent, & conqueri possint omnia dicam ex animi eorum sententia, quod etiam servavi cum de utriusque populi frequentia agerem, nec per me deerit, quin, dum pauperes velint videri, sint etiam pauperrimi; usque eo, ut omnibus mortalibus, ne dum miserandi, sed etiam sint ostentui, modo sit ex ipsorum re, idque eos ita delectet more mendicorum, qui stipem a prætereuntibus expectantes, denudato ulceribus obfesso corpore morbum de industria alere creduntur ad plurium hominum misericordiam, & opes accipiendo, felicesque, ac fortunatos tunc se ducunt,

rent, si nacti essent teterrimum aut crus, aut brachium immortalis, atque insanabili ulcere deformatum, qualem fuisse Philoctetæ pedem in fabulis narratur, semper tabo, & sanie, multaque illuvie fluentem; usque adeo mendicitatis semper conjuncta est aviditas. Male mihi sit, nisi me eorum miseret, quos nihil invidi relinquamus in sua egestate fortunatos, ac triumphantes. Non sunt, Judices, opes nostræ, neque invidiosæ, neque nimium tenues, sed omnino mediocres, satis non tantum ad victum, sed etiam ad cultum domesticum pro cujusque conditione, & splendore suppetentes, huic nimirum imperio semper paratæ, atque expositæ. Experiris quotidie, Gonzaga, quo Civitas nostra majoribus opibus sit nixa, eo Cæsari magis opportunam se præbere, nostrasque fortunas, quæcunque sint, semper ad publicam utilitatem redundare. Non dico nobis pecuniæ esse affatim, quantumve interdum opus esset reipublicæ, cum sæpe impendeant infiniti sumptus in angustiis ærarii, in summa difficultate nummaria; sed quantamcumque habemus, semper huic imperio promptam, sine ulla recusatione, sine ulla mora, aut retractatione damus, tribuimus, solvimus. Quando Cremona pecuniam imperatam non ad diem enumeravit? sed quid pecuniam tantum? frumentum, milites, remiges, arma, tormenta, vecturas? Quando id, quod per se sensit opus esse, in reipublicæ subsidium non ultro pollicita est? Quando id, quod imperatum fuit, solvere etiam facta versura recusavit? privati etiam mediusfidius non inviti sæpe auctionem faciunt, domos, fun-

fundos proſcribentes, ut Cæſari pecuniam ſummi-  
niſtrent, cum propter ærarii tenuitatem omnes  
provinciæ Civitates, omnes præfecturæ, atque co-  
loniæ præſtant vicem ærarii, pecuniam quaſi de-  
bitam diſſolventes. In propulſandis Cæſaris, rei-  
publicæque periculis omnia profundimus, dantes  
quicquid promptum habemus, argentum, veſtem,  
ſupelleſtilem, & quæcumque ad uſum militarem  
pertinent; huc non modo omnia conſilia noſtra,  
ſed etiam opes referuntur. Hæc eſt illa Civitas,  
quam Imperatores noſtri ſemper armorum, anno-  
næque perſugium eſſe dixere, quam ſemper non  
tantum pro cella penaria huius Imperii, ut de  
Sicilia ille dixit, ſed etiam pro ærario habuere,  
quæ pignora voluntatis noſtræ erga Cæſarem cer-  
ta eſſe debent. Superioribus quoque annis, quod  
erat e re ipſius Cæſaris, frumento ſuppeditato  
inopiam Papenſium, & famem ſublevavimus, quod  
tamen a me hic dictum ſit non exprobrandi be-  
nificii eis gratia. Hæc cum ita ſint plane mani-  
feſta, ut negari non poſſint, ajo in hac noſtra  
contentione honoris, ac dignitatis oportere com-  
munis utilitatis haberi rationem, illamque Civi-  
tatem omnino anteferendam, quæ magis utilis eſt  
reipublicæ, atque opportuna, ut quibus ſummum  
onus imponitur, ad illos etiam ſummus honos  
perveniat, quæ lex non tantum eſt ſcripta, ſed  
etiam cum ipſo hominum genere nata, & in ipſa  
natura infixæ. Inſpiciendum eſt igitur utri majo-  
ra veſtigalia, quibus imperium potiffime nititur,  
ærario penſitent, utra Civitas tot annos in tanta  
rei nummaria difficultate magis reipub. ſublevave-  
rit;

rit; appellandi mihi sunt publici Quæstores Provinciarum; afferantur tabulæ publicæ recensionis, vectigaliumque omnium Civitatum Mediolanensis imperii, tabulæ item aliæ, in quibus habeatur ratio publicæ pecuniæ tot annorum datæ, acceptæ, atque relatæ **TABULÆ VECTIGALIVM CENSUSQUE TOTIVS PROVINCIÆ**. Ex hac tabularum lectione, Patres, videtis, non solum omnium vectigalium, sed etiam publicæ recensionis totius provincie impressam memoriam, ne quis tergiversari valeat. Jam omitto in controversiam, & quæstionem vocare utra Civitas in angustiis ærarii promptius, ac paratius pecuniam imperatam subministret, sed quærendum utra largius, atque unde majoribus subsidiis semper fulta fuerit respublica, ab istis ne, an potius a nobis. Videtis igitur a quæstoribus provincie in singulos annos pecuniæ vectigalis plerumque supra HS quinquagies exigi a Civitate nostra, a Papiensibus vero quasi decussatim dimidio fere minus. Clarius etiam fore propediem speramus ex census tabulis si diligenter, & æquabiliter confectæ fuerint, ut fieri cæptæ sunt, utri quod utrique superiorioribus annis imperatum ex censu debuerant, probius, & sanctius, magisque ex fide bona solverint; interdum quoque ante tempus, biennis nondum debitum a publicanis pecuniam vectigalem repræsentavimus. Videtis etiam, quid relatum sit in tabulis quotannis ex utriusque Civitatis pensitationibus ( loquor de pecunia imperata tam secundum census tabulas, quam in capita, aut in familias præter urbis vectigalia perpetua ) quantove majora sub.

subsidia semper reipublicæ attulerimus, quam Papientes; id unum hercle facile de controversiis nostris judicare posset, finemque liti imponere: æquum profecto esset, Papientes, quanto minus opum, viriumque in vobis esse sentitis, tanto vos minus habere arrogantia, & iis, qui vobis opibus longe ante eunt, ultrocedere. Neque ego hic census vestros requirerem, si vos intra cancellos modestiæ continuissetis, rerum vestrarum finibus contenti, neque ad explicandum opes nostras oratione descendissem, ut feci, omissa tamen amplificatione, cum Cives mei, ut centies memoravi, potius hæc pudenter, & parce, exigueque tangi a me velint, nisi eo usque vos provexisset arrogantia, ut cum egentissimi sitis, vos tamen cum honestissima Civitate conferre, atque adæquare auderetis, ut intelligant homines, pauperes cum sitis tam insolentes, opulenti quales essetis. Vobiscum sane recte agitur, quod vobis sint opes tenues, & infirmæ, afflictæque fortuna, nec ut alii populi faciunt, malis occurrentes industria vos metipso sublevare nitimini, sed oscitantes in calamitatibus tabescitis, ut sitis ostentui omnibus populis. Si res vestræ integræ essent, atque florentes, quamvis non multo meliore esse possint loco propter agri miseri, atque jejuni sterilitatem, ut vos metipsi prædicatis, quæ Civitas vicina posset ferre vestros spiritus? quanta esset vestra arrogantia? neque ego hic, Papientes, vestri irridendi studio paupertatem vobis obijcio, sed potius officio modestiam, atque æquitatem vestram requiro. Deus optimus maximus Civitatem

vestram fortunet, & vobis sint opima omnia, futuritateque, & copia omnium rerum redundant, modo ne cum copia crescat simul arrogantia; neque velitis de amplitudine cum eis Civitatibus velitari, quibus cedunt etiam illæ, quæ sunt in aliquo numero. Vobis profecto res sunt alioqui semper tenues, atque exiguæ propter solum exile, & macrum: hoc tempore etiam existunt fluxæ, atque prolapsæ propter diuturnitatem perniciosissimi belli, quod superioribus annis exarsit in tota Provincia. Nemo fere apud vos est, cui non sit adhuc res familiaris fracta, dissipata, atque direpta, nihil usquam egentius, nihil spoliatus; non dico nihil vobis lautum, nihil elegans, nihil exquisitum, ac sumptuosum ad splendorem, & amplitudinem, sed ajo, affirmoque, vobis rem deesse ad necessaria; miseros nos, quibuscum egentissima natio audet se conferre; Dixi modo, urbem vestram infrequentissimam; si qui tamen in ea apparent, rari illi quidem, & præter hospites, fere omnes pannosi, atque agrestes semper nescio quid oppidanum, semipaganumque redolentes, egestate conflictati. Jacent apud vos pretia prædiorum; nulla, aut rara, & minime exquisita agricultura, nulla mercatura, nulla ars, nulla industria, iccirco utimini semper anguste re familiari; desinite inopes, deformatique ærumnis, miserisque cooperiti, alienam opem exspectantes, rerumque humanarum spectaculum facti, de principatu certare velle cum Civitatibus honestissimis. Stomachantur; mihi credite, omnes boni, cum audiunt aliquem, qui nullo in numero sit,

con-

contemptissimum, egentissimum, inopia omnium rerum miserabilem, insigniter tamen arroganter cum præclarissimo quoque, ac summo de honore, ac dignitate contendere. Quid, quæso, sentire de modestia vestra putatis homines, cum vident municipium sine re, sine spe, sine fide cupere tamen se adæquare locupletissimæ populi Rōmani Coloniz, quæ semper opibus, & copiis floruerit, floreatque etiam nunc, & affluat ad saturitatem, ubi splendent omnia, ubi luculenta, ne dicam summa omnia, unde rerum egregiarum cuncta sumi possint exempla, quæ copia omnium rerum abundat, cui tum soli bonitate, tum hominum industria nihil earum rerum deest, quæ opus sunt non tantum ad victum, sed etiam ad cultum, vitæque splendorem, atque nitorem, cui res, & pecuaria, & rustica, ex omni parte est sane bene culta, & fructuosa? Nisi hic vererer, offendere animos meorum civium, qui istæc a me, ut jam sæpius inculcavi, aut leviter tangi, aut omnino omitti malebant, contenderem, nullam terram in Italia reperiri alimentorum feraciorē. Habet Cremona frugifera, & ferta arva, magnam vim frumenti, vini, mellis, lini inprimis mollissimi, ac lanæ pretiosæ. Excellit longo intervallo opima, & fertili ubertate agrorum, varietate fructuum, magnitudine pastionis, multitudineque earum rerum, quæ exportantur; ad soli opimi ubertatem accedit hominum industria, navitasque; quibus desunt latifundia, dant operam mercaturæ, & quæstus faciunt haudquaquam sordidos, sed magnos, mediusfidijs, atque uberes.

neque enim apud nos, qui habent pecunias, eas enumeratas in arca comprimere solent, sed aut in nominibus habent, aut in mercibus collocatas compendii causa tenent navi, atque industrii, & sui negotii bene gerentes. Hinc civibus fere omnibus, non tantum principibus Civitatis, sed etiam secundo, & tertio loco natis, multa, & lauta supellex, vis magna argenti, vestisque tum stragulae, tum ad corporis tegumentum, omniumque rerum, quas vitae politioris cultus poscit, abundantia, & copia. Videas ubique in urbe aromatum, caeterarumque mercium peregrinarum apothecas refertissimas, omnesque opificum officinas copia redundare. Et quoniam concedunt etiam gravissimi Philosophi, opes esse expetendas ad vitae honorificentiam, cultumque tum publicum, tum etiam privatum, atque domesticum, cives nostri semper privatam luxuriam oderunt, diligunt publicam magnificentiam; cui licet in publicis muneribus studeant, potiusquam in vita quotidiana, atque assidua, non tamen in quoquam requiras etiam splendorem pro fortunis, ac celebritatem domesticam, in quo potius laudes elegantiam, & industriam, quam sumptum. Si quando tamen sumptus transcendere videntur modum in apparatione domestici victus, ac cultus id saepe evenit quod nostri Cives maxime hospitales sunt, & in externos liberales. Habita semper fuit ubique Cremona Civitas multorum hospitum, qui nusquam liberalius tractantur generosa quadam animi magnitudine, natura omnium fere animis insita. Neque apud nos ullus est, qui  
hos.



hospitem a se non bene acceptum dimittat. Cuncti quæcumque habent cum amicis libenter communicant. Quæ res sæpe causa fuit ut viri gravissimi Civitatis ad rogationem Legum sumptuariorum recurrerent, easque olim promulgatas, mox paulatim antiquatas renovarent, ne in privatum usum extra modum sumptus prodeant, nunc funerum, & sepulcrorum, nunc nuptiarum, & parentalium, cæterorumque conviviorum, atque epularum sumptum, magnificentiam quoque vestium, & ornamentorum, tam marium, quam sæminarum luxuriam coercentes. Hinc fit, ut omnem alti, ac generosi animi splendorem in popularium munerum magnificentiam, & sumptum transferant, imprimis in supplicationibus Divorum sumptuosi; in excipiendis vero Regibus, & Magistratibus nulli æquali Civitati magnificentia, & apparatione cedunt. Tunc forum, tunc omnia templa, & delubra, omnes viæ atque omnes urbis portæ ornatu magnifico adornantur, honorifica totius Civitatis ostentatione, auro, argento, ebore, veste, magnificis operibus interpieta, pretiosaque, & plena artis, affabreque facta supellestile, tabulisque, & signis lautissime pictis. Tunc Leges sumptuariæ omnes silent. In adventu Regum ipsorum Cives nostri sibi gaudent oblatam occasionem exercendi, ostentandique in hospites, cuique in suum liberalitatem, generosamque animi amplitudinem. Et cum jubentur a Magistratibus dari hospitibus, qui Regem assequuntur, nihil præter restum, lectumque, & lintea, cæteramque supellestilem, illi addunt ultro abundanter, non tantum.

sænum, ligna, & quæ lege Julia militibus dari solent in hybernis, verum eos omnibus rebus sua impensa lautissime accipiunt. Quid dicam de Juventutis nostræ apparatusissimis, magnificentissimisque ludis sub lupercalibus diebus? videas cum-ctas Civitatis principes familias, quarum copiosa sunt, & lauta patrimonia in edendo suo quam-que munere occupari, omnesque eniti summis opibus, ne alia ab alia splendore superetur. Nihil uspiam alibi præclarior, nihil luculentius; omniaque cum elegantia, & copia. Atqui ista quidem levia sunt, & ludicra, parum etiam fortasse digna, de quibus in hoc loco, in tanto, tam-que illustri hominum conspectu tantopere verba facerem. Verum provocatus insigni adversariorum impudentia non potui me continere, quin contra Civium meorum præscriptum de iis quoque rebus, quas minimi facimus, aliquid dicerem, ne de cætero copia cum egestate configere cogere-tur. Porro hic verum esse, quod vulgo ajunt, expertus sum, unum hominem, qui insaniat, satis uberem materiam sufficere, ut plurimos insa-nire faciat. A me illa potius dicenda erant de nostrorum Civium erga indigentes, qui alienas opes expectant, nescio dicam ne liberalitate, an potius benignitate, aut pietate, quanta diligentia semper usi sint, ut in Civitate vilitas annonæ aut fieret, aut remaneret, ne quis frumentum, cæterasque fruges compressas teneret, sed quod quisque habet venale exponeret, quanta impensa, atque industria in Caritate annonæ comportari aliunde frumentum proposito mercatoribus præmio pro-

procurent quod egentibus abunde suppedirent, ut sæpe ex summa inopia, rei que frumentariæ angustia maxima illico vilitas consequatur, præter publicæ diversoria, quæ apud nos ad antiquæ Religionis rationem & plurima instituta sunt, & opulentissima, unde homines, qui aliorum misericordia vivunt, alimenta petere possint. Et ut obiter in omnibus Orationis partibus de optimis majorum nostrorum institutis, deque optimarum Legum, morumque, & disciplinæ sanctitate sparsim agam; quod unum erat ex illis septem, quæ initio actionis proposui; cum res frumentaria durior est facta, cæpitque ingravescere annona, publico instituto habentur egentium delectus, etiam nolentes coguntur tanquam milites quasi per decurias vicatim sacramento nomen dare, quicunque sunt afflicte fortunæ. Ubi vero quotquot reperiuntur in Civitate inopes generatim conscripti centuriatique fuerint, ditioribus omnes adscribuntur, commendanturque distribute alendi, quotquot quisque non incommode, aut gravate alere possit, habita census, & cuiusque fortuna um ratione, quos alacres omnes accipiunt sine ulla recusatione, aut excusatione. Hoc nexu in familiis nostris tanquam ascriptitii aluntur interdum, atque etiam, si eis placet, nobiscum pernoctant, donec ubertate agrorum vilitas annonæ consecuta fuerit. Cavent etiam summopere Cives nostri, ubi in angustiis ærarii onera, ac pecuniæ Civitati imitantur, ne exigantur per capita, quod semper nostra Civitas iniquissimum duxit, abhorruitque, sed ex censu potius, & quod ajunt, per æs, &

libram, fieri exactionem probant. Si quando tam  
mendurissimis temporibus summa cogente diffi-  
cultate nummaria, impendentibus infinitis sum-  
ptibus a provinciae quaestoribus in capita, & fa-  
milias imperatum fuerit, cum etiam e sanis pec-  
cuniae tolluntur aperto sanctiore arario pro illis;  
qui propter afflictam fortunam solvere non pos-  
sunt, ditiores inter se onus inopum fere semper  
partim suscipiunt, ex censuque libenter iterum con-  
ferunt, quidquid residui debetur ipsis egentibus  
stipem elargientes, unde, si velint, quo sese ipsi  
dissolvant, ne forte si exactoribus pro aliis ditio-  
res semper parati penderent magnam mancipum  
avaritiae ansam praeberent adversus eos, quorum  
inopiam, atque imbecillitatem sublevare student.  
Non minori fere liberalitate, ac pietate Civitas  
nostra prosequitur Sacerdotes, qui rebus divinis  
praesunt, sacrificiaque tam privata, quam publi-  
ca, & religiones, sanctitatesque, quae sunt in mo-  
re majorum interpretantur, & nobis Deum placatum  
sanctimoniis reddunt. Nunquam cogunt eos  
tributa cum populo pendere. Militiae, militario-  
rumque munerum vacationem, atque omnium re-  
rum immunitatem libenter tribuunt. Neque eos  
tabulis profreri, censere, neque eorum praedia  
esse, ut caetera, vectigalia, tributariave patiun-  
tur. Hinc equidem crediderim potissimum fieri,  
ut Deo optimo maximo, cujus est rerum huma-  
narum procuratio, respiciente ad hanc propensam  
Civium pietatem, omnia fere semper prospere  
procedant, secundaque eveniant, & quidquid agen-  
dum instat, bene operam ponant, remque pluri-  
mum

num ex sententia gerant, & omnia eis eant secundo fortunæ flatu, plus plusque in dies opum, & virium addatur. Hinc Civitatis prospera semper, & quasi æquabilis perpetuaque fortuna tot annos duravit. Si tamen, eadem fortuna paulo variante, aliquando in duriuscula tempora incidimus, Diis volentibus, juvantibusque, & menti Civium semper lumen præferentibus, statim emergimus, & ad pristinum statum, fortunamque revertimur. Neque nobis profecto adversarii nostræ statum, hanc opum, ac copiarum mediocritatem repentinam esse, novamque, & nunc primum Cæli favore nobis esse constatam, cum ab ipsa quasi urbis origine semper fuisse Cremonam in aliquo numero compertum habeamus locupletissimorum scriptorum perpetuo testimonio. Superius Polybii, Liviique, & aliorum historiam scribentium monumentis clarum esse demonstravimus, tempestate Annibalis Poeni, Cremonam, cum primum deducta fuit a Romanis Colonia, jam tum fuisse fortunæ muneribus amplissimam, omnibusque rebus auctam, atque ornatam. Cornelius Tacitus quoque agens de temporibus Vitellianis cum dixisset, Cremonam tunc forte confluisse magnam partem Italiæ stato in eisdem dies mercatu, subiicit, tempus quoque mercatus ditem alioquin Coloniam majorum opum specie complevisse, urbem deinde militibus, Flavianis Antonio duce post longam obsidionem captam, atque direptam ad prædam totum quadriduum suffecisse refert. Quantum præterea opibus, & copiis ea Civitas redun-

redundet præ Papiensium municipio, vel ex facie ipsius urbis cognosci potest, in quo ipso etiam est quædam quasi dignitas, cum speciem regalis prope Metropolis præbeat, ut hinc quoque se nobiscum Papienses minime conferre possint. Principio optimo loco sitam esse liquet. Est enim, ut omnes non ignorant, inter Padum, & Ollium flumina, præterfluentibus etiam aliquam partem ejus agri Adua, & serio, in mediterraneo tractu, locis campestribus, lata planitie, atque æquabili, tantum remota a Mari, ut a piratis sit tutissima, neque tamen Maris commoditatibus omnino careat, quod Padus nobilissimus Italiæ amnium muros alluit, & in Mare superum multis amnibus auctus influit, per quem variæ merces adverso flumine maximis onerariis, actuariisque navibus ad nos comportari possint. Tanta, & Cæli, & soli clementia, ac temperatione, ut divina quadam vi optima hominum acutissimorum ingenia, ut infra demonstrabimus, semper produxerit, producatque in dies magis, ac magis. Porro est natura, ac situ non tantum communito, sed etiam ad aspectum præclaro, conspicua descriptione ædificiorum, & pulcritudine in primis nobilis, ut nemo sit, qui ad primum aspectum non exclamet, præclaram, jupiter, ac plenam dignitatis urbem! præclare sane ædificatam eam ubique est videre pro regionis facultate, & natura; est enim ferme tota lateritia propter difficultatem vesturarum, quod procul a nobis sint montes, & saxeta. Sed ex lateribus affabre sectis, & expolitis visuntur ubique præclara ædificia tam privata,

ta, quam publica. Dicite per Deum, Papienses, quid potestis in municipio vestro conferre cum arce illa nostra munitissima, atque inexpugnabili, triplici muro circumdata, ubi tot, & tam firma Castella, & propugnacula, ubi tot aenea variz magnitudinis tormenta, tot refertissima armamentaria, tot machinz, totque instrumentorum bellicorum officinz? Hanc unam arcem Franciscus Sforcia II. vir acutissimus vocare solebat sui imperii firmamentum. Quid quæso, Papienses, vestrz urbis conspicuum, atque ostentatione dignum commemorare potestis, cum nos plurima præclara habeamus, & inter illa quidem aliquid non modo rerum omnium præstantia excellens, sed unicum plane, & singulare? Video, Patres, adversarios meos subridere, & inter sese obscura susurratione mihi innuere, se expectare, ut quamprimum aliquid de nobilissima illa Pyramide, qua nullum usquam opus visendum magis reperiri possit. Hic faceti haberi volunt, risuque ineptissimi dignitatem rei, quæ nullam habet comparisonem, detrahere conantuntur. Ea si extitisset temporibus antiquorum Græcorum, cum vigeret eloquentia, arbitror addidissent octavum septem mundi mirabilibus, aut fortasse detracta ab eo numero Pharo, quæ erat in Ægypto, septimi miraculi loco haberi potuisse, cum longe antecellere existimetur quicquid unquam uspiam turrium fuerit magnitudine operis, proceritate, firmitudine, forma, atque artificio. Decreveram, Patres, id opus nobilissimum ad totius Orbis terrarum miraculum spectaculumque factum, tacitum præterire. Ducebam enim satius il.

illibatum omnino relinquere, quam de eo pauca  
 dicere, cum opus per se sit toto terrarum orbe  
 fama celebratissimum. Verum adversariorum scur-  
 rilitas hæc utcumque me dicere adegit, ut suam  
 huic confessui detegerent insulstatem tam abs re  
 cavillati. Poteram equidem hanc, & complures  
 alias turres eis remittere cum plurima alia ædifi-  
 cia tum publica, tum privata non infabre stru-  
 cta nobis suppetant, quæ illis opponere possemus;  
 forum maximum, pulcherrimæ porticus, amplis-  
 sima Curia, publici Consilii sedes, Templum præ-  
 clarum urbis maximum, cæteraque divorum im-  
 mortalium fana, ac delubra, non modo antiqua,  
 sed etiam recens constructa, & nunc etiam sur-  
 gentia ad antiquorum Græcorum laudem, signis  
 quoque, & tabulis, ebore, auro cælato, & ar-  
 gento, corinthiisque operibus ornatissima. Præ-  
 toria item duo vetustissima, basilicæque amplis-  
 si-mæ Regibus hospitio suspiciendis destinatæ. Ad  
 hæc, præter delubra sanctissimis Religionibus con-  
 secrata, ædes sacræ visuntur præclarissime ædifi-  
 catæ, ubi variæ Sacerdotum sectæ vitam cælibem  
 ducunt, homines a vulgari vita sejuncti, atque  
 semoti, sacrisque voto perpetuo alligati, commu-  
 nia omnia habentes, religionesque, & sanctitates  
 a majoribus nostris adinventas tuentur, traditas-  
 que a Pontificibus sententias, atque opiniones di-  
 vina quadam reconditarum literarum scientia in-  
 tégas, intactasque custodiunt. Cernuntur nunc  
 etiam fundamenta præclarissimi gymnasii barbaro-  
 rum variis injuriis diruti. Vidi ego quoque ipse  
 vestigia quædam illius antiquissimi, nobilissimique  
 templi



templi Mephtis Deæ, cui uni ante mœnia posito pepercisse flammam Cornelius Tacitus refert, cum urbs omnis concremata a militibus Flavianis concidisset. Existimatur etiam reliquias apparere illius amphitheatri, ad quod extruendum paulo ante relictos fuisse Cremonæ milites Othonianos idem Tacitus scribit. Post ædium Sacrarum, publicorumque Operum ædificia non sunt contemnenda privatorum domicilia non tam opere, aut arte insignia, quam usu, & habitatione accommoda. Quippe, quæ parentes nostri, majoresve nobis constructa reliquerunt non sunt ita laure fabricata, uti ea, quæ his temporibus ponimus. Nunc enim strenue ædificatur apud nos Græcorum artibus, atque præceptis, fiuntque omnia ad antiquorum rationem propter copiam hominum nostrorum, qui ea optime callent, ut infra dicemus, cum de Civium nostrorum ingeniis, artibusque agemus. Nulla via, nullus vicus, aut angiportus tibi occurret, in quo non admireris speciem regię urbis: memini olim, Patres, vestrum aliquos, qui in ea Civitate fuistis cum prætoria Potestate, mihi dixisse, sibi eam urbem videri quodammodo exiguum simulacrum, & instar Mediolani. Ea insuper studia ædificandi in Civitate nostra nunc esse conspicio, adeoque civium animos esse accensos, percupidosque certatim in Patriam congerendi omnia ornamenta, ut intra paucissimos annos sperem eam futuram urbem, ubi omnia rerum excellentium exempla invisantur, modo oriosa, & pacata in hac pace, & tranquilla libertate permaneat, quam nobis promittere videtur

tur Cæſaris incredibilis, eximia, ac divina virtus, qui omnes ſuas cogitationes, omnia ſtudia, omnem operam, mentemque omnem in republica conſervanda, amplificandaque jamdiu fixit, qui toties barbarorum impetus crudeles, ac furibundos ſua virtute retardavit, totiesque dimicatione, ac periculo vitæ ſuæ immanem, ac ſædam hoſtium crudelitatem a jugulis noſtris avertit, dignus poteſtate, & omnium rerum dominatu. Quibus verò urbs noſtra operibus, munitionibusque antiquitus ſepta fuerit, non eſt quod hic elaborem, cum adhuc firmiſſima mœnia durent, interque Italiæ munitiſſimas urbes habeatur Cremona, tenuique præſidio, atque exigua manu defendi poſſit, operibus, ac munitionibus ſatis per ſe tuta. Dixi etiam ſuperius de agri optima cultura, cum de ubertate terræ in contentione, & comparatione utriusque regionis diſſerui. Adde amœnitatem, & ſalubritatem illius tractus. Quis poſſet Oratione pro dignitate complecti tot irrigationes, quibus Papienſes omnino carent, tot prata, tot rivos, tot amœniſſima vireta, tot quaſi urbanas Sylvas, fructuoſiſſima pomaria, ubi ſelectæ, ac generoſæ arbores, e diverſis, longinquiſque mundi partibus aſcitæ, optimaque ratione in quincuncem poſitæ non tantum ubertate fructuum utilitatem, verum etiam ad aſpectum voluptatem præbent. Ubi quæſo, terrarum vineta, & arbuſta, quæ gallica vocant, rectius diſpoſitiſſe, atque deſcriptius diggerunt? quid de villarum laute ædificatarum commoditate ſimul atque elegantia? Id unum in ſumma dictum voſo, ruſ ipſum Civitatis dignita-

ti præclare respondere. Jam videtis, Iudices, quantum Cremonenses Papiensibus præstent urbis antiquitate, originis nobilitate, frequentia civium, censu, opibusque, & plurimarum rerum copia, soli ubertate, atque felicitate, urbis amplitudine, & splendore, ædificiorumque, & operum magnificentia, plurimisque munitionum prædiis, quibus omnibus rebus Cremona Papiam longe inferiorem esse demonstratum fuit iis, quæ hætenus a nobis disputata sunt diffusius fortasse quam necesse erat: nihil tamen extra causam a me dictum arbitror, cum mihi retundenda esset eorum arrogantia, atque insolentia, qui suam novitatem, ignobilitatem, solitudinem, inopiam, squalorem, cum antiquitate, nobilitate, frequentia, opibus, splendore honestissimæ Civitatis tam intoleranter ausi sunt conferre, nihil veriti hominum iudicium. Aliqua etiam interdum inspersimus de Civitatis nostræ moribus, optimisque legibus, & majorum institutis, quibus auditis adversarii, si naturæ communi, ac vulgari sensu uterentur, non me ulterius progredi sinerent, sed deposita superbia, atque audacia iis contentionibus inposterum finem facerent, & socias civitates quiescere in otio permetterent, dimoverentque a nobis hanc totam molestiam. Restabat ut in collatione utriusque Civitatis differerem de iis, quæ posita sunt in sola virtute, a qua omnis recte factorum oritur gloria, nam in iis, quæ superius memoravimus, tenet aliquam partem etiam fortuna, licet pleraque tam urbis, quam ruris ornamenta constare

stare non possint sine hominum vi, atque industria. At vero quoniam virtutis ipsius nomen late patet, plurimaeque mihi dicenda sunt in comparatione praestantium virorum utriusque Civitatis in omni virtutum genere, ut ratio occupationum vestrarum a me aliqua habeatur, ceteram omnem orationem ab hujus dici actione sejunxi, & in crastinum rejeci.





## CREMONENSIUM ACTIO SECUNDA.

*Adversus Papienses in Controversia  
Principatus.*



Uoniam, Patres, in iis rebus, quibus hesternæ actione planum feci, Civitatem nostram Papiensi municipio longe præstantiorem esse, fortuna aliquem locum obtinet; ne Papienses objicere possint nos commendationem querere solum ab iis, quæ non sunt nostri, neque juris, neque arbitrii, sed quæ videntur posita esse in fortunæ libidine, quam Philosophi insanam esse, cæcam, & brutam prædicant, saxoque instare perhibent globoso, atque volubili, & ubi collibuerit, repetere ab hominibus ea, quæ dedit, sæpiusque ad nutum summa fundo vertere; infimæque in altum tollere, & pro libidine tandem omnia exæquare, possem remittere, & condonare adversariis omnia, quæ proxima Oratione de opibus, ac rerum copia differui, quamvis majores nostri præsertim Jurisconsulti, sapientissimi viri uno verbo omnia compen-

F

dii

dii causa complexi, bona, ut diximus appellarunt, summi quoque Philosophi, ut Xenophon, & Aristoteles libros conscripserunt de re familiari tuenda, quæ ab homine non est contemnenda, dum tamen sit ministra, & corporis famula; eis etiam condonare possem eorum urbem a nostra facile antecelli tam antiquitate originis, quam conditorum nobilitate, longeque civium, & incolarum frequentia anteciri, nec tantum eos opibus, ac copiis, verum etiam splendore, urbisque amplitudine, & operum magnificentia multo esse inferiores: possem parvipendere omnia, quæ heri demonstravi nobiscum facere, ut incertas, & in casu positas possessiones, tanquam fortunæ ludibria, cum multa alia Civitatem nostram commendent, præstantemque faciant, in quibus nullam, vel certe exiguam partem tenet fors, & ipsa fortuna, quæ neque eripi, neque unquam surripi possunt, & neque naufragio, neque incendio amittuntur, neque tempestatum, aut temporum varietate mutantur. Post igitur contentionem fortunarum, & eorum bonorum, quæ externa nominantur, ne utriusque dumtaxat ex fortuna, aut genere, sed etiam ex virtute pendendi simus, conferamus invicem, quæ propria nostra dicuntur; conferamus, inquam, de utriusque Civitatis hominibus agendo, optimarum artium scientiam, & maximarum rerum gloriam, quæ tota a virtute proficiscitur, adducamusque in aciem, & discrimen præstantes Viros virtutis, ac sapientiæ gloria: ad quam Orationem, Judices, magna spe ingredior; facilem enim mihi propono, atque auguror victoriam, quod  
sciam

sciam me cum inermi, & imbelli pugnare, quod illico constabit, cum primum lucem nostram cum illorum tenebris comparare cœpero. Verum priusquam, Patres, bellicum canatur, & antequam ad illam concursationem, contentionemque perveniam operæ pretium mihi videtur quæpiam de Civitatis nostræ moribus, optimisque institutis præfari. Est enim unum ex septem illis, quæ initio Orationis proposui, dixique ea efficere posse, ut altera Civitas alteri præferatur, quam partem præfatus sum modo, me in tota Oratione sparsim tractare velle. Nondum, Judices, apud viros plurimarum artium scientia insignes satis exploratum est, Cœli ne simul, & soli vi quadam naturali eveniat, cur in eo tractu, ubi urbs nostra sita est, plerumque homines acutiores, & vegeta quadam mente præditi nascantur, quorum late fere semper patet industria, an id educationi ascribendum sit potius in Civitate bene instituta, in qua majoribus nostris antiquissimum semper fuit optimas leges, quæ æquitate temperatæ sunt firmissima vincula Civitatum, sciscere, inducereque, ac retinere amplissimam bene vivendi disciplinam tam vita, quam literis, ut eam civitatem, quam a suis majoribus honestam accepissent, suis posteris semper meliorem relinquerent tanquam nati ad laudem viri. Operam in primis darent, ut in Civitate optimæ artes semper essent, exercitationesque virtutum, quo viri per se semper acres, atque industrii in literis versarentur, & disciplinis, quibus exculi, variaque doctrina perpoliti ad studia summæ laudis accenderentur, patriæque, cui omnia debemus, con-

filio, & auctoritate difficillimo quoque tempore prodesse possent; quæ cura, atque institutio ab urbis incunabulis per omnes ætates in nostris civibus perpetua quadam serie tanquam propagata duravit, duratque ad hæc usque tempora, perseverabitque etiam, spero, in posterum benigno quodam cœli aspectu nunquam eam soli partem deferente, quam Leonis astro Soli conjunctissimo suppositam, sicut etiam Romam, a qua originem ducimus, ferunt ii, qui diuturna cœli, siderumque observatione descriptiones Chaldæorum norunt. Esseque in tutela præcipua inter ea sidera, quæ errantia videntur, Mercurii, & Martis, Jove nunquam nos non fovente, unde fieri necessario contendunt, ut ea Civitas fuerit semper non minus bonis, artibus, quam mænibus exaggerata, extiteritque religionis, virtutis, scientiæ, & optimarum artium perpetuum quasi domicilium, omnem curam illam, & institutum divinitus in animis nostrorum civium inferi, ut omne studium narent, quo ingenui adolescentes tam Græcorum, quam nostrorum monumentis, & literis instructi boni sint, & cumprimis honesti, atque iis artibus, quæ liberos homines decent, imbuantur, polianturque educati in alicujus hominis doctissimi, ac moderatissimi disciplina. Hinc fit, ut non solum virtutis in bello, sed etiam doctrinæ ornamentis, ac præsidii in pace in omni genere, & varietate, artium etiam illarum, quæ non sine summo ocio facile discuntur, plerumque cives nostri excellant, ut neminem invenias plane alienum a literis. Omnes ut primum sapere inci-



ciunt, sapientiæ studio, ac cupiditate flagrant; Hinc evenit, ut rectissimis studiis detenti, atque occupati, repudiatis libidinum illecebris, non totam adolescentiam voluptatibus dedant, lasciviæ, & luxuriæ frena laxantes, sed se abdicant illis vitiis, quibus ea prona est ætas, cum omnis eorum impetus sit ad laudem, jamque in eo ætatis flexu apud illos omnia dignitas potest; ea vero vitia, quæ adolescentiam, cui inest maxima imbecillitas consilii, infectari solent, raro in nostra juventute reperias; æsalienum, petulantiam, libidines, adulteria, inconcessos amores. Vitantur ab omnibus æqualibus adulteri, impudici, sequestres, aleatores; quod quidem eo majori laude dignum duco, quo natura ipsa soli ubertate, & rerum copia, ac saturitate, plura, & majora blandimenta subministrat voluptatibus, quibus interdum sopita virtus connivere solet; opum enim abundantia multas vias lubricas semper adolescentiæ ostendit. In Civitate nostra quocumque te vertas videas confertissimos adolescentium cœtus de virtute, de officio, deque omnibus, quæ mandata sunt literis ad omnem humanitatem spectantia, differentes, disputantesque, donec crescente ætate evadant inprimis temperatis moribus insignes, humanissimi, honestissimi, rectissimisque studiis, atque optimarum disciplinarum præstantia excellentes; neque in nostra Civitate unquam contingit videri, aut audiri illa immania scelera, aut tragica portenta, quæ ad nos aliunde perferuntur, adeo tetra, & obscœna, ut animus ea referre refugiat. Ubi igitur paulum roboris accessit ætati,

se nostri homines aut armis, aut literis applicant: aliqui etiam versantur in republica summa laude in rebus gerendis viri acres, & industrii, prius literis ad omnem humanitatem exculti; de duobus extremis post dicam, si tempus suppetet, aut adversarii patientur, me de re Militari disputare, nec potius ultro nobis cedent ingenue se victos esse confessi, ne in omnibus rebus nimium sibi arrogare videantur. Porro de literis, deque optimarum artium studiis, quæ in umbra, & ocio tractantur, nunc instat nobis agendum. Ex iis, qui in umbraculis Philosophorum [Philosophiam enim non tantum late, sed etiam latissime, & ubique patere duco] abducti curis versantur, alii se complures ad jus civile, alii ad eloquentiam conferunt. Id autem dico de iis, qui honesto loco sunt nati; nam de aliis, qui sunt humilioris loci, ac fortunæ, post statim subjungam; nec etiam ab Oratione nostra summovebo artes, artificesque inferioris ordinis. De Jure civili igitur, quod semper apud omnes nationes in pretio fuit ob maximarum utilitatum fructum, quas hominum vitæ semper tulit, placet ne nobiscum, Papienses, experiri, ut hæc sit de virtute agendo, prima quasi velitatio? Scio non detrectabitis certamen; sed potius in aciem, atque discrimen summa alacritate, ut video, prodire gestitis, vobisque fortasse videmini in regno vestro, ut ille ait, fore tutoque, ac sine adversario posse luctari propter Gymnasium, & provinciæ Academiam, quæ apud vos publica pecunia provinciæ, ut infra dicemus, instituta fuit, quo semper magnus est

est concursus jurisconsultorum adventitiorum, qui a Cæsare ob commoditatem totius provinciæ conducuntur, ut, non tam vestram, quam sociarum urbium juventutem in hujus facultatis studiis erudiant. Sane, si unquam in ullo studiorum genere aliquid, Papienses, fuistis, in hac scientia vos non nihil esse vobis videri potest. Quid, si convinctam vos, reque ipsa demonstraro vel in hoc studiorum genere præ Cremonensibus nihil esse, aut ullo unquam tempore fuisse? Numquid causæ erit, quin in omni alio disciplinarum genere victi, dantesque ultro manus ab hac arena discedatis? Possem, Judices, in hac dignitatis, & honoris dimicatione, si callide, atque artificiose agere vellem, imitari optimorum imperatorum artes in beligerando, qui cum incundum est prælium, in primo congressu, non protinus omnibus copiis configunt, neque statim omnes vires advocant, sed ut in puerili exercitatione quasi ludicra, cum acutis calamis res agitur, levi, ut ajunt, brachio primum pugnantes certamen aggrediuntur, eminusque crebris velitationibus, ac levis armaturæ excursionibus hostem provocant, atque ad certamen prolicere conantur, demum accenso ubique certamine totis opam viribus nituntur, atque omnes nervos intendunt, & firmamentum totius exercitus in pugnam sufficiunt. Possem, inquam, in hac nostra altercatione, cum de juris civilis scientia agamus, primo congressu verute non totas opes nostras explicare, sed ab infimis incipiendo nostros juris consultos minutatim producere, & in finem optimos quosque tanquam firmio-

ra cornua reservare. At ne, Iudices, vos diutius teneam in re non magnopere necessaria, agam cum adversariis aperte, splendide, atque ingenue, nihil tectum, nihil veteratorium a me expectetis, ut in principio hujus actionis mihi proposui omnia bona fide facere, ac dicere. Non igitur eos longo, involutoque artificio callide frustrabor; neve vos longa jurisconsultorum nostrorum numeratione defatigem, multitudini parcens, tres primum e nostris nominabo diverforum temporum non mediocres quidem, aut gregarios, sed post hominum memoriam doctissimos, & præstantissimos, qui totam eam facultatem illustrarunt, quorumve præstantia Juris scientia amplissimam gloriam est consecuta; cum iis tribus si aliquem conferre possent ex omnibus, quos ex omni ætate habuerunt Papienses, nihil est causæ, cur recusem, quin secundum eos in hac parte judicetis. Existimo, non negabunt Cremonensem fuisse Alphenum unum inter illos vetustissimos Jurisconsultos, ex quorum responsis totum jus civile a Justiniano Imperatore conflatum, atque in unum volumen redactum fuit, id tot veterum Scriptorum testimoniis comprobantibus, qui etiam si minus nobis suffragarentur, certissimo argumento esset, quod nunc etiam apud nos Alphenorum familia extat, imaginemque clarissimi Viri gentilis sui adhuc servant ex ære expressam, eamque interdum hospitibus, & peregrinis inter visenda Urbis ornamenta ostentare solent. Nominatur etiam adhuc in agro Cremonensi vicus Alphenus, quem ab ejus Viri nomine vocatum fuisse exploratum habemus.

Quem

Quem obsecro vos, Papienses, inter eos antiquissimos Jurisconsultos, qui totius juris, quo nunc utimur, auctores apud Latinos fuisse comprobantur, huic nostro opponere valetis? Hic unus satis esse posset, ne vos amplius in hoc scientiæ vel industriæ genere laboraretis, si quis esset in vobis sensus. Alterum, non equidem illius ordinis, aut classis, sed aliquot post annos secutum, vetustissimum tamen Joannem Bassianum suorum temporum lumen juris civilis appellatum adduco. Floruit enim anno a partu Virginis M. CC. Fuit præceptor Accursii, & Azonis præclarissimi Jurisconsulti, ante quem totum jus civile, quod latissime diffunditur, in breve volumen, quasi præcisum corpusculum redegit, eamque quasi viam proximam, & compendariam ad legum scientiam posteris commonstravit; enodavit insuper sparsim multa, quæ tam in priscorum Jurisconsultorum responsis, quam in Principum placitis in Codice Justiniani Imperatoris descriptis magis involuta, ac difficilia tanquam glossemata quædam, ac legum mysteria videbantur, eaque omnia plana, atque illustria fecit brevibus, ac concisis expositionibus, quas mox posteriores usque in præsentem diem quædam ad eas illuminandas tanquam accensa luminaria semper transcribi faciunt in omnibus ipsarum Legum voluminibus. Hinc cum Angelus Perusinus Legum interpres, suo dicendi more loquens, juris lucernam appellat, & Mundi speculum. Ad hunc, quæso, quem mihi, Papienses, adducetis? Nihil ne videtur vobis nos dicere, cum hos præstantissimos, summiq[ue] subsellii Vi-

ros

ros vobis obijcimus? Qui, quæſo, ii vobis videntur? ſunt ne tales, quos præ veſtris contemnatis?

Tertium addo honorifica ſemper cum nominis præſatione nominandum Ricardum Malumbram, cujus admirabilem quandam, & incredibilem, & pene divinam in legibus interpretandis, æquitateque explicanda ſcientiam Bartolus, & Baldus, cæteri. que poſteriores legum interpretes paſſim in ſuis commentariis ſumme admirantur. Antonius Butrius autem antiquus Jurisconſultus plane attellatur, cum fuiſſe omnium jurisperitorum ſuæ ætatis doctiſſimum. Accepimus Patavii publice maxima auditorum frequentia, atque concurſu jus civile interpretatum fuiſſe anno a partu Virginis M.CCCX. Bartolus idem inſuper cum teſtatur maximis honoribus cohoneſtatum fuiſſe, & in Sacerdotum Cardinalium Collegium ob eximiam virtutem cooptatum reſert. Reſpublica, Senatusque, & populus Venetus utitur adhuc legibus, quas ille eorum voluntate, ut alter Solon, aut Lycargus luculentiffime præſcripſit. Domus tam præclari Viri cum honeſtiſſima familia hodie etiam apud nos viſitur, ejuſque natalem ſedem mira quadam quaſi religione veneramur. Hic paulum ſubſiſtam. Expectabo quosnam veſtros invicem adverſus hæc tria Legum lumina excitabitis a mortuis? quid hæretis oſcitantibus? quid trepidatis Papienſes Viri? hiſcite hic tandem. Ubi nunc illa veſtra arrogantia, & intolerabilis oſtentatio? ubi nunc gymnaſium illud veſtrum, quo intoleranter elati omnes ſociorum urbes præ veſtra deſpiciſtis? evocate ab inferis aliquos, qui ſaltem noſtrorum trium uni conferri poſ-

possint. Non arbitror vos tam excordes, aut deliros, ut vobis in mentem veniant vestri nescio qui Sacci, Curtij, Opizonij, & Ripij, quorum aliquos modo vivos vidimus alioqui non contemnendos, nihil tamen ad nostros; in tali enim discrimine non defensoribus istis Tempuseget, ut illa ait apud eximium poetam. Ad istos vestros nominare possem quamplures ex nostris longe illis meliores, antiquioresve. Albertum in primis Gandinum, acutissimum suorum temporum Juris interpretem, cujus luculentissima Commentaria de Maleficiis leguntur: post hunc Gelliolum Cavitellium, virum ornatissimum, cujus responsis, atque sententiis subscripsit Baldus, & se astipulari ingenue confessus fuit cum honorifica tanti viri præfatione. Homobonum item, Nicolaum, & Hospertum, qui primus Perusiæ docuit Jus civile, plurimosque alios jurisconsultorum sua quemque ætate, principes, & Scriptorum testimonio illustres. Pene præterivi, copia fatigatus, præstantissimum juris civilis interpretem Cremonensem Martinum, qui eodem ferme tempore, quo Joannes Bassianus floruit, nulli jurisconsulto suorum temporum secundus; ipse etiam ea, quæ in toto Jure erant magis abstrusa, atque obscura, interpositis quibusdam interpretationibus contractioribus illustravit, quibus hodie tanta fere est auctoritas, quanta ipsis legibus propter certam, atque constantem viri præclarissimi doctrinam. Excutite omnes ætates; scrutamini omnes veterum, recentiorumque annales; neminem reperietis, scio, qui cum istis etiam, quos vos ipsi attulistis, con-

fe-

ferendus sit: bonos sane homines fatemur, neque omnino ingenio, aut literis carentes, quosve etiam in aliquo honore inter Jurisperitos sui temporis fuisse assentimur, attamen in mediocrium numero habitos dicimus, neque tales, qui ex ejus scientiæ laude possint ad nostros aspirare, nempe non multum interpretandi juris laude processerunt. Tales ego equidem nostrorum vel sexcentos ex omni ætate vobis nominare possem. Sed nihil agitis. Qui hic sedent, & adsunt in consilio, sunt etiam ipsi Jurisconsulti, & ii quidem lectissimi, emunctæ naris, & exquisiti judicii; teretes aures habentes non omnia passim probant; rara quædam volunt, in quibus sit quædam excellentia; nihil non elegans, nihil non lautum, nihil non selectum, & conquistum admittunt: Desiderant in hac tanta dimicatione viros singulares, cujusdam raræ, & reconditæ doctrinæ, industriæque elegantioris magna præstantia, excellentiaque reliquorum insignes, non minutulos quosdam legulejos è media turba sumptos. Ecquid in nostris habetis, quod non summe probetis? de illis loquor, quos modo, omissis cæteris, tanquam tria legum lumina, & ornamenta, principio vobis proposui, addito mox etiam quarto, quem omiseram. Si municipii vestri omnes viæ, omnes vici, & angiportus, omnia fora, & templa passim leges ebullirent, nihil adhuc contra hos proficere-tis. Quod si nos ad hæc tempora vocabitis, recentioresque Jurisperitos, & eos, qui adhuc vivunt cum nostris conferre malueritis, eodem revolvemini; idem vobis in novis, qui in veteribus,



bus, exitus est futurus. Opponitis nobis quempiam, qui honesta mercede conductus in academiis aliqua frequentia auditorum, leges explicat; inepte sane; eandem cantilenam semper canitis semper vestri similes. Exquisito inquam opus est, & eccellente; non negamus profecto istum hominem haberi in doctis nostri temporis jurisperitis, in mediocriter doctis tamen. Vivit adhuc inter nostros, & viget vir admodum præclarus exquisitæ doctrinæ, & non mediocris ingenii, qui multos annos longe majori auditorum celebritate, quam quilibet vestrorum in omnibus Italiæ academiis hanc artem docuit, doceretque etiam nunc, nisi ob ejus virtutem a Francisco Sforcia ad aliud vitæ genus longe præclarius translatus fuisset, ut in vestrum ordinem cooptatus vobiscum majoribus causis judicandis præset; postea, ut de Malumbra memoravimus, etiam ad altiorem dignitatis gradum sacris initiatus evectus est. Omitto immensam silvam Jurisconsultorum, qui aut etiam nunc sunt superstites, aut nostra, patrumque memoria fuerunt alicujus nominis; tum quod mihi proposui neminem nostrorum, qui adhuc vivat, in hac Oratione nominare, tum ut vobis viam præcludam, ne ex infima turba, & colluvione patronorum colligatis, quos huc obtrudatis. Ut tamen aliqua ratio etiam recentiorum a nobis habeatur, afferam constantissimam rationem, quam nunquam poteritis aut eludere, aut infirmare. Est cuique vestrum, Patres, satis exploratum, Franciscum ipsum Sforciam, quem sæpe honoris causa nomino, cum primum Mediolano, atque huic imperio

perio præfectus, fuit, omnem curam, ac diligentiam adhibuisse in Senatu coopando, ut erat vir certi, exquisitique iudicii. Omnis ejus cogitatio, atque intentio fuit, ut tam grave, sanctumque Collegium, primum ex optimis quibusque, ac præstantissimis conflatum esset, deinde ut in primis nostrates, hoc est, ex provincia sumerentur ad tantum munus, quibus tantam suæ ditionis; & imperii partem concrederet, tantumque magistratum mandaret. Ad tam exiguum numerum conficiendum statim multos in Civitate nostra reperit, qui hoc dignitatis gradu sibi digni viderentur, sed ne aliis provinciæ Civitatibus invidiosum foret, tres tantum excepserit, nemine apud Papienses invento, quem sponte sua eo honore ornandum duceret. Conquerentibus tamen ob id Papiensibus, & enixe postulantibus, ne Civitatem suam ignominia tacite notaret, vix unum admisit; & coactus fuit ad externos se convertere, & de exteris hominibus numerum supplere; hanc ob rem memoratur Vir ille acutissimus cum aliqua animi commotione dixisse, Civitatem Papiensem simillimam sibi videri lapidis in via erecti, qui viatoribus iter quidem commonstrant, ipse autem nunquam movetur. Habere siquidem illos magnam ex academia, quæ est apud eos, commoditatem addiscendi, sed illam tantum esse usui aliis, ipsis autem, quibus maxime deberet, parum prodesse. Cum igitur nulli in Jure periti, neque veteres neque recentes vobis suppetant, quos in aciem adversus nostros, & plurimos, & præclarissimos adducatis, idest cum in hac contentione vobis  
non

non omnia non desint, restat ut de juris scientia in hac concursatione ne verbum quidem post hac facere audeatis, Papienses, neque ullam hinc dignitatis commendationem ducatis omnibus rationibus ne dum victi, sed etiam obruti.

Veniamus ad Philosophiam, cujus nomen, propter ejus vim ubique diffusam, latissime manare dixi. Ecquem habetis in promptu ex aliqua ætate, aut memoria, quem adducatis in medium, cujus nomen per se sanctum sit, & venerandum? Ego quidem omnes fere Italiæ bibliothecas maxima cum diligentia perscrutatus revolve; neminem unquam Papiensem, neque bonum, neque malum scriptorem in gravibus disciplinis offendi; edite vos, si quos habuistis aliqua præstantia excellentes, qui forte, cum essent doctissimi, contenti tamen suis latebris maluerunt sibi scire, quam alios docere, aut si alios quidem docuerunt, noluerunt tamen, ut de Socrate memoratur, quæ scirent, perpetuis monumentis, memoriæque hominum proderet. Agite, inquam, prodite si quem accepistis inter majores vestros fuisse alicujus nominis in aliquopiam genere disciplinæ, quæ a Philosophia emanet, aut etiam in Mathematicis, & in omnibus aliis artibus, quæ dignæ semper habita sunt homine libero. Ignoro hercle ego quemnam ex omni ætate hoc loco nominare possitis, nisi fortasse ad recentiores vos referatis, & Mathæum Curtium in medicina non contemnendum adducatis, quamvis fortasse occurrent illi, qui Clementis septimi immaturum interitum adhuc deplorant; fuerit utcumque tanti Pontificis

cis

cis obitus; non omnes sanat medicina, multosque etiam absque medici culpa interire est necesse. Quem alium aliquo literarum genere clarum asserere possitis, mihi plane nusquam succurrit, nisi velitis mediocrem quempiam de turba, & ex aliqua obscuriore sentina excerpere. At ego si quotquot nostra Civitas creaverit in omnibus disciplinis præstantissimos recensere voluero, erit difficilius hujus Orationis exitum, quam initium invenire. Seligam igitur, Judices, ex omni genere aliquos, quos fuisse excellentis doctrinæ, atque industriæ constat, neque adversarii inficias ire poterunt, cum etiam illi sint gravissimorum scriptorum monumentis perpetuis commendati. Mihi (ut dixi) consulto proposui neminem nostrorum, qui adhuc vivunt ad evitandam invidiam nominare, cum complures, eo ingenio præsent, ea optimarum artium doctrina, ut doctissimi post hominum memoriam habeantur, quorum famam propter eorum scripta, nulla unquam obscuratura sit oblivio. Non enumerabo quotquot Cremona feracissima ingeniorum, nostra, patrumque memoria, vel etiam paulo superiore ætate tulerit viros præclaros in Theologia, cui uni tanquam omnium scientiarum reginæ cæteræ disciplinæ, & Philosophiæ partes omnes ancillantur administræ, atque pedesquæ. Possem hoc loco inter optimos theologos jure recensere cives nostros adhuc viventes, qui hanc seu scientiam, seu scientiarum quoddam quasi columen, ad quam omnes aliæ referuntur, eloquentia cumularunt, atque latinis literis adhibitis oratoriis ornamentis ad omnem elegantiam, & splen-

splendorem, tum versu, tum soluta Oratione illustrare pergunt, de quibus suo loco postea agemus. His igitur omissis, multitudinem quantum possum devitans, unum Eusebium antiquissimum Theologum adduco, qui fuit Hieronymi sanctissimi Theologi discipulus, floruitque temporibus Ambrosii, & Augustini Antistitem, non minus doctrina, quam sanctitate clarus, parque illis ipsis, quos modo nominavi, veteris sanctitatis pariter, & doctrinae exemplum, in quo cum nihil habere possitis, quod improbetis, neque cui parem conferatis, omissis Sicardo cive, & Episcopo Cremonensi, nec non Geelmo ejusdem pariter urbis Antistite, qui primus Papiae Theologiam docuit, Simone item Monacho, & Jo. Francisco Faerno, quem ego vidi nostris temporibus in sacris literis pro oraculo haberi, cæterisque quamplurimis ejusdem ordinis, & classis theologis, transco ad alias disciplinas. Quotus, rogo, vobis videtur Apollinaris philosophus? qui ex honestissima Orfidiorum, seu, ut corrupte dicitur, Offredorum nostrorum familia, ingeniorum fertilissima prodiit, quique inter alia suæ exquisitæ doctrinae monumenta illos aureos Commentarios in libros Aristotelis de Anima conscriptos edidit, quos usitato jam proverbio ipsius Aristotelis Animam Philosophi recentiores vocant, eosque in Scholis simul cum iisdem Aristotelis libris legentes, & explanantes, exosculantur, & in deliciis habent, atque in oculis; est enim aureolus totus, & ad verbum addiscendus libellus. Quotus etiam in eadem scientia vobis videtur Gerardus Sablonera, qui inter

suz ætatis Philosophos facile princeps fuit, tam multarum, & optimarum artium scientia; quam eloquentia insignis? Hic, cum sermonem, & linguam multarum nationum calleret, Avicennæ Arabis, & Almanforis libros latinos fecit. Hisce duobus præstantissimis Philosophis complures alios omnium ætatum honestissimos annectere possem, sed in hac collatione minime necessarium ducō, cum adversarii neminem uspiam habeant, quem nobis opponant. Constat etiam eosdem duos suamque ætate, in Medicina principatum tenuisse, quæ ars cum primum cognita est ab hominibus, non tantum quæstuosa, sed etiam summo semper fuit in honore; siquidem qui se ad Philosophiam contulerunt, non unam tantum scientiam adepti sunt, sed eorum late diffunditur industria, rarique optimi philosophi evadunt, qui non Medicinam quoque facere, vel saltem noscere, ac discere velint. Habuit enim nostra Civitas præter hos duos præclaros Medicos, patris mei memoria nobilissimum, ac præstantissimum Jo: Baptistam Pladium, qui etiam in Mathematicis disciplinis, ut postea dicam, cunctos suæ, posteriorisque ætatis superavit. Multos alios præterea doctissimos Medicos, quos hoc loco minime est necesse recensere. Eorum vero, qui adhuc vivunt, quanquam proposui neminem nominare, attamen vix hic mihi temperare possum, quin omisso proposito, rupisquæ repagulis, extra cancellos longius excurram. Habet enim nostra Civitas in præsentem eos viros, ea excellentia præstantes, qui si aliquo gravi casu, eluvione, aut

ter.

terrarum exustione, aut pestilentia, vastitateve, omnis medendi ars amissa intereat, facile eam denovo excitare possint. Aditur undique, mediusfidios urbs nostra tanquam olim Epidaurus ad opem ab Æsculapio implorandam; ex omnibus partibus non modo Italiae, sed etiam ex aliis provinciis huc confluunt, ut quondam non tantum ex omni Græcia, sed etiam ex toto terrarum orbe ad Delphicum oraculum propter spectatissimam medicorum nostrorum industriam, quorum incredibili, ac prope divina scientia, vulgatum est in tota Italia, etiam mortuos e rogo Cremonæ reviviscere. Neminem nomino, tamen bona pars vestrum, Patres, intelliget, quem dicam. Vivit, vivit adhuc, valetque apud nos, licet jam in præcipitata ætate, omnium Medicorum nostræ ætatis facile princeps, non infimo loco nostræ Civitatis natus, ex ea ipsa antiquissima familia, quam optimum Philosophum, eundemque Medicum tulisse commemoravi. Hic exquisita quadam medendi ratione præditus aliquos quotidie sanando, qui periculose ægrotabant jam prope desperati, comploratique ab omnibus, ut aliquis Medicinæ Deus imploratur, & a finitimis civitatibus jam usitato nomine Cremonensis Hippocrates vocatur. Ad artis rationem, quam ex optimis Græcorum, Latinorumque auctoribus haurit, addidit quoque experimentum ipsius disciplinæ, & rerum usum; nec tam ex libris didicit herbarum multiplicem, atque reconditam vim, quam ipsas herbas ipse inspicere voluit, & explorare, nosseque, quo quæque non tantum nomine vocetur,

sed etiam qua forma, ac figura sit, ut periclitetur, an earum facies descriptioni antiquorum Medicorum respondeat, ne in errorem, ut multi alii, prolabatur, aliamque pro alia medicaminibus adhibeat; quæ res nostra tempestate propter herbariorum incitiam maximum mortalibus affert incommodum: vix unquam hic noster errare posset cum optimorum auctorum lectione, tum longinqui temporis usu, ac periclitatione experientissimus. Adde hominis per se ingenui faciem perquam liberalem, vultusque alacritatem, atque jucunditatem, quem etiam, cum ad ægrotantem venit, de industria componit, dulcique quadam hilaritate inspergit, atque perfundit; ad hæc accedit assiduitas illius, & benignitas, sermonisque suavitas, ac festivitas semper secunda pollicendo. Ante omnia studet ægrotantem a tristitia, atque acerbitate abducere totus hilarulus, totus lepidulus; blande siquidem semper appellat, quos tristiores videt quasi atra bile teneri, acuto, atque hilare dicto festivus, ut delinuti blanditiis Medici humanissimi, Medicinæ remedia, licet fortia, & austera, non aversentur. Odi ego equidem quosdam horridos, tristes, ac severos, non Medicos, sed Rhadamanthos superciliorum remissione, buccisque fluentibus, & visu ingratos, tristisque, & recondita natura, nulli asfabiles, qui mortem unici gnati immaturam semper lugere videntur, ut vultu, ita etiam sermone duri, difficiles, inculti, tetrici, atque jejuni. At nostri senis humanitas, jucunditas, atque suavitas magnæ levationi semper ægrotis fuit, quibus  
re.



rebus præditus semper judicatus fuit inter Medicos implere omnes numeros; iccirco summe desideratur ab omnibus, qui gravi, ac periculoso morbo laborant, undique summopere aditur, deponitur, atque expetitur; si quis ejus nomen nunquam audierit, neque eum de facie norit, cum primum hominem viderit, nequaquam effici possit quin ei homo bonus statim videatur, ac judicetur. Si etiam ad Chirurgiam, quæ est aliqua pars Medicinæ descendere velimus, habemus in ea arte peritissimos homines, qui vulnera, nova quadam adhibita curatione, citra sectionem, ulsionemve celerrime sanant. Non ne ex tota Italia, multisque ex provinciis, qui calculo laborant ad nostros confugiunt, quos ipse vidi ex vesica hominis, senio, morboque confecti lapidem ovi gallinæ magnitudine longi temporis negligentia, atque incuria concretum extraxisse, eumque sectum, qui præ dolore, acerbissimoque cruciatu modo mori cupiebat, post tertium, aut plurimum quartum diem, incolumem, optimeque valentem evasisse? Audivi sæpius ab iis, qui Medicinam instituunt, optimum Medicum esse non posse, qui non humani corporis partes omnes non tantum extrinsecus, sed etiam interius per dissectionem humani cadaveris, quam *ἀνατομὴν* vocant, articulatim inspexerit: hujus rei peritissimus in omnibus Medicorum Academiis tota Italia, & per provincias nomen suum nobilitavit Civis noster adhuc vivens; Cremonensem Medici jam vulgato nomine vocant, ne adversarii nostratem esse negent. Hic totum hominis damnati recens cadaver, e carnificina

avectum minutatim difficans proponit Medicis omnes particulas paulatim inspiciendas, ut explorare possint, quæ sit humanæ carnis natura, quæ compositio membrorum, quæve ossium, nervorumque conformatio, atque conjunctio, quæ medullarum vis, undeve initium habeant venæ, quæve eæ, & quousque diffundantur per corpus, utque omnes arterias introspiciant, omnes sanguinis rivulos, & vias ab intestinis tam ad jecur, quam ad aliam partem ductas, atque directas, omnes item spiritus meatus, & receptacula, omnes mûculos, & cartilagineas, levissimasque membranulas, tunicas, sinusque, & radios, omnes articulos, extra quoque tota, & intestina, atque eorum fibras, totamque demum hanc naturæ tam diligentem fabricam contemplari valeant; nunquam aut plus, aut minus quam expediat concidit, sed ad formulam antiquissimorum Medicorum eam partem, quam constituit, enucleate defecat. Neque vero istæ tantum manu transigit, verum etiam de iisdem in scholis magna auditorum frequentia doctissime, ac subtilissime disputat a civitatibus per magna mercede conductus, semper paratus querentibus, omnium, quæ ad artem pertinent, physicam rationem reddere.

Transeamus tandem hinc ad alias disciplinas; nihil tamen comparandi causa elaboro, cum præterea neminem habeant adversarii, cujus nomen sit hoc loco dignum; operam enim perderem si disjunctissima inter se comparare conater. In Mathematicis maximum nostri studium semper posuere, cum ea non sine summo ocio discantur, quod

quod magna in obscuritate rerum, & recondita arte, multiplicique, arque subtrili versentur. Ille idem Gerardus Sabloneta, quem supra præclarum Physicum, & eundem Medicum commemoravimus, tamen omnes disciplinas uni Geometriæ semper posthabuit, quod eam omnibus scientiis certiolem nosset; Physicas enim rationes persuadere quidem fatentur omnes, sed Geometras certis, ac necessariis demonstrationibus, quæ minime vitari possunt, cogere affirmant; ideoque in ea arte omne ille studium ponebat, familiari etiam sermoni inferens similitudinis gratia lineamenta, formas, intervalla, & magnitudines. Hunc non tantum sua scripta nobilitarunt, verum quoque aliorum, qui de eo scribunt, monumenta illustrem reddidere, licet etiam propter invidiam, obrestatoribus non caruerit. Idem reliquit in nostra Civitate complures suæ intelligentiæ hæredes, ex hæredesque usque ad nostra tempora, in quibus quosdam etiam novi, qui sine docente, sine literis, sed solo ingenii acumine intima artis penetrarunt, ut de omnibus Geometricis partibus, non modo apte, & congruenter, verum etiam copiose loqui possint, si quid quæstionis coortum fuerit, de circuli, aut quadrati, vel alicuiuspiam alterius figuræ dimensione, semperque in ore, & sermone habent, aut Euclidem, qui de iis cumulatissime scripsit, aut Archimædem.

In Arithmetiis quoque exercitati, studioque immoriuntur dimetiendi cœli, & terræ, rerum suarum negligentes, totiusque humanitatis obliti. Jam dudum gessit mihi animus in his studiis Ma-

thematicis immorando ad Astrologiam vos pro-  
vehere, neque mihi magnopere est necesse huc  
iterum evocare eosdem ipsos præclarissimos viros  
Gerardum Sablonetam, & Pladium, qui apud nos  
hanc artem scriptis luculentissimis illustrarunt,  
cum doctissimorum hominum, qui historiam scri-  
psere, testimoniis, ac prædicatione jam positi sint  
extra aleam, neque ullus in hisce studiis versat-  
ur, qui non utriusque libros sibi diligentissime  
legendos, ac perdiscendos necessario arbitretur.  
Permittamus igitur ambos in sua quemque gloria  
quiescere hominibus potius suspiciendos, admirando-  
sque, quam patiamur eos a quoquam indigne redigi  
in ordinem. Fuit ante Pladium Leonardus Mani-  
ardus, qui suo tempore, non tantum inter nostros,  
sed etiam inter omnes in iis studiis tenuit prin-  
cipatum. Habet præterea Cremona hac ætate vi-  
ros comalures perquam doctos, qui Cæli ratio-  
nem, & Chaldæorum placita diuturna siderum  
observatione optime callent, neque unquam in  
Mathematicis descriptionibus errare convinci po-  
tuerunt. Hi quotidie non tantum defectiones So-  
lis, & Lunæ multo ante nobis prædicunt, ne-  
que solum vident quo in signo quæque errantium  
stellarum quoque tempore futura sit, quove die  
cujusvis signi ortus, quove occasus perpetua Cæ-  
li, ac siderum ratione tam eorum, quæ certis  
locis infixæ sunt, quam quæ haud re, sed voca-  
bulo tantum sunt errantia, verum etiam, ut est  
Chaldaicum prædicendi genus, præsignificant mi-  
randum in modum, quid cuique porro sit even-  
turum, & quo quisque fato natus, &, quod in-  
credi-

credibile videtur, raro mentiuntur, cum tamen Eudoxus in Astrologia facile princeps dicatur scriptum reliquisse, Chaldæis in prædictione, & notatione ex natali die minime esse credendum. Tantum hoc studium nostris hominibus menti insedit, ut quemadmodum de Geometricis memoravimus, cætera omnia tam publica, quam privata in iis solis occupati negligant, inter illos ego aliquos quoque sum admiratus, qui nunquam ab ullo, neque Græce, neque Latine didicerint, sed penitus Grammatica nescientes, & omnino literarum expertes, tamen abundantia ingenii, naturæque ipsius habitu prope divino, per se ipsos artis abdita, atque recondita hausere, eaque optime callere judicantur, cum in hominum convectibus, & circulis cum doctissimis viris consuerint de difficillimis quæstionibus quotidie disputare, barbaris quidem verbis, ac vulgaribus, sed exquisitissimis rationibus, quæcumque dicunt probant, ac firmant, recteque, & ex arte constanter semper loqui judicati sunt. Quod mihi quidem videtur contrarium illi, quod de Arato dicitur. Ille siquidem ignarus Astrologiæ scripsit versu, nedum apte, sed elegantur de Astrologia. Hi vero descriptionis omnis expertes, & ignari, ad artis abditissima accedunt plus intelligentia, ac cognitione affecuri, quam lingua, aut calamo. Utcumque sit, quacumque industria id faciant, illis relinquo; mihi certe non potest non mirum videri, quod non modo tempestates, & temporum varietates, Cælique mutationes veris prognosticis multo ante prædicant quam eveniant, cum hujusmodi

di variæ Cæli species non semper certo aliquo signo commoveantur, sed interdum obscura etiam ex aliqua causa concitentur, aliaque quandoque sit tempestas Cremonæ, alia Placentiæ. Prædicunt persæpe, me audiente, procellas, tempestates, naufragia, ruinas, incendia, bellaque, & pestilentias, annonæ quoque futuram, aut vilitatem, aut caritatem, & quæcumque cuique eventura sunt, raroque in suis prædictionibus mentiuntur, ut aliquis credat eos potius ariolari quadam divina præsentione, & cælestis mentis instinctu, quam aliqua certa ex causa deprehendere ea, quæ premonent.

Cæterum etiam in iis artibus, quæ ad augendam rem familiarem inventæ sunt, habet nostra Civitas, semperque habuit egregios artifices. In Pictoribus, & iis, qui signa fabricant, quanta solertia, ne dicam prudentia? quanta dignitas? De Architectis vero quid dicam? quorum industriam facile quivis cognoscere potest tam ex Templis, publicisque operibus, quam ex privatorum domibus recentissime in urbe nostra exædificatis; usque adeo omnia in iis exacte quadrant, suisque numeris respondent omnia, ut nihil hactenus a quoquam deprehensum sit, in quo peccatum fuisse argui possit. Nec Cremonæ tamen angustiis eorum laus circumscribitur, sed latissime tenditur per totam Italiam diffusa. Quicumque uspiam ædificia magnifica moliuntur, eos consulunt, eorumque industriam, & artem expectunt, atque advocant. Porro incredibile est quantæ magnitudinis, aut ponderis moles, nulla, neque opera, ne-

neque impensa, sed exquisita quadam ratione moveant, quam ingentes columnas apposita machina facillime in altum tollant, substructionibusque apponant. Age vero cæteris in artibus quanta sit nostrorum præstantia.

Aurifices, & qui argentariam faciunt, Cælatores, Vascularii, & qui fusoriam exercent (nam de navis aratoribus, agricultoribusque dixi heri, cum de optimi soli ubertate agerem) molliter, & asfabre excudendo, formando, poliendo, ac collustrando ad antiquorum laudem pervenere. Quid, qui fidibus, & tibiis canunt? Citharædi, Aulædi, Symphoniaci, cæterique musicorum perstudiosi? qui surinam instituunt, qui textrinam faciunt, qui tonstrinam exercent, & ut eos attingam omnes, quorum non tam operæ, quam artes emuntur, trapezitæ, zonarii, phrygiones, fabriferrarii, lignarii, tignarii, navium ædificatores, cæmentarii, figuli nusquam elegantius nusquam mollius, & exactius horum opera perficiuntur. Pene oblitus fueram, dum ad majora propero commemorare, quam late diffusa sit nostrorum hominum mercatura, qui rem suam bonis, & honestis rationibus augment, non sordida quidem, aut tenuis, sed magna, & copiosa, ideoque præclara, & quodammodo generosa propter magnitudinem quæstus, & rerum, quibus abundat, copiam. In hoc industriæ genere nulli fere Italiæ Civitati præ opibus, & facultatibus secunda est nostra Civitas, cum tulerit eos viros, qui in iis studiis, & negotiationibus foris nomen suum nobilitarunt, tum propter commercium, quod habent

bent cum Regibus, & Principibus viris, qui ab eis persæpe grandem pecuniæ summam mutuam sumunt, tum propter amicitias, quas ubique gentium cum multis negotiando contrahunt. Non diffitebitur Cæsar, bellum, quod in Germania novissime maximum confecit, aliqua in parte sustentatum fuisse a mercatoribus Cremonensibus, qui in Civitatibus septentrionalibus negotiantur; neque hic noster Ferdinandus, qui eo tempore summam belli administrabat dissimulabit eosdem sibi etiam in re privata, ac familiari alicui usui fuisse. Illiberales vero quæstus, operas, atque servitia alijs civitatibus relinquo, liberaliterque concedo; qui a mercatoribus mercantur, quod statim vendant, quive in sella quotidie sedent ad solitum quæstum; est enim in illis ipsa merces servitus, tabernarios omnes, aquarios, bajulos ad deferenda onera valentissimos, & omnem illam faciem Civitatum. Sibi etiam habeant artes, quæ ministræ sunt voluptatum, cetarios, lanios, cocos, pistores, fartores, dulciarios, ut ille enumerat, & omnes helluelas; addo istis unguentarios, saltatores, aleatores, ludoque talario deditos, & id genus nugarum. Has ego, Judices, inferioris ordinis artes ad vitæ humanæ commoditatem inventas, quæ longiorem Orationem desiderabant, breviter, summatimque percurrans, artifices ipsos generatim potius quam sigillatim laudavi. Quoniam vero est in manu, & facultate cujusvis Oratoris hac ratione amplificare quodlibet vel contemptissimum oppidulum, omniaque mentiri, & temporis causa fingere, atque Oratione volitare,

præ-



præsertim si apud eos dicat, qui rei notitiam nullam habent, ne me cum esse arbitremini, qui de Artificibus agens non quæ propria sint nostræ Civitatis ornamenta propriæ, & vere memoraverim, sed collegerim omnia promiscue, ut quæque in mentem veniebant, quæ summæ, regizque cuilibet Metropoli convenire possint, cum longam esset, vobisque permolestum singulos præstantissimos viros in quacumque arte recensere, compendio studens operæ pretium duxi unum tantum hominem, quem bene nostis vobis proponere, ut sit quoddam quasi specimen, quod in uno de reliquis omnibus fidem facere possit.

Non vos præterit, Patres, jam pridem in hac ipsa regia Urbe Vestra, nutu hujus nostri Gonzagæ datum esse negotium cuidam Cremonensi in arte fabрили omnium rerum præstantia excellenti, ut Cæsari horologium admirandi, inusitati, incredibilisque artificii fabricet, quod non modo Solis ab ortu ad occasum commeantis cursum quotidie dimetiatur, diemque in XXIV. horas æquabilibus spatiis dividat machinationibus, vique occulta, aut ponderum impellentium, aut ferreæ laminæ violenter accurvatæ, axique circumvolutæ, & semper ob ferri naturalem rigorem obnitentis, & se evolvere conantis, ut etiam sit in vulgaribus horologiis, sed totius Cœli statum, Mundique naturam, & formam continenter se movendo imitetur, ut inde semper pernoscere possimus, in quo statu sit Cœlum, quæve existat ejus forma, atque non modo in quo signo, sed etiam in quanta ejus parte sit tam Sol cæterorum luminum dux,

&amp;

& princeps, quam etiam quæque stella, & omnium signorum ortus, atque obitus certo, atque immutabili ordine, suo quosque tempore perdiscere, solstitia item, & brumas, Sole ulterius non progrediente, & curriculum convertente, initium quoque Veris, & reliquarum anni partium, diversitates insuper dierum, ac noctium, tam Cœli commeantis flexu, quam diversitate regionum terræ ipsius, tum medium noctis quoque anni tempore, & meridiem, tum fastorum dies, tam eorum, qui Solis, quam qui Lunæ cursum sequuntur, quos mobiles appellamus, Solis quoque, & Lunæ accessus, & decessus, eorumque varios defectus, quo etiam tempore quæque stella nobis oriatur, & occidat. Arbitror, Patres, neminem vestrum esse, qui non viderit opus illud admirandum, inusitatum, & quodammodo portentosum, tam perfectum, expletumque omnibus suis partibus, & numeris, in quo egregius artifex eximio ingenio, studioque ad investigandum incitato æmulatus fuit Dei ipsius divinum, inenarrabile, immemorabile, & antehac non imitabile opificium in Mundi universi, atque in totius naturæ fabricatione; ita omnia cœli momenta, cunctosque orbium cœlestium motus, quibus tempus ipsum conficitur, solerti, ac subtili æris, ac ferri fabrica est affectus. Vidistis quam fabre expresserit astra omnia tum fixa, tam errantia, ipsorum errantium cursus imitatus, progressionelque, & reversiones, omnes item stellarum trajectiones, ut singulas, immutabilibus spatiis ab ortu ad occasum commeare faciat, ut varios annos unius astri reditio  
con-

conficiat signis omnibus, cæterisque astris ad idem principium per circulos suos revocatis, ut signorum ortus, & obitus servant semper eundem ordinem, ut errantes stellas, ut quæque citima est, aut extima, faciat suos cursus æquabili proportionem tenere, multum inter se, aut altitudine, aut humilitate distantes, ut celeriter semper Luna, quæ citima est, cursum suum, ac curriculum conficiat, Saturnus vero, qui est ultimus, semper annis saturetur. Quis, quæso, non admiretur in tanti operis fabrica, cum videat, ut mirabili varietate, atque ordine incredibili novem orbibus, vel, si magis placet, globis connexa sint omnia, e quibus octavus in partes XII. quas signa vocant, distributus omnes interiores alios arcens, & continens, complectatur, ut in illo infixi sint illi qui voluntur, stellarum cursus sempiterni, ut eidem subjecti sint septem globi illi, qui retro versantur contrario motu, atque Cælum, ut sua unicuique stella hæreat, & sicut in Cælo, ita quoque hic pariter errare credas, ut inter eas moderator omnium Sol sicut mediam regionem, ita quoque principatum obtineat, cunctaque lustrare videatur, & luce sua complere? Eum tanquam temporum auctorem, & moderatorem miro artificio circumferri fecit, & usque ad brumale signum accedere, nec ultra progredi, sed statim referri, & sensim ascendere in diversam partem, atque V. diebus, LXque, & CCC. addita quarta fere diei parte conversionem annuam conficere, & ut vere Cæli fictor æmulatus illum æternum Mundi fabricatorem, & effectorem Deum, cum

cum ipso Sole facit cætera astra penetrare. Non ignoro Patres, complures alios fabros vobis posse totam Sphæram semel inventam, atque introductam ab aliis, omnesque Mundi orbes, aut globos fabricari, tam ex solidis, quam ex planis servata peræqua proportione spatiorum, ut Terra medium ad Universi Cæli complexum quasi puncti instar obtineat, ut ipsi novem orbes, ac globi inter se juxta Mundi rationem distent. Fabricabunt etiam isti, & axes, & polos, & quas absidas, vocant; notabunt item signa omnia, ventorum quoque regiones, orbem lacteum, angustæque, & quinque zonas mundi, omnesque cæli dimensiones, inclinationesque, quas *κλίματα* vocant, divisiones insuper signorum, atque intervalla, & gradus, graduumque minutissimas, & prope infinitas particulas, omnia demum, prout se habent in Sphæra, fabrilis industria eibi perfecta dabunt, & totius Cæli formam etiam, sideribus ornatam apte excudent; neque enim est adeo exquisitæ industriæ ea, quæ aliquis prius adinvenit, semelque confecit, imitatione alium assequi, atque etiam inventis aliquid addere. At hic noster non tantum ea omnia ære, & ferro magis affabre, elegantiusque quam cæteri omnes, fabricatus est, ut nihil tam compositum, tam compactum, tam coagmentatum inveniri queat, verum etiam, quod nemo adhuc investigare potuit, ad unius octavi circuli motum, omnes alios interiores orbes, totamque illam machinam ad Mundi ipsius numeros, & rationem moveri, & in perpetuum contorqueri fecit, tam variis, tam inæqua-

qua-

quabilibus, tam vagis, tam dissentaneis, tam interdum contrariis motibus, nunc prœonibus, nunc supinis circulis, nunc rectis, nunc obliquis, sæpe etiam transversis, in orbem tamen commeantibus, ut nihil motu cœli ipsius, ac mundi fiat, quod hic quoque non representetur, ut inquam, tarditate, & celeritate dissimillimos motus una regat conversio, cujus nutui omnes alii motus obtemperant, omnes sint in officio, inter se concincentes, atque concordantes, & munus quisque suum obeant. Cum id opus inusitatum, Patres, contempler, desino admodum admirari mundum illum, quem tantopere, tanta, inquam, providentia in Timæo ædificari fecit Plato, cum prius mihi nihil eo descriptius, nihil dispositius videretur. Nihil profecto ab hominis ingenio, solertia,ve ulterius expectare possumus, nisi forte velimus, ut ad æmulationem illius æterni Opificis tonet etiam, fulguret, fulminet, nubes congreget, Irides varias inducat, pluat, ningat, grandinem, & pruina, roremque creet, variosque ventorum flatus, procellas, turbines, conciat, atque tam turbidas tempestates, quam serenitates, terræmotusque interdum subitos efficiat, rerum insuper inferiorum ortus, & interitus moliantur, quæ opera sunt unius rerum omnium præpotentis Dei. Rogatus ego olim ab ejus amicis, quoniam nomine tanti Operis fabrica apte appellari posset, ut Cæsari non sine nomine dono detur, nequeo in eam sententiam descendere, ut mundi aut simulacrum, aut instar, exemplarve dicatur, cum omnis hujusmodi vulgaris fabrica etiam motibus

tibus carens isto nomine recte dici possit. Quoniam vero is alter mundus videri possit tam perpetuis motibus, quam totius Cœli descriptione, cum tamen comparatione sit admodum exiguus, placet potius vocari parvum mundum, melius fortasse, & commodius Græce uno verbo *μικροκοσμον*. Talia sunt, Judices, civium meorum ingenia, tales Artifices; nihil vobis affero nisi egregium, nisi exquisitum, singulare, incredibile, atque divinum, quodque pro miraculo, & ostenso habearur, ut nemo credere queat talia a mortali fieri, aut investigari potuisse, nisi cœlesti aliquo mentis instinctu; id enim est divina ad homines transferre, & quasi cum natura ipsa certare, æternumque illum Opificem, si fas est dictu, æmulari. Si hominem aspicias, nihil minus, quam in eo ingenii acumen suspiceris; ita rudi, infirmi, atque agresti est facie, formaque, & specie adeo illiberali, in qua nulla dignitas, nulla indoles, nulla industriæ spes; indignitatem auget, quod eum semper videas multo cinere, & incocta fuligine os, & capillum, barbamque inspersum, infuscatumque, manibus, digitisque latis, atque prægrandibus, ærugine semper plenis, incomptum, male, & incommode vestitum, ut Brontem aliquem, aut Steropem, aliumve quempiam Vulcani famulum credas, qui suis manibus omnia, quæ facit, ad incudem informat, ad laborem in opificina natus. Neque quis putet, ei aliquem magistrum in Mathematicis excellentem orbium, aut moruum, siderumve rationem præscribere, ac præfinire nihil harum rerum intelligenti, sed in ar-

te

te fabrili tantum perito, omnia nullis adminiculis a se ipso suo ingenio, sua investigatione, suo, ut ajunt, marte, & instituit, & fabricatur, idem inventor, & effector, unus eorum nostrorum civium, quos supra memoravi in Astrologia inter omnes excellere, cum illi tamen nunquam literas didicerint; nullique præceptori operam dederint. Non solum in hoc genere callet cœli ipsius effectus, sed etiam intelligentia causas ipsas per numeros deprehendit, & cognitās habet, quin etiam sæpe numero eos, qui habiti doctissimi in Astrologia libros scribunt, recte, doctæque coarguit, & eos errati nonnunquam convincit, necessariis rationibus, errorem, lapsumque fateri coactos. Memini illum mihi dixisse, Venetos maximam curam, & diligentiam ponere, ne paludes illæ, quæ Urbem suam munitiorem, tutioremque reddunt, exsiccentur adjecta quotidie per alluvionem nova terra, easque assiduis operis humum egerendo detegere, atque in ea re necesse esse magnum, jugemque sumptum facere; se eum esse, qui quicquid illud est operis, & laboris, decuplo minore impensa exhaurire possit. Vidimus etiam, & admirati fuimus superioribus annis eundem hominem Imperatoris jussu ænea tormenta miræ magnitudinis, ac ponderis e fossa admodum profunda nullo negotio extraxisse, quæ vix centum robustorum boum paria cervicibus movere potuissent. Hanc partem ego, Judices, prosecutus sum latius, quam proposueram, nam ita facere coactus fui, ut quemadmodum præfatus sum, ab hoc uno, qui vobis est omnibus perquam notus, de ingeniis cetero-

terorum nostrorum artificum, quos non tam bene nostis, in unoquoque genere judicare possietis.

Demum mihi deveniendum est ad mansuetiores Musas, idest ad ea Literarum studia, quibus non tantum ad eloquentiam, sed etiam ad omnem humanitatem instruimur, ac perpolimur. De Poetis inquam, atque Oratoribus mihi instituendus est sermo, deque cæteris Scriptoribus, qui varia, ac multa Librorum lectione eruditi Patriam sempiternis monumentis illustrarunt. Hoc in campo tam lato, & spatiofo posset exultare Oratio; tot enim ejusmodi eruditionis homines præstantissimos genuit, gignitque quotidie Cremona, ut non inconcinne civitatem ipsam dicere possis eruditam. At ne diutius laboremus in collatione nostrorum cum vestris, compendio studens ita mihi rem aggrendendam duxi. Carolus V. Romanorum Imperator, omnium gentium, atque omnis memoriæ clarissimum lumen, cujus victoriarum fama iisdem, quibus Solis cursus regionibus, ac terminis continetur, quemque omnes gentes, populi, nationes, ob bellicosissimos populos ejus virtute, consilio, felicitate, superatos contremiscunt, implevit orbem terrarum nominis sui gloria; eas enim id ætatis res gessit, quas nunc omnes gentes loquuntur, nullave obliviscetur posteritas, nulla obmutescet vetustas. Si æternitati, & literis præclaris cujuscumque docti hominis monumentis ad memoriam ejus nominis sempiternam commendata fuerint, licet ille sit eruditus potius victoriis, ac triumphis, quam literis, sibi que contentus sit sua conscientia, testimonioque solidæ, ac veræ laudis;



dis; non tamen arbitramur indignum sua virtute, dignitateve, ac majestate cupere, ut quæ ipso præclare gessit pleniore ore laudanda, clarissimis literarum monumentis, vel Grece, vel Latine ad omnem memoriam mandentur, ut tot trophæis, tantisque victoriis, nulla unquam finem sit ætas allatura, quod etiam multi Imperatores clari, & magni ante eum fecerunt. Cogitemus igitur, atque fingamus, ipsum Cæsarem huic Ferdinando Gonzagæ, qui Provinciæ præest, atque in Italia summam imperii tenet, publicis literis scripsisse, ut in sua ditione hominum in re literaria præstantium delectum quodammodo habeat, de quo omnibus seligat aliquos, omni Literatorum præstantia excellentes, qui tantum, ac tam præclarum munus egregie explere possint, tum versu, tum soluta Oratione. Agite, Papienses, explore omnes Academiæ vestræ angulos, omnes, inquam, scholas scrutamini, excutite omnia Literatorum vestrorum umbracula, atque latibula, sicubi aliquis, aut se ultro offerat, aut certe deprendatur, qui tantæ provinciæ suppetere sit idoneus. Agite, inquam, postulate a Cæsare, ut ipse ad vos transmitti mandet rerum suarum commentarios, quo eas ille vester ex omni eruditorum numero delectus mox ornet divinis literarum monumentis. Cui, quæso, tantum munus mandabitis? Agite, aliquem tandem adducite; ne quem tamen, moneo, Mediolanensium attingite, quos sæpe pro vestris jactare, ac prædicare consuevistis. Quod si unus omnes tanti Imperatoris victorias complecti nequit (esset enim infiniti prope negotii) tantum.

H 3

que

que onus humeris suis reformidat, multæ fuerunt, ac diversæ ejus victoriæ. Nullus pene locus, quocumque penetravit, qui non ejus trophæis, monumentisque illustratus fuerit; tot enim triumphos habuit, quot oras terrarum cum exercitu peragravit, & omnem antiquitatis memoriam virtute superavit. Tria tamen ejus præclarissime facta ab omni egregie factorum numero eximunt, quibus omnes alios Imperatores, quotquot ubique gentium fuerunt, virtute, ac belli gloria adæquavit. Unum saltem ex his tribus Literati vestri excerpant; quod literarum monumentis commendent, vestrorum optioni nostri relinquunt, quod eis magis collibuerit, quodve eorum animis magis arriserit: quodcumque horum vestri detrectabunt, nostri suscipient. Cum trux Turcarum Tyrannus omnem Pannoniam in barbaram servitutem rede-gisset, Germaniæque immineret jam permultos dies in Austria obseffa Vienna tantis armatorum copiis quantas ullus Imperator ulla non modo hominum, sed etiam annalium memoria habuisse traditur, cumque jam sibi totius Orbis victoriam animo exultans repromississet, indomitusque, ac ferox urbibus Christianorum exitium intentans præceps ferretur, qui torrens, Dii boni! qui turbo, quæ tempestas, quæ procella, quæ flamma, quod incendium! Hic noster difficillimo reipublicæ tempore, dura conquestione paucis diebus conscripto, comparatoque exercitu, incredibili animi robore obviam factus est, si quo modo illum exultantem, atque impune volitantem retardare posset. Eius votis non defuit optabilis exitus, nam

Tyrann-

Tyranni præcipitem cursum, atque impetum repressit, furorem coercuit, ardorem restinxit, ferocitatem illam barbaram compressit, audaciam fregit, nec modo a Viennæ jam fessæ, propeque expugnatæ muris avulsam detraxit, verumetiam hostem superbissimum, incredibili virtute, profligato pene ejus exercitu, rebus suis tandem timere coegit, atque in turpissimam fugam, porius animi virtute, quam exercitus robore, & copiarum numero conjecit. Agite, Papienses; prodeat tandem aliquis ex vestris Literatis, qui huic Victoriz tam præclaræ perpetuis monumentis tradendæ se idoneum profiteatur. Quid hæretis? Excitate tandem aliquem ex tota Academia vestra, quam tantopere jactare soletis, semper Academias, semper Gymnasia loquentes. Nemo prodit. Silent omnes, credo hercle, rei magnitudine deterriti. Intellego, hoc primum Cæsaris egregium facinus Scriptoribus nostris facile relinquunt. Proponam alterum, si forte Papienses huic magis historiz enarrandæ aptiores esse se sentiant. Fuit multos annos ex omni aditu nostris legionibus clausa, & inaccessa Africa, ejusque litora nostris mercatoribus, & naviculariis erant infestissima, & parum tuta omnibus per illud Mare hætenus navigatio fuerat ob Castellum, quod incolæ Guletam vocant, positum in angustiis, & totius Africæ faucibus; quod erat specula, & propugnaculum Afrorum, tum natura ipsa, & situ, tum aggeribus, operibusque manufactis munitissimum objectum contra copiarum nostrarum impetus; ea enim arce in mare admodum projecta portus, qui ibi

est angustissimi aditus, tectus erat, & clausus atque ex omni aditu natura regionis vallatus, Hic alioqui magnum, ac firmum præsidium teneri semper solitum erat, custodiisque, & vigiliis die noctuque, propter magnitudinem periculi servabatur. Tunc vero Tyrannus ille, qui Tunceti regnum, ejecto per vim Rege justo, legitimoque, occupaverat, audita fama adventus Cæsaris cum exercitu, non ignarus totius illius Regni salutem a Guleta pendere, in ea amplius decem milia armatorum collocaverat. Sed quæ arx tam munita, tam inexpugnabilis, quæ Caroli V. virtute non expugnari possit? quis locus tam arduus, atque inaccessus, qui ejus legionibus, & copiis tandem non sit pervius? Appulsa igitur portui classe, legionibusque in terra partim positis, partim in navibus-retentis, vi, atque impressione utrinque facta, propugnatorum maxima cæde temporis vestigio, portum, arcem, propugnacula, castellaque omnia, incredibili, ac prope divina virtute in suam ditionem redegit, justoque, atque legitimo Rege in regnum restituto, sibi sola Guleta retenta, ne omnia barbarorum fidei crederent, ibique collocato Italorum, Hispanorumque satis firmo præsidio, frænum quodammodo, ac capistrum toti Africæ injecit, clausamque nostris legionibus patefecit; quod egregium facinus, ac præclare factum cum quovis veterum Imperatorum triumpho comparabile nunquam posteritatis gratissimus sermo conticescet. Ecquem, Papienses habetis doctissimum virum, qui flumen aureum Orationis semper fundens dicendi tanta copia præditus

dius sit, ut pro rei majestate hæc literarum monumentis sempiternæ memoriæ tradere valeat; speretque, se satis posse consequi dicendo quanta illa Cæsaris celeritas, quanta cura, quanta virtus fuerit? Neque hic hercule quenquam surgere video, qui Cæsarem ornandum suis laudibus suscipere ausit. Intelligo; Cremonensibus hanc etiam partem intactam, atque exortem relinquunt, seque fortasse reservant ad recentem ipsius Cæsaris de conjuratis totius fere Germaniæ populis victoriam suis scriptis celebrandam, quam ex tribus ejus præcipuis dimicationibus maximam fuisse arbitror. Ecquis vestrum audet tantam rem aggredi? tantam, inquam, quantam vix animo cogitare possumus? Nemo erat, qui non penitus esse adum de Germania existimaret, propter novam sectam vitæ, & officiorum omnium perturbatricem, paucorum quorundam scelere, qui animis ambitione corruptis traducti ad mala consilia, impure, & flagitiose vivendo magna reipublicæ vulnera impoluerant; quicquid enim est tenebrarum, jam imperitiæ multitudinis animis offuderant, & nobiscum de omni fere Religionis ratione dissensire coegerant. Vocabamur ab eis in controversiam ea, quæ publica omnium gentium, & nationum consensione, constantissimæque assertionis tot sæculorum approbata, & consecrata erant. Nec tantum de Diis immortalibus, de ceremoniis, deque omni Sanctitate prava, & impia sentiebant, verumetiam cupiditate rerum mutandarum, aut potius evertendarum capti, longe aliena de moribus, institutisque majorum, deque omni

ni

ni disciplina, & temperatione Christianorum impune prædicabant, convulsaque religione, & aris everfis, divorumque immortalium pollutis templis; sanctissimisque dirutis, atque prostratis delubris summa dementia, ac temeritate præditi, & nihil prorsus pensi habentes populos fere omnes a republica, & Romani Imperii legibus, male persuasos, atque seductos scelerata secessione deficere fecerant, usque adeo ad id dementiæ ventum erat, ut nusquam fere in tota Germania Imperatoris iussa, atque imperia audirentur. At Cæsar Dei Optimi Maximi beneficio ad hæc tempora procreatus, cum jamdudum omnes suas curas in rempublicam tuendam, propagandamque contulisset, ne aliæ cæremoniæ nobis essent, alii divorum immortalium antistites, aliique Religionum interpretes, existimans, non posse sine nefario scelere, ea tam tetra, tam tristia dissimulare, causam Religionis admiranda animi magnitudine suscepit. Comparato igitur Italarum militum, atque Hispanorum satis firmo exercitu, una cum Germanis illis, qui in officio, & fide permanferant fidelissimi, divina, atque eximia virtute sua bellicosissimarum Gentium crudeles, ac furibundos impetus primum retardavit, mox [ quanta cura Dii boni! quanto labore, patientia, vigiliis! ] omnibus exercitus sui Ducibus diuturnitate belli defessis suadentibus ab incæpto desistere propter magnitudinem periculi, & multiplicem difficultatem, præsertim alienissimo anni tempore ( accedebat enim ad frigidæ provinciæ naturam summa hyems, frigidissimaque anni tempestas, qua jure gentium omnia

omnia bella quiescere solent, cum etiam feræ latibulis se tegant ) ipse luce illa præclari, atque excellentis ingenii, quam omnes divinam toties, ac singularem experti sumus, ejus belli exitum longe prospiciens nunquam persuaderi potuit, quamvis affectus valetudine, ut vitæ suæ consulens, se cum exercitu ad tutiora loca reciperet, ubi posset saltem hyemem, & frigorum vim sub tecto, & pellibus vitare, quam nos sub urbium tectis luculento camino vix sustinemus. Ipse vero nunquam de spe dejectus cuncta cæli, aliaque incommoda æquissimo animo perferens nunquam destitit hostem persequi, sed in opere tam necessario usque ad belli exitum singulari patientia perduravit, consilioque porius, constantiaque, & animi magnitudine, quam ferro, & copiis cum gente sibi multis nominibus alioqui conjuncta felicissime decertavit, nec tantum populos ferocissimos, sædamque illorum crudelitatem a corporibus nostris avertit, verum etiam confertissimas copias contrivit, contudit, domuit omnemque Germaniam, nullis fere præliis, sed magis virtute, imperio, consilio, gravitate, constantia, animique magnitudine superavit, ad sanitatemque reduxit, atque recta de Religione, & de Divis immortalibus sentire assuefecit; imperatisque obsidibus, quot satis sibi visi sunt, illis jura, leges, agros, & pristinam libertatem reliquit, nihilque eis præter injuriæ licentiam eripuit. Ita hanc rempublicam, hoc sacrosanctum Imperium, urbes nostras, templa, sedesque Divum immortalium, fortunasque, & omnium liberos dimicatione, & periculo vitæ suæ conservavit; aras, sacra-

sacraque, & cæremonias restituit; pro quibus rebus ad primum nuntium tantæ victoriæ ei, ipsi agri Italiæ, ut mihi videbantur, gratias agere gestiebant.

Intelligitis, Papienses, quam uberem, copiosamque materiam vobis proponam, quanta occasio vobis præbeatur ostendendi, quanta sit dicendi facultas, vis, & copia Vestrorum hominum, qui se in scribendo exercuerunt. Nullus in Germania locus, qui non recentibus tanti Imperatoris victoriis, trophæis, ac monumentis illustratus sit. Si poetæ alicui diserto, atque facundo, cui sint nervi, & vires hanc provinciam mandabitis, quam jucundis ille digressionibus, quantis luminibus poema ornare poterit, ac collustrare? Videre videor illum inducere ipsos agros, ipsas sylvas, fluviosque, ac montes mutos tam ærumnosi Imperatoris tot incommoda prius commiserari; post victoriam vero, vel ipsas urbium sedes, domorumque, ac Templorum parietes Liberatori suo gratias agere, ut quocunque ille venerit, eo lux quædam, & salus venisse omnibus videatur. Plurimis deinde nominibus eum in Cælum multarum gentium victorem feret; testabitur in primis, eum omnia sua studia, omnem operam, industriam, cogitationem, mentem denique omnem in Christi nomine, religioneque, ac pietate propaganda defixisse; Intercurrent sapius loci, quos etiam ipse artifex elicere poterit, si se ipsi non sua sponte dabunt, ubi detur opportune singulares, atque divinas tanti Imperatoris laudes cumulate explicare, animumque illius excelsum, & altum, ac vir.



virtutibus exaggeratum posteritati tradere, idest eum suis laudibus ornare, virtutesque ejus singulares in animis, & quasi in oculis hominum oratione figere, tum propter belli divinam quandam, & incredibilem scientiam, felicitatem quoque, & gloriam ejus admirari, consilium, moderationem, abstinentiam, tolerantiam, eumque penitus suis coloribus depictum posteris commonstrare, sedatum, gravem, atque humana animo promentem, ac præter unam gloriam omnia despicientem. Diutius, Judices, quam necesse fuit, hunc locum urgeo, serius fateor quam oportebat, intellexi, cum neminem, aut certe perpaucissimos Papienses habeant, qui, non dico, tantæ provinciæ sint idonei, sed qui in his studiis sint in aliquo literatorum numero; usque adeo ad nihil literarum redacti sunt, ut eis opus fuerit hanc ipsam causam ad exterum hominem, & alienigenam deferre, cujus verbis, ac scripto in nos declamantes invherentur, neque illi in hac re calamitates temporum propter diuturnum bellum causari queunt, quod nobis etiam cum illis commune fuit. Nulla enim ætate aliquem suorum huc adducere possunt, qui aut suis, aut aliorum scriptis in re literaria nobilitatus alicujus nominis fuerit.

Dicturo autem de nostris, qui hac ætate non modo in literis se exerceant, sed etiam ad summam laudem, gloriamque contendunt, opus esset mihi cum Poeta nobili ordiri *Ἐσπερινὸν οἱ Μούσαι.* Hic ideo vos oratos volo, Judices, ne ex meæ tenuitate, aut dicendi mediocritate Cremonenses

Ora-

Oratores metiamini : in principio actionis attuli causam quare præteritis , atque relictis summis Oratoribus , ac doctissimis viris , quibus abundat Civitas nostra , ipse ego unus , neque ingenio , neque auctoritate , neque facultate par huic Causæ electus fuerim . Habet , ut etiam semper habuit Cremona in omni literarum genere tam Græce , quam Latine eruditissimos viros , quos omnes si hic enumerare vellem , tempus hercule me potius , quam Oratio deficeret ; neque me existimetis loqui de iis , qui literas primis labiis degustarunt , sed de iis tantum ajo , quorum laus sita est excelsa , & illustri loco , quorum sempiternis monumentis non tantum patria nostra illustratur , sed etiam hæc ætas amplissimam gloriam est consecuta . Hi enim sunt amplissimi in primis viri alta quadam mente præditi , qui ut apud sese essent , & ex natura viverent , se a subfelliis , idest ab omni ambitione in ocium contulerunt , multarum , atque optimarum artium scientia præclari , & in omnibus rebus præstantes viri , in primis honorati , & principes in Civitate , in ocio cum dignitate versantes , remoti ab invidiæ procellis , quos omnis Civitas adit , omnis ætas , omnes ordines consulunt . Tantæ autem sunt eruditionis , ut nisi essent temperatissimi , ac modestissimi , profiteri possent , se scire omnia , quæ sunt mandata literis ad omnem humanitatem , lumina , atque ornamenta hujus sæculi . Ex iis autem [ sunt enim non pauci ] aliqui multa , ac varia lectione instructi , sunt sola rerum cognitione contenti , neque admodum eloquentiam , neque agendo , neque scribendo exercent ,

cent, rerum, exemplorumque, & omnis vetustatis periti: alii vero ad hunc forensem usum Rethorum institutionibus perpoliti, omnibusque, & naturæ, & doctrinæ præsiidiis ad dicendum parati, ut de quacumque re ad quæstionem, ex tempore, non modo copiose, verumetiam ornate dicere possint, in quibus admireris tam amplitudinem Platonis, quam Aristotelis admirabilem quandam scientiam, & copiam. Hic sane aliquem non est necesse nominare, quoniam adhuc vivunt; sed fretus sum vestra prudentia, Iudices; scio enim plerisque vestrum eos esse notissimos. Qui vero se ad historiam scribendam contulerunt, non modo quam Latine, sed etiam quanta cum dignitate id munus obierint, relinquo orbis terræ iudicio statuendum, cum ea præsertim perfecerint, ediderintque, quæ de ipsis Caroli V. rebus præclarissime gestis moliuntur. Poetas autem habemus, non tantum suaves numeros, fabellasque, & omnem antiquitatem tenentes, sed cætera quoque, doctos, & sapientes, graves sane viros, & honoribus quoque amplificatos, qui interiores, & reconditas literas penitus perscrutati sunt, & ad veterum Poetarum laudem pervenere. Vix hic queo me continere quin tantorum virorum nomen jamdiu ubique pervagatum, nobilitatumque prodam præsertim eorum, qui extra aleam, supraque omnem invidiam jam sunt collocati. Sed neque etiam in hoc insultabo vehementius, neque insolentius oratione volitabo, tum instituti mei memor, ne quem ex iis, qui adhuc vivunt, vel honoris causa nominem, tum quod iidem ipsi cum

Cre.

Cremona huc proficiscerer, mihi id omnino interdixere contenti sua laude, & hominum conscientia: sunt nimirum prudentia, & temperantia moderati, ac continentes; & quamvis laudibus in tota Europa florent, atque hominum ubique ore laudentur, magna tamen laudis contemptione insignes sibi potius esse volunt, quam aliis videri; dicunt enim, sibi satis esse secum frui benefactorum recordatione, & quicquid agunt in iis studiis, quicquid moliuntur, non tam ad honestandum nomen suum, immortalitatisque commendandum, quam ut de communi hominum vita, præsertim de re Christiana, ut religiosi, & pietissimi, optime mereantur: omne enim studium suum, omnem curam fixerunt in ornanda Religione, commentitia disjungentes a fabula, ut quæ ab antiquis Poetis intacta, atque illibata usque adhæc tempora relicta fuerant, ipsi versibus latinis illustrata Musis commendarent, a quibus quoniam Christiana pietas, atque omnis sanctitas omnino abhorreere videbatur, neque cum eis aliquid commercii habere, ipsi magno labore, atque industria effecere, ut aliquis locus esset reconciliatæ gratiæ, & quæ ipsis Musis clausa, atque inaccessa hætenus fuere, pervia ipsi fecerunt, atque patentia. Hæc si negent Papienses, quod minime reor eos esse facturos, regiones mutas implorabo, & sola terrarum ultima, maria, portus, littora, & insulas. Quæ enim ora, quæ sedes, aut locus, quo non jam pervaserint poetarum nostrorum, non tantum fama, verum etiam ipsa poemata, ac monumenta tot ubique exemplaribus propagata, atque dif-

diffusa? ubique gentium leguntur, ediscunturque, & imitanda a præceptoribus doctissimis viris juventuti in scholis proponuntur. Quid vero etiam cum ea evulgaverint, quæ recentissime elaborarunt, sed adhuc tenent compressa, ut postea emendatiora, limatioraque edantur, poemata sane inusitata & incredibilia, de abditis, reconditisque rebus, quibus nemo est ausus usque in hanc diem aspirare? Et ut poetarum modo de poetis loquar, nostra ætate a nostris poetis ad summa inaccessarum rupium juga per asperrima montium molli admodum, & plano tramite adductæ sunt Musæ; ipsi tamen modestissime fatentur, se sperare alios quospiam post se futuros, qui viam, quam ipsi perruperunt, molliorem, ac faciliorem reddere possint Musis omnibus approbantibus: sibi satis esse quod aditum patefecerint, & tantæ rei ali- quod quasi specimen posteris commonstrarint.

Non committam, ut præteream duas præclarissimas Virgines Cives nostras, quarum altera, & Græcis, & Latinis literis apprime erudita, de quacunque re opus fuerit, & versu, & soluta oratione, non tantum docte, & copiose, sed etiam eleganter, & apposite dicit, ac scribit maxima cum audientium, & legentium admiratione: Altera, inter egregios pictores nostri temporis merito connumerari potest, multis aliis artibus, ac virtutibus utraq; insignes, utraq; bonis parentibus ortæ.

Multos habet Civitas nostra, qui, ut innuimus, Græce luculenter sciunt, sed neque etiam desunt, qui Hæbreorum linguam optime calleant

I

Viri

Viri insignes, & honesto loco nati. Alii quoque Ægyptiorum literas, & Chaldaeorum, Phœnicumque attigerunt. Hæc satis sint dicta de Literatis nostris, qui adhuc sunt superstites, in qua re est facile Papiensibus nos præstare, cum eorum, quos adducere queant, norim adhuc neminem: ea propter neque item ero multus in recensendis antiquioribus Cremonensibus illustribus viris de re literaria optime meritis, cum nostra Civitas in omni ætate amplissimos semper genuerit. Amissimus superioribus annis duos Literis, atque doctrina Græce, & Latine præstantes viros. Benedictum Lampridium Alphenum, & Hieronymum Fundulum, quorum morte sane immatura nostra Civitas, una cum tota re literaria, ubique magnam jacturam fecit. De iis mihi non admodum multa dicere est necesse, cum illorum adhuc sit adeo retens memoria, ut in animis vestris eorum nominis impressa esse vestigia certo sciam. Id aliis probabunt eorum luculentissima scripta, quæ ab hæredibus propediem, ut audio, edentur; illo etiam tempore, quo primum literæ, ac bonæ artes post devastatam a barbaris Italiam, sublatamque omnem humanitatem, reviviscere, & quasi postliminio restitutæ redire cæperunt, nostra Civitas tulit Baptistam Platinam in scribendis historiis inter omnes sui temporis qualescumque produxit ætas illa, admodum præstantem. Agnoscimus etiam inter nostros Joannem Balistrarium clarum testimonio illius auctoris, qui de Italia illustrata scribit historiam, cum etiam se in literis per eum profecisse fateatur. Sed ne, Judices,

vos

vos diutius teneam in talibus recensendis, revo-  
co vos tandem ad illustria, & felicissima tempo-  
ra, in quibus literæ, & bonæ artes ad summum  
fastigium pervenerant, cum summi essent Poetæ,  
summique Oratores, cæterique rerum scriptores  
omni ex parte in suo quisque genere, omnibus  
numeris absoluti, atque perfecti. Inter lectissimos  
Poetas fuit noster Quintilius Varus, carus Vir-  
gilio, Tibullo, Horatio, & cæteris poetis præ-  
stantissimis illius ætatis, ut Horatius ipse sæpe in  
versibus suis attestatur. Ejus viri judicio, atque  
censuræ sua poemata corrigenda, castigandaque  
non tantum inferioris ordinis Poetæ subiciebant,  
verum etiam ipse Virgilius admonenti, & quo-  
dammodo præscribenti obtemperavit. Non omit-  
tendum etiam mihi arbitror M. Furium Bibacu-  
lum, qui temporibus Lucretii Cari floruit, fuisse  
Cremonensem, ut comprobem quod dixi su-  
perius, Cremonam omnibus ætatibus habuisse vi-  
ros in omni literarum genere præclaros, qui Or-  
bem terrarum impleverunt nominis Cremonensis  
gloria. Hujus Poetæ non nulli versus etiam usque  
ad nostra tempora pervenerunt, licet propter æta-  
tem duriusculi; vix enim eo tempore Latini poe-  
ticam attigerant, quam paullo post ad elegantem  
cultum deduxere. Cæterum, quoniam dixi supe-  
rius omnem præstantiam ingeniorum in nostris ho-  
minibus evenire cum quadam vi Cæli occulta,  
solique natura, tum optimis Civitatis institutis,  
& legibus, id probare possumus non tantum in iis,  
qui ocium negotio prætulere, & ad studia litera-  
rum se contulerunt, verum etiam in illis omnibus,

qui versati sunt in republica; quorum virtus, iustitia, & integritas spectata fuit omni ætati magno theatro, ut intelligatur, Cremonenses præferendos esse Papiensibus, quod præstantiores illis viros semper habuimus, non modo optimarum artium scientia, verumetiam maximarum rerum gloria; quocumque enim animum, ingeniumque intenderint nostri homines, ibi summi fiunt, & quadam præstantia excellentes. Est plerumque nostrorum Civium ea patientia, ea virtus, atque frugalitas propter optima Civitatis instituta, quibus prohibetur licentia cupiditatum, ut nulla desidia, nulla luxuria ab officio, & a rectissima vivendi ratione revocentur, contra vero, omnibus summus labor in publicis, privatisque rebus, summa item parsimonia, summa diligentia. His adminiculis adjuti, qui ex Civibus nostris rempublicam administrarunt, id summa laude semper fecerunt, & cum quadam omnium admiratione; quod nostris temporibus vidimus in Andrea Burgio, qui carus prius Maximiliano Imperatori, mox Ferdinando ejus nepoti Romanorum regi, multa, & magna negotia in Italia, in Germania, Galliaque, & Hispania gessit, multis, & magnis legationibus functus, in quibus se omnibus probavit, ne mihi sit magnopere necesse ab inferis excitare tot antiquissimos Viros cives nostros, quorum consilio, virtute, rebus gestis, maxima gloria Civitati nostræ parta est. Quod enim hic me recensere posse arbitramini pares Marchisino Stangæ viro, & consilii magni, & virtutis exquisitæ, cui maximarum rerum fidem Ludovicus Sfor-

cia



cia semper habuit in reipublicæ Mediolanensis administratione, omnium consiliorum suorum participi, ne dicam auctori. Jo: Baptistæ Speciani vero quanta fuerit virtus, & in rebus gerendis prudentia, erit illis, qui hominem non viderunt, fortasse incredibile, vobis vero, Patres, qui cum bene nostis, non admodum multa dicere habeo. Meministis, eum primum inter alios juris peritos in judiciis prætoriiis, pedaneorumque judicum subfelliis versatum, operamque reis defendendis navantem a Francisco Sforcia ad majora evocatum fuisse, & in hunc ordinem vestrum cooptatum, simulque in tota Provincia Quæsitorem, & rerum capitalium non modo judicem, sed etiam vindicem constitutum, cum summa, & libera, in quemcumque vellet maleficii reum, animadvertendi potestate, mox multis, magnisque in rebus spectata viri virtute, quæ sub toga contineri non poterat, suis indiciis in dies magis, ac magis prodita, ab eodem Sforcia, Quæstor creatus est totius exercitus, quem ad se tuendum contra hostium potentissimorum vires maximum coegerat, & cum esset bonus consilio, nec minus bello strenuus, ita eam quæsturam administravit, ut non tantum com meatibus procurandis præfesset, præfectis fabrum præscriberet, stipendia militibus in tempore persolveret, populis, ac Civitatibus operas, vecturas, naves, remiges, arma, tormenta, bellicque instrumenta imperaret, & alia id genus administraret, quæ propria sunt ejus potestatis munera, verum etiam Sforcia omnia posuerat in ejus diligentia, ac fide, quæ ad Imperatorem pertinent, ut pene  
I 3 sum.

summam imperii teneret, legionibusque, non ad alterius præscriptum, sed suo arbitrio imperaret. Caruit tantum Imperatoris nomine, cum partes sustineret, omnesque Imperatoris numeros imple-  
ret. Nihil omnino agebatur in re militari, nisi ad ejus ductum, omnes etiam Literæ de ejus sen-  
su describebantur. Morte deinde sublato Sforcia, translataque omni Provinciæ ditione ad Cæsarem, eundem locum obtinuit apud Antonium Lievam ab ipso Cæsare provinciæ cum summa potestate præpositum. Vix homo Hispanus satis mirari poterat, quod quidquid Speciano muneris injunxisset, quamvis arduum, statim ille transactum reddebat, & omnia mandata celerrime exhauriebat. Majori etiam postea fuit auctoritate, ac potestate, summam imperii administrante Alfonso Avalo Vassio, qui etiam ipse ei summam rerum publicarum fidem habuit, non ob solam ejus operam, quam promptam, expositamque multos annos præbuit tribus illis præclaris viris, verum etiam propter alias singulares ejus virtutes, temperantiam, fidem, abstinenciam, innocentiam, & integritatem; tres enim illos Magistratus simul calce, & integre gessit, in quibus si late patenti potestate, atque licentia uti voluisset ad quæsum, non dico maximam pecuniarum vim, verum montes aureos, ut ajunt, conflare potuisset; atqui ejus animum nulla unquam lucri spes transversum egit, quem adversus pecuniam, avaritiamque, cæterasque cupiditates invictum semper gessit, utis, cui bonum, & æquum, omnibus divitiis carius, antiquiusque semper fuisset. Ita modice rem suam fami-

familiarem auxit, ut quemadmodum in ea paranda nemini unquam nocuit, nemini etiam invidiosa esset, cum tamen admoneri potuisset, non esse sibi in tanta occasione indormiendum, sed assidue operam parandis opibus navandam ob satis magnum numerum filiorum; jam enim jus duodecim liberum affecutus fuerat, quos omnes optima spei, & indolis in mediocri patrimonio reliquit morte immatura præventus, ob nimis laboriosam, ut ego quidem existimo, vitæ rationem, quam, ut demandatis sibi tot muneribus satisfaceret, jampridem susceperat. Defuncto Civitas nostra, ut Civi de patria optime merito publice decreto sepulcro, parentavit, justaque magnifice sumptu publico persolvit; quem honorem apud nos post hominum memoriam nondam ulli civium ante eum contigisse satis pro comperto habemus. Multus fui, Patres, in commemoranda hujus viri virtute; non tamen id nimium vobis debet videri, qui tanti Collegæ vestri præstantiam illam multis, & magnis virtutibus exaggeratam spectatam habuistis. Cogor tamen rationem hujus loci habere, & cæteros quamplurimos præstantes viros nostræ Civitatis, quorum operæ prærium esset hic renovare memoriam, silentio præterire; quod quidem minus moleste fero, cum meæ actioni parum id obesse intelligam; neminem enim suorum ad hos, quos memoravi, Papienses mihi objicere possunt. Neque etiam est, quod sane elaborem in recensendis civibus nostris præclarissimis viris, quibus per religionem Sacerdotia amplissima fuerunt demandata. Nempe mul-

tos, & magnos ex omni ætate viros enumerare possem, qui in honestissimis Civitatibus cæremoniis, & Sanctitatibus præfuere Antistites, infulis, religionisque insignibus ornatissimi, ex quibus etiam aliqui consecuti fuerunt, ut Romæ in augustissimum Purpuratorum Collegium cooptarentur, qui Pontifici Maximo tanquam Sacrorum Regi assident consiliarii, atque administri, quod puto Papienses non negabunt; cum etiam hac ætate non desint nobis præstantissimi viri, qui ad hunc, & illum honoris gradum honestissimis nominibus evecti sunt: nollis sane vos, Judices, qui Viri, quibus meritis id assequuti, nec omnino inficias ibo, non nullos ex Papiensibus quoque aliquando ad eadem Sacerdotia pervenisse, ad quæ nostri arrepti sunt; numquam tamen probabunt, suos nostris, qui adhuc vivunt, quemadmodum honore, ita quoque dignitate pares fuisse.

Demum omissis his, quæ in umbra, & ocio geruntur, ad Solem, & ad pulverem exeamus, MAJUS enim, ut inquit ille, OPUS MOVEO. Comparavimus hætenus virtutem nostrorum civium, cum virtute Papiensium, sed de ea virtute tantum egimus, quæ ad solius animi vim pertinet, & ad intelligentiam, nunc ea virtus in comparisonem veniat, quæ communis est animi, & corporis, quæque cum initium ab animi magnitudine sumplerit, tamen fundata est corporis viribus, ac nervis. Fortitudinem igitur, & vires, & robur utriusque nationis discutiamus, & alteram cum altera conferamus. Experiamur nunc an ad tantum dementiæ sit deventum, sintque isti tam insigni-

signite impudentes, ut audeant hiscere, cum intelligunt, hic agi de re militari, in qua nobiscum veniant conferendi, quo ab omnibus mortalibus cognoscatur eorum audacia, & impudentia, cum plane sint plures Cremonensi nationi præfecti militum, & duces, qui cum signis, & imperio eunt ad bellum, quam Papiensibus milites, pluresque nobis milites, quam illis cives, quod, Judices, non tantum vobis notum, sed omnibus prorsum populis, ac nationibus exploratissimum esse arbitror. Quoties expertus est Cæsar, quod & dicere solet, Cremonam esse sibi opportunum belli subsidium, ibique certissimos creari milites, quorum semper illud solum fuit seminarium? Sentit quotidie bellicosissimus Imperator, magnas, & firmas copias apud nos semper inveniri, seque semper habere Cremonæ paratum exercitum, expeditos duces, militum præfectos, & centuriones, & jam cunctis audio persuasum esse, in tota Italia Cremonæ in primis vigere disciplinam rei militaris, & hanc esse propriam, ac peculiarem quamdam laudem civitatis nostræ, cujus fuit semper præstabilis quædam scientia, ac præstantia in universo jure belli, ac pacis, usque eo, ut cum constat aliquem esse Cremonensem, jam vulgo inoleverit, ut eundem possis affirmare fortem, & artis militaris peritum, jamque de Civitate nostra vulgo prædicatur, quod de Ithaca olim Agesilaus quidam dixisse fertur, esse optimæ prolis nutricem, & virtutis Gymnasium. Id vero ne recens esse existimetis, & præsentis ætati fortuito, quodam siderum concursu accidisse. Pro comperto habetur, in nostra Civitate

te

te viguisse semper studia militaris disciplinæ, nostramque nationem semper habitam bellicosissimam, utpote qui a Populo Romano omnium gentium victore maxima ex parte originem traximus, quemadmodum majorum nostrorum res gestæ illustres veterum annalibus attestantur. Atque ego equidem de patre audiui, in urbe nostra, avi sui memoria, adhuc vestigia spectari vetustissimi templi, olim Victoriæ consecrati, quod mox mutata Religionis ratione, Victori Martyri a majoribus nostris dicatum fuit; & in eo fama celebratum est, fuisse aram Virtutis literis marmoreis conscriptam, ac consignatam. Proditum quoque reperitur monumenti Scriptorum haud contemnendorum, Romanos, dum essent rerum Domini, officinam armorum Cremonæ instituisse, ut apud eum populum, & qui sibi esset cognatione, & sanguine, nedum societate, & amicitia conjunctissimus, & quem rei bellicæ disciplina clarum noverant. Durat adhuc conservata a nostris hominibus Virtus illa, quæ fuit propria Romani generis, neque ulla unquam ætate Cremoneses obliti fuerunt pristinæ Civitatis suæ; servat plane nostra illa juvenus Martiam seminis naturam, non modo in animis, sed etiam in nervis. Nostri adolescentes boni, & fortes, flos omnis nobilitatis, non se dant luxui, aut inertię corrumpendos, neque se perditæ amoribus implicant, neque libidinum illecebris, sed jam id ætatis flagrant gloria, veræque laudis cupiditate ardentes, quodam animi incredibili robore præditi, quoties e ludo, ac pueritiæ disciplina redeunt exacto diei labore in literis, vacatio-

ne

ne a præceptoribus impetrata, alios adolescentes adultiores adeunt, quorum ætas Militiæ patiens, quique Sacramento implicati in aliquo bello nomen dedere in militum numero conscripti, illis penitus se dant in consuetudinem, & familiaritatem, cum illis de armorum genere loquuntur, de exercitationibus castrensis, de excubiis, de stativis, deque omnibus militaribus actionibus, paullatimque se labori assuefaciunt, ut inedie, algoris, & vigiliæ patientes fiant; ideo quotidie conspiciuntur, uti est mos Civitatis nostræ, equitare, jaculari, cursu, ac palæstra cum æqualibus certare ad exercendam virtutem, desidiamque minuendam; vix eis a parentibus de manibus arma extorqueri queunt; deinde, cum per ætatem licet, tradunt se in disciplinam alicui, cui sit eximia belli scientia, ut ab eo institui queant. Habet siquidem ea sive ars, sive studium, sive exercitatio, sive facultas a natura profecta, in nostra Civitate quosdam quasi Magistros viros ornatissimos, ac præclarissimos veteris Militiæ exempla, quorum virtus in juventute, & res gestæ in omni ætate illustres. Ad horum domos, quasi ad quasdam veluti scholas confluunt adolescentes, ibique certa quadam, & exquisita ratione disputatur quotidie de re Militari, de optima belli ratione, deque fortissimorum virorum, qui in laude vixerunt, virtute agitur, quaeriturque, quousque alicujus acute dictum, tam domi, quam militiæ dissimulandum, ferendumve æquissimo animo a forti viro, in quem contortum fuerit, quomodo etiam vindicandum, verbis ne refellendum, an facto

facto opus sit, præsertim si mendacii ille infimuletur. Qui deinde cum alio sibi certamen instituere possit; quosve provocantes, ut indignos negligere, & præterire possimus existimatione salva; an injuriose dictum, factumve, ullo verborum genere emendetur, aboleaturve; ad utrum pertineat alteri armorum genus præscribere, locumve pugnae dicere; quæ sint leges æquabiles privati certaminis, & cætera, quæ spectant ad hujusmodi dimicationem, quam vulgo, minus scite duellum vocant. Et quando res Militaris quoque, sicut cæteræ artes, habet sua præcepta, atque instituta, ornatissimi viri illi veterani, & multorum stipendiorum Milites precibus adolescentium humanissimorum inducti sæpe, coactique, permagna auditorum frequentia sermonem instituunt de iis rebus, quæ maxime inesse debent in certissimo, & oprimo Milite, ut omnes numeros expleat, ut de ejus officio, de vitæ ratione, tam domi, quam foris; aliam esse vivendi licentiam in castris; aliam in hibernis; temperandum omnino ubique ab injuria, atque maleficio, more populi Romani, maxime apud socios populos, Docent illi præterea adolescentes ab incunte ætate animum assuefacere ad omnes difficultates, atque acerbitates perferendas, & ubi ineundum prælium instat, aut ubi quodvis injectum est periculum, atque discrimen nihil prorsus metuendum, nisi turpem famam; nullove casu detrectandam esse Militiam, semper cogitandum, naturam homini exiguum vitæ curriculum circumscripsisse, immensum vero gloriæ spatium reliquisse; & quoniam



niam laxiore imperio tota ejus rei disciplina dissolvitur, exercitusque vel maximi interdum dilabuntur, admonent sancte ad antiquæ Militiæ rationem parendum esse ducibus, ac tribunis, enixeque cuivis cavendum, ne sæpe culpa sua in castris seditiones cooriantur; opus esse plurima semper facere, & pauca de se loqui, præsertim, ne quis ea, quæ non fecit, præ se magnifice, atque inflatè jactitet, semper glorias, semper pugnas loquendo; abstinendum item omnino ab inanibus provocationibus, ne quenquam ab re facile lacerant, procaces, ac petulantes; si vero ipsi fuerint lacerati, non dissimulandum, sed animo forti, atque alacri vultu, ne metum præferre videatur, pugnam suscipiendam, inimicitiasque, & fortiter propulsandam injuriam, paulatimque optimi Magistri ejus artis scientissimi ab imis inchoantes ad majora semper instituta, quasi per quosdam gradus progrediuntur, cumque Militem informant, ac perpoliunt, qui non tantum centurio, tribunusque Militum, sed etiam summus Imperator facile evadere possit. Idcirco prosequuntur etiam suo ordine, quæ sint centurionum ipsorum, tribunorumque, & cæterorum præsectorum, legatorum etiam partes, ut ad quemque spectet Militum suorum numerum, diligenter, sancteque integrum custodire, ne quis furtim subductus consideretur, stipendiumque nondum confectum auferat, item excubias singulis, & cætera munia pro hominum dignitate, aut facultate partiiri, ac distribuere, Militesque in officio continere, eorundem animos permulcere interdum, & motus sedare,

re, atque mollire, suam quemque classem administrantes, in seditiosos, & Militiam detrectantes animadvertere; furta, cæterasque injurias, & maleficia punire. Præcipue autem jucundissimum est præclarissimos Magistros audire, cum tanta auctoritate, tantaque dignitate semper rogati, atque impulsæ disputant, quibus virtutibus ornatum esse oporteat eum ducem, ad quem omnia aliorum ducum, ac præfectorum imperia respiciunt, summaque rerum, atque omnium consiliorum reducitur. Itaque illi non tantum auditores habent eos adolescentes, qui Militiæ Sacramento se alstringere cupiunt, sed etiam eodem animi causa conveniunt alii persæpientes, qui se in aliis artibus exercent. Mediusfidius ego in eis audiendis sæpius libentissime consumerem totos dies, si mihi esset aliquot tempus a negotiis publicis vacuum. Quid enim gratius esse potest, quam præstantissimos viros veluti heroes quosdam de maximis rebus maxima auctoritate disputantes sæpius audire? quas potissimum res oporteat inesse in summo Imperatore, neque enim satis per se esse contendunt rei Militaris scientiam, sed ei adjiciunt quoque virtutem, auctoritatem, ac felicitatem; has enim quatuor res concludunt oportere non modo inesse, sed singulas elucere in eo, qui in bello vult summe aliis imperare, ut præclare obire possit, quæ suæ sunt partes, jubere Milites apud se Sacramentum dicere, exercitum lustrare, atque aciem instruere, castris semper locum peridoneum capere, callide hostium consilia præripere, sua celare, ac dissimulare; super omnia famem, ac cibario.

bariorum inopiam vitare, cunctaque consiliis antevertere: providere ne ab hoste suis commectibus prohibeatur, sed potius eniti, ut illum omnibus copiis intercludat; hostibus item insidias collocare, eas ipsum vel abstrusas semper longe prævidere, ac præcavere; Militum licentiam castrensibus legibus, edictisque prohibere; urbes expugnare; aciem hostium profligare; scire uti victoria, præmia militibus pro strenue factis, militaribus donis, ad excitandam cæterorum virtutem persolvere, licet fortissimo cuique, sit per se amplissimum præmium ipsa gloria. Quid quoque agendum in angustiis rei frumentariæ, quidve cum receptui suorum timet propter imminens, subitum, atque improvisum periculum, cum, inquam, ex re atque ex tempore consilium capiendum; addunt multa de virtutibus Imperatoris, de labore in negotiis, de fortitudine in periculis, de celeritate in conficiendo, de consilio in providendo, deque communibus virtutibus, quas in Imperatore summe enitere oporteat, liberalitate, continentia, æquitate, ac severitate, plurimisque aliis; contra, detestantur avaritiam, libidinem, cæterasque indignas cupiditates, quibus, concludunt, nihil esse magis contrarium imperio, atque amplitudini. His, atque hujusmodi præceptis, & institutis informati nostri adolescentes evadunt strenui, certi, ac præstantes milites, quos maximis exercitiis secure possis præficere, quive patriam, ut in omni ætate semper fecerunt, præclare factis illustrare possint. Hæc studia vigent apud nostros cives; hæc sunt populi Cremonensis artes ad rationem

tionem veteris militiæ. Nec dubito, si Cremona urbs Græca extitisset, cum in Græcia floreret eloquentia, quin Spartanorum Civitate civium fortitudine præstantior haberi potuisset. Quid dicam de pueris, qui non modo in extremo pueritiæ tempore, sed in ipso ætatis flosculo ludicris exercitationibus vires explorant, divisæque in duas quasi colonias Civitate, hinc, atque hinc magno concursu ad bellum vicatim excitati, acie utrimque instructa collatis signis prælium ineunt animosi bellatores, & quando illis arma a parentibus, magistratibusque sunt interdicta, pugnis rem gerunt; usque adeo infestis animis confligunt, irasque, & animorum ardorem in hostem ferunt, ut persæpe utrimque ad sanguinem usque deveniatur, vixque a spectatōribus dirempto duello revocari, reprimique possint, pugnaque interdum avulsi torve hostem respectant, & animi ferociam vultu spirantes pejora minitantur; ita a parvulis duritiæ, ac labori student. Scio equidem commune esse omnibus nationibus, ut juvenus ubique belli sit percipida, forisque adolescentes æquioribus animis imperia ducum ferant, quam obeant quæ domi a parentibus mandantur, propriumque, & a natura insitum esse juventuti ( de ingenuis loquor ) arma cupere; nusquam tamen gentium arbitror ardentioribus studiis quam a nostris motum, & tumultum expeti, summeque expectari. Ad tenues belli rumores adolescentes nobilissimi quam alacres, Dii immortales! erecti, citati, armati, animis dum bellicum canatur, expectant; arma, saga, bellum flagitant; sed quid dixi nobilissimi, cum

cum iisdem studiis non tantum flos nobilitatis teneatur, sed idem omnibus sit ardor mentis ad gloriam? nec solum ingenui, & honesto loco nati, verum etiam tenuissimorum multitudo; omnes mente, voluntate, studio, voceque consentiunt cupientes, ut vera Romanorum soboles, illum spiritum, quem naturæ debemus, patriæ, & huic imperio gloriose reddere. Cum in Italia delectus haberi cæpti sunt, nusquam priusquam Cremonæ tumultum esse decernitur, nulla interposita mora iustitium indicitur; ad saga itur; in urbe maxima vis militum conficitur; nemo vacationem militiæ deprecatur; nemo utitur ætatis excusatione, adolescentes omnes ignominia notantur, qui militiam subterfugiunt. Intermittis forensibus, cæterisque civilibus negotiis, summi, medi, infimi dant nomen; qui literis studium navabant, relictis subsellis, eruditorumque umbraculis, conscribuntur; mercatores, opificesque, quorum quæstus in tabernis, ipsi quoque volitantes cupiditate gloriæ clausis tabernis, dimissoque sellæ suæ, operisque, ac quæstus quotidiani loco, arma sumunt; ex agris item robustissimi milites excitati, relictis aratris, cæterisque rusticis instrumentis, veluti prisce illi Quirites, quorum genus sumus, gladios, & pila arripiunt; maximæ statim constantur copiæ; priusque semper Cæsar in tanta oppugnatione rerum quas gerit, apud nos paratum, confectumque exercitum habet, quam alibi futuri belli rumor audiatur; quæ copiæ; Dii boni! quæ cohortes! quæ centuriæ! qui equitatus! quæ levis armatura! ibi; mediusfidius, robur est,

est, & soboles militum. Quippe, ut alia omnia nostri egregie, tamen hoc munus præclarissime administrant, nihil in bello, præter ignominiam metuentes; ut enim magnas, & firmas copias habemus, sic etiam earum expeditos duces, militum præfectos, tribunos, & centuriones, quorum rei militaris eximia est scientia; & ne me forte arbitremini, ut in plerisque Civitatibus contingit, de tribus, aut summum quatuor loqui, ajo, affirmitque, Cremonam subsidio mittere posse asperis, durisque temporibus ad propulsandum Reipublicæ periculum supra XL. duces fortissimos viros, qui interfuerunt bellis superioribus cum signis, & imperio, sciunt me non mentiri, si qui in hac corona adsunt, qui semel militiæ adscripti fuerint. Novit præclare ipsæ Gonzaga nostrarum cohortium nervos, & aliquando expertus est, atque ut video, mihi quæ dico, nutu affirmare videtur. Sunt enim tales ut non magnopere egeant mea commendatione; ipsimet fortissimi viri se solida vi, ac virtute probant; malunt ii profecto prædicationem laudis suæ collocatam habere in manibus suis, quam in lingua cujuscvis, vel eloquentis Oratoris, soliti semper plurimum facere, minimum vero de se loqui. Quoties cum proximis, tum superioribus bellis externi Italos ad ostentandam suæ quisque Nationis virtutem æquatis, & numero, & armis ad certamen provocarunt, ut constante fama, & multorum sermone celebratum est, in omni perduellium, pugillumve delectu, nunquam fere Cremonenses propter virtutis præstantiam præteriti fuerunt, semper.

perque; & victoriam, & victoriæ parta insignia magna cum Italiæ laude ab ea pugna reportarunt, cui aliquis nostrorum civium interfuit; illis enim ab ineunte ætate veluti natura insitum est quodam incredibili animi, & corporis robore magnis periculis ad summam laudem, & gloriam contendere. Ubi quippiam controversiæ, aut de sinibus, aut de jure agrorum, vel fluminum, ut fieri interdum solet, inter nos, & finitimos populos coortus, juniores nostri propter crebras præliorum contentiones ferocitate exultantes statim ad arma prosiliunt, atque ad suam vim revocare cupientes seniorum consilia semper caventium, quoad possunt, ne res ad manus, pugnamque deveniat, non verbis, & rationibus, sed potius pilis, & gladiis transigendum censent, vixque e manibus eorum arma evellere possunt seniores, quibus convenit impensius in medium consulere. Quod vobis, quæso, nunc, Papienses, esset consilium, nisi gravissimi viri nostræ Civitatis, quos addeceat magis ratione, quam armis protectos esse in posterum longe prospicientes, exultantem juventutem ob hanc ipsam controversiam repressissent? Ubi enim rumor hujus contentionis per urbem dissipatus est, statim armati adolescentes vicatim coacti maxima frequentia præsto affuerunt, ut sunt proni ad iram, animis exacerbati, cunctorum vox, & sermo erat. Quoniam agitur inter nos de principatu, quærat honor, & excellentia, non ex jure manu confertum, sed potius manu, & virtute periclitemur. Ponantur honoris, ac dignitatis insignia in medium: Sit vero fors domina cam-

pi, sunt, quibus sua cuique virtus, & Mars derint. Quæ tum vobis fiducia, quæ spes esse potuisset? quid si rei militari præstantissimus Ferdinandus id permetteret, ut tantæ controversiæ aliquando finem imponeret? Sed bene vobiscum agitur, quod licet Civitas nostra sit militiæ, bellicisque studiis suapte natura dedita, habet tamen gravissimos viros, quibus potissimum curæ est in posterum consultius providere, & ætatis fervorem in junioribus reprimere. Reserventur potius hæc militiæ robor adversus communes hostes hujus imperii, & tantum disceptatore Senatu, de jure nostro solidis rationibus experiamur; non enim, iis iudiciis, veremur quin vos tandem pæniteat in alienas honoris, ac dignitatis possessiones tam temere irruere voluisse. Non sum prædicaturus quas, quantasque res gesserit terra, marique, populus Cremonensis; remitto vos ad annales veterum, qui gentis nostræ semper habitæ bellicosissimæ rebus præclare gestis ubique redundant. Hic extollere possem multa majorum nostrorum egregie facta omnibus vestriis impressa, sed esset quodammodo historiam contexere velle, & annales veluti scribere: unum vobis satis esse posset, Papienses, ad reprimendam insolentiam vestram, quod supra innuere, ac significare tantum volui, cum de utriusque municipii frequentia agerem. Confesto enim a Romanis bello secundo Punico, & secuto Macedonico, cum capta Placentia, Galli que circum Padum habitabant, & Ligures rerum novarum cupidi, Amilcare Poeno Duce, trajecto Pado Cremonam ferro, manu, copiis oppugnatam obli.



obsiderent, ejus populi virtute, multorum dierum obsidione tollerata, tandem audito auxilium copiarum, quæ a Romanis subsidio missæ fuerant, adventu, facta eruptione, non solum civitas, ver-  
sis in fugam hostibus, se ab obsidione liberavit, sed prælio into, totum Gallorum, Ligurumque exercitum profligavit, ac potius delevit, cæsis, captivæ supra Gallorum quinque, & triginta mil-  
libus, interfecto insuper Amilcare, cum tribus Gallorum Ducibus apud illam nationem summo loco natis. Hac nuntiata victoria tanta fuit Ro-  
mæ lætitia, ac gratulatio, ut a Senatu trium die-  
rum supplicatio decreta fuerit. Monstratur adhuc a nostris locus tantæ pugnæ; (Battalionem ap-  
pellant) ab urbe circiter mille passus distat, quem etiam nunc ab eo prælio nomen servare arbitra-  
mur; prælium enim Galli Battaliam vocant. Quæ  
vero postea, & quanta bella Cremonenses, dum  
suis legibus in summa libertate viverent, contra  
finitimos populos gesserint, quasve victorias, &  
triumphos reportaverint, nihil hic sane est neces-  
se commemorare, sed multa eorum insignia ca-  
pta adhuc apud nos servantur, carri, & naves  
vetustissimæ, quæ omnia missa facio, ne vicina-  
rum, ac sociarum Civitatum invidiam in nomen  
Cremonense concitem, odiaque restincta resusci-  
tem, cum amicitia nunc sit inter nos, & sum-  
ma benevolentia, & ut videtis, in hac causa no-  
bis summis studiis adsint, atque a nobis quic-  
quid imminet periculi, cupiant propulsare. Quo-  
niam autem Juventutem Cremonensem interdum  
bellicosam, ferocem, Martiamque appellavi, ne

quis forte autemet, gentem nostram natura solum fortem, ac robustam, vi, atque impetu animi valentem, pronamque ad iram, & omnibus sine delectu, atque discrimine infestam esse: sunt cives nostri ( fateor ) militiæ plurimum dediti, miraque omnibus est aviditas belli, & gloriæ cupiditas; nihilque nisi turpe nomen, & famam metuunt; ea tamen est omnium fere disciplina, ac temperatio, suntque ita plerumque a majoribus instituti, ut nemini pacato unquam noceant, nec nisi laceffiti ad arma veniant. Quin ipsa natura, & consuetudine lenissimos, atque humanissimos omnes, quibuscum eis est res, experiuntur; militiam sancte, atque integre colunt; in hibernis, cum socios difficillimis temporibus opus est sumptum facere in militem, sunt abstinentissimi, & de suo potius hospites egentes, & miseris coopertos propter diuturna bella liberaliter alunt. Nostri vero duces, & militum præfecti, tribuni, ac centuriones ea fide, & integritate obeunt munus suum, ut nemo unquam, non dico notatus, sed ne accusatus quidem fuerit, quod ab eo falsus deferretur militum numerus, quodve quæstui equites haberet, nihil loci est apud eos avaritiæ; omnia referunt ad gloriam, quæ apud nostros semper omnia potuit: exacto bello, Imperatoris judicio laudati, quod opimæ prædæ loco nationis nostræ hominibus semper fuit, domum redeunt, forumque, & relicta subsellia repetunt, non multo minus domi, quam militiæ præclari opifices, ad suæ quisque sellæ, operisque, & quotidiani quæstus locum revertuntur; inter-

mis.

missamque textrinam, sutrinamve, aut agriculturam, ac cæteras quisque suas artes redintegrant domi togati, armati foris; perpetuo majorum nostrorum more, non furtis, aut latrociniiis dediti, ut pronum est alibi nostra tempestate militum genus, nulli sicarii, nulli percussores, nulli lanistæ, sed suo quisque labore, atque opera vitam tolerant nullius rei nisi laudis cupidi. Qui igitur honestis patrimoniis carent, in aliqua se compendiarie arte exercentes, expectant dum rursus orto bello Imperatoris jussu ad arma vocentur malorum artium insolentes.

Qua vero fide nostri Duces, & Milites, populusque, & tota Civitas erga Rempublicam, atque erga Sacrosanctum Imperium se semper gesserint, quis ex Livii historia facile intelligere poterit. In omnibus enim bellis, quæ Romani gesserunt contra Carthaginem, contra Philippum Macedonum Regem, contra Aetolos, Achæos, Antiochum Regem Syriæ, & Persen, quem Æmilius devicit, nunquam Cremonenses destiterunt de Romanorum Imperio bene mereri, eis ad præscriptum semper milites dando, & stipendia, ad constitutum diem persolvendo. Illustrius tamen Cremonensium fides visa est elucescere, præ omnibus aliis, bello secundo Punico. Nam cum ex XXX. Colonis, [tot enim Romani tunc habebant] XII. fessæ propter diuturnitatem belli, atque ad extremam inopiam, & solitudinem reductæ recusarent Romanis pecunias, & milites dare, & propterea consternatis animis Romæ judicaretur actum esse de imperio, quod reliquas idem esse facturas pu-

taretur, fuit Cremona inter illas XVIII. Colonias, quæ in fide, & officio permansere, quæve Romanis responderunt, se milites paratos habere ex formula, & plures etiam daturos, & quicquid præterea populus Romanus imperaret, velletque, enixe facturos; ad id neque sibi opes deesse, animum etiam superesse; neque se eos unquam deserturos, sed eundem casum subituros quemcumque populo Romano fortuna tribuerit. Consules Legatis eorum responderunt, sibi parum videri pro merito eos sua voce collaudari, nisi universi Patres in Curiam coacti gratias omnibus egissent; nec tantum Senatus eos honoratissimo Decreto est allocutus, verumetiam ad populum produxit, ut inter alia præclara, quæ ipsis, suisque majoribus digna præstitissent, etiam commemorarent recens eorum meritum, quod tanti fuit momenti, ut Livius testetur, earum Coloniarum subsidio tunc stetisse populi Romani Imperium, præfatusque sit idem auctor exquisitis illustrium verborum ornamentis, se non commissurum, ut eorum fides, & virtus post tot sæcula sileatur, fraudenturve laude sua, singularum nomina recensendo; inter eas autem Cremonam fuisse, ejusdem Scriptoris, aliorumque testimoniis clarissime constat. Nemo unquam nostrorum civium memoriæ proditus fuit, oppidum, arcemve, aut propugnaculum fidei suæ ab Imperatoribus creditum pretio corruptus hosti vendidisse; non quæro, vestri ne cives ullo unquam tempore id fecerint, nam mihi constitui meos potius laudibus suis ornare, quam si quippiam a vobis peccatum esset oratione insectari.

Nemo

Nemo unquam ex nostris militibus memoria non modo hominum, sed etiam annalium prodicionis, aut perfidiæ insimulatus fuit; nemo notatus ignominia, nemo ex tot cohortibus, quas nostra Civitas ad bellum misit fluxæ fidei transfugæ loco habitus est. Omnibus ab ineunte ætate ob disciplinæ veteris sanctitatem insitum est, præsentis fructus negligere, posteritati tantum, & gloriæ studere. Cum bellum imminet, in Municipiis ab Imperatore externi milites, ut præsidio sint, locari solent, in urbe vero nostra nullum exterorum præsidium collocatur. Committitur Civitati ob ejus singularem, divinam, & incredibilem fidem, ut ipsa sibi sit præsidio, quod nulli aliæ Coloniz, aut Civitati permitti solet. Compertissimum est, & veterum annalibus valde celebratum, majores nostros aliquando sociis, & sæderatis, sicut Seguntinos, & Massilienses, fidem usque ad perniciem coluisse. Cum enim post C. Cæsaris mortem Romani in spem recuperandæ libertatis ingressi essent, videreturque interim aliqua species Reipublicæ reviviscente libertate, alterum fatali quadam calamitate bellum civile exortum est, aut potius idem redintegratum C. Octavio regnum appetente, oppugnataque ob id iterum libertate, cumque illi sese Brutus, & Cassius, & non nulli alii principes Civitatis opponerent, discerptusque esset populus Romanus in partes duas, Cremonenses homines longinqui, & ab urbe Roma valde remoti, ambigentes utra pars justiore causam haberet, utrisve potius obtemperandum, ad illam partem, quæ postea victa fuit,

fuit, fato nescio quo Civitatis nostræ misero; atque funesto impulsus sunt, potius culpa erroris humani, quam scelere, secutique sunt eam causam, quam semper probarunt antequam belli civilis ulla esset suspicio. Si fatendum est eos errasse, erraverunt opinione officii, stulta fortasse, certe non improba, specie quadam Reipublice decepti; qui error fuit communis cum multis, quibus visum est potius totius Civitatis auctoritatem sequi, quam unius hominis voluntati parere, cum præsertim non esset eorum iudicii, neque virium discernere utra pars iustius pugnaret. Opinione igitur lapsi, si aliqua humani erroris tenerentur culpa, a scelere certe liberati erant. Sed erroris sui haud debitas quidem, verum necessarias cum multis aliis populis poenas dederunt, diviso eorum agro post Philippense prælium, datoque veteranis; quæ res etiam Mantuanis propter vicinitatem damno fuit, atque incommodo, ut Publius Virgilius testatur vulgato carmine deplorans patriæ suæ calamitatem. Temporibus etiam Vitellianis civium meorum fides inviolata, perpetuaque constantia, Civitatem adduxit in maximas calamitates. Cum enim jam Vespasianus regnum affectaret, eam, ut supra memoravi, prælio ad Bebriacum pugnato, tolerataque multorum dierum obsidione, captam, direptam, everfam, ac complanatam prope delevit, ut vix simulacrum urbis, aut ullum vestigium remanferit, quam calamitatem nemini dubium esse potest, si historiis credimus, Cremonenses accepisse, quod nullis periculis adduci potuerint, ut omnibus

nibus malis, atque incommodis confictati Vitellio Imperatori fidem fallerent, qui antequam ulla illius civilis belli esset opinio, urbem in potestate habebat, civesque sibi jusjurandi religione obligaverat. Scit etiam Carolus V. Imperator, & meminisse potest, quantis incommodis, detrimentisque affecta fuerit nostra Civitas diuturna illa obsidione, ne sacrosancti hujus Imperii exercitum desereremus, qui difficillimis temporibus duce Corradino Germano, nihil potius habuit, quam Cremonam confugere, & salutem suam Cremonensium non minus fidei, quam muris credere. Populus Cremonensis, ea virtute, quam supra memoravimus, præditus, sumptis armis, perfecit, ut Cæsariani milites æquissimis conditionibus incolumes ad unum dimitterentur, multis tamen prius a Civitate, ut id efficere posset, acceptis detrimentis. Longum esset, & prope infinitum omnia enumerare majorum nostrorum egregie facta, in quibus eorum officium, ac fides erga Rempublicam, & socios cum virtute enituit; unum tamen silentio non præteribo. Quippe superioribus bellis cum inter Cæsarem, & Regem Gallum pactæ essent multorum annorum induciæ, Gallus, qui Mediolanò, ejusque totius provinciæ ditioni, a qua dejectus fuerat, aspirabat, rerum novarum cupidus, quietisque diuturnæ impatiens, violatis clam induciis, Albam, Clarascumque, municipia in Ligurum finibus minutissima, quæ a Cæsarianis tenebantur, a suis tentari, capique jusserat, missisque per noctem ab Augusta Taurinorum tot cohortibus, quot judica.

dicabat satis fore ad eam rem patranda, biparito exercitu sine ulla difficultate Clarascum cepit, perterritis repentino tumultu, nocteque in-tempesta Cæsarianis militibus, qui ibi erant in stativis. Albam quoque jam deventum erat, jamque Gallicanus exercitus duce Jo: Antonio Benevellano, superata fossa, admotis scalis, muros ascenderat, aliqui etiam demissi ad terram, urbem jam ingressi erant, Cæsarianis stipendiariis, qui ibi in præsidio collocati fuerant, cedentibus, arcemque, & tutiora loca urbis propere petentibus, parumque absuit quin Albæ eadem fortuna fuerit, quæ Clarasci; munitissimumque municipium, quod semper fuit contra Gallorum vim Cæsaris oppidis, ac rebus valde opportunum propugnaculum procul dubio devenisset in hostium potestatem, nisi obstitisset insignis fides, & memoranda virtus Cremonensis Sacerdotis, qui est in ea Civitate Sacerdotum Princeps, & Sacrorum Antistes. Ille enim, audito tumultu, cognitoque periculo, statim abjecta pontificia persona, sumptoque sago, populum sibi incredibili benevolentia devinctum, multisque nominibus obnoxium armavit, factoque agmine ad semicaptæ urbis locum properavit; hostes, qui jam ingressi fuerant, capti sunt; qui murum ascenderant, dejecti, deturbatique in fossam præcipientes. Demum cæteri omnes fugæ consilium, projectis omnibus, ceperunt, multis relictis scalis, ludibus ferreis, harpagonibus, cæterisque bellicis instrumentis, cum magna vi pulveris sulphurei, quibus omnibus Albenis populus potitus fuit. Facile poterant Galli ad unum occi-



occidione occidi, omnesque illæ Cohortes Gallicæ penitus deleri, nisi in posterum providens Episcopus veritus esset, se, & suos nocti committere. Si igitur Sacerdotes, quorum vitam, & consuetudinem alienam, remotamque esse oportet ab armis, tanta virtute præditi sunt, tamque præclara facinora faciunt, ne non in fide permansisse argui possint, qualem militum nostrorum, Patres, virtutem, ac fidem esse arbitramini? Interrogatus postea aliquando ab amicis Sacerdos ille noster, licuerit ne Pontifici posthabita religione, arma capere, & se profanis, & bellicis actionibus implicare, respondit, licere omnibus a patria periculum propulsare, & se esse ejus generis, & Civitatis, quæ Reipublicæ semper utilis fuit, & fide, & virtute, neque se posse a suis degenerare. Possem præterea hic congerere innumerabilia Diplomata a Romanis Imperatoribus nostræ Civitati attributa, in quibus, ipsorum testimoniis fides Cremonensium ad Cælum usque tollitur. Federicus Imperator ob insignem civium fidem honoris causa, Cremonam appellat fundamentum Imperii, ob eandem fidem, quam nostri Imperatoribus inviolatam semper præstiterunt. Lodovicus Cremonæ cudendæ monetæ potestatem dedit, Cremamque nobile oppidum ei subjecit, cæterique posteriores Imperatores, qui Civitatem nostram aliquo beneficii genere prosecuti sunt, præfati fuerunt, id dare, ut esset fidei gentis nostræ sempiternum monumentum. Non negabit id, qui Diplomata ab Atavo Caroli V. ejus nominis Carolo IV. data legerit, quorum testimoniorum fidem

fidem sanctam esse oportet. De ipso autem Carolo V. nihil sane est necesse dicere; qui sapius populi Cremonensis fidem, atque constantiam expertus est, atque quotidie experitur. Ne quis forte vero autumat, me loqui de nostræ Nationis spectatissima fide in rebus tantum publicis; idem sentio judicandum esse de mutua civium inter se fide, & integritate in privatis negotiis.

Namque, ut cætera vitia insignia non audiuntur in Civitate nostra, Divorum, ac religionis contemptus, parricidia, testamentorum suppositiones, venena, circumscriptiones adolescentium, incestus, aliaque id genus tragica libidinum portenta majoribus victimis expianda, deportandaque in ultimas terras; maxime a nostris abest perfidia, atque avaritia, qua inhiant toties alibi est locus fraudationi. Si quis apud nos quempiam fraudasse in contrahendis negotiis deprehensus fuerit, statim, ut pestilens, aut parricidia ab omnibus evitatur, nemo rationem cum eo, nemo rem ullam contrahit; omnes ejus non modo commercium, ac consuetudinem defugiunt, sed etiam aspectum exhorrescunt. Quicquid agunt nostri, seu vendant, seu emant, conducantve, aut locent, aliisve rationibus contrahendis implicentur, fide bona, ac prisca id plurimum faciunt, quemadmodum inter bonos, ut dicitur, & prisca formula agier oportet. Id quoque non possum hoc loco silentio involvere memoratu dignum, quod in Civitate nostra nuperrime factum poterit sempiternum exemplum esse, & monumentum contra perfidiam, atque avaritiam; neminem nominabo,

ne

ne ab instituto discedam, quoniam optimi viri, quorum fides mihi est explicanda, adhuc vivunt; neque ipsi nominari volunt contenti sola optime facti conscientia. Quidam in Civitate nostra satis dives, qui multos annos amplissimo, atque opulentissimo Sacerdotio præfuerat; homo frugi, & parcus e sua longi temporis parsimonia permagnum auri cœlati, atque signati pondus conflagravit; is, magis morbo, quam ætate confectus, quod esset tenuis admodum valetudinis, intelligens sibi vitæ finem adesse, sciensque, eam pecuniam haudquaquam hæredibus suis, sed magis illis, qui aliorum misericordia vivunt, deberi, ut e sacris fundis, frugibusque, & fructibus quæsitam, duos ornatissimos, atque optimos viros Civitatis advocat, qui sibi aliqua consuetudine conjuncti erant, quique in Civitate semper habiti sunt digni, quibuscum, ut ajunt, in tenebris mices, eosque remotis arbitris secreto in cubiculo flens allocutus asseruit causam, cur eos potissimum accersierit sub extremam vitæ suæ horam; se semper ambos eos viros judicasse, quibus nunquam bono, honestoque divitiæ potiores fuissent; se igitur nunc ambos obtestari, per amicitiam, fidemque, ac probitatem, quas semper, sancte, ac prisce coluisse omnibus judicati sunt, atque ab eis vehementer petere, summeque contendere, ne sibi deessent, suæque ultimæ voluntati, quam testamento committere non poterat legibus prohibitus, & religionibus, quibus alligatus erat, impeditus; opem ferrent; non se invitum e vivis excedere quod omnibus officiis, ac muneribus mortali-

lis

lis vitæ satisfecisse sentiret; cursu bene confecto, expletaque peregrinatione, esse tantum unum, cui se defuisse doleret; hoc solo angi, & minus alacri animo ad æternam illam, & communem domum demigrare; id autem esse tandem, quod ex religiosorum prædiorum fructibus aliquam pecuniarum vim ad summam plusquam mediocrem congessisset, ut fundos coemeret, unde ali posset satis amplus numerus hominum, a quibus res recessisset, quosve mendicare ingenuus pudor prohiberet, memores generis, & pristinae suæ fortunæ; id se facere in vita quotidie comperendinando utque in hunc diem distulisse: nunc autem cum sit mortui proximus, imminere periculum, si res extra emanet, ne in eam pecuniam irruatur; opus esse silentio, ac fide. Se igitur omnem rem amborum vicariæ fidei, & pietati committere; quibus dictis, eis, nullo teste, auri copiam fecit, quod ambo, rei ipsius domino solo vidente, sub pallio asportarunt, auroque onusti domum suam uterque redierunt; submisso deinde ab eis ignoto homine, cui ad speciem, ut hoc commento rem tegerent, & a se omnem auri suspicionem removerent, ægrotans Sacerdos saculos oblongos vili plumbo pro auro refertos tradi iussit quasi per Sycophantiam, mandavitque ei coram familiaribus, ut de, nescio quem, commentitio nomine deferret. Mortuo non multo post Sacerdote, pecunia expensa, cum primum data est facultas mercandi fundos, ejus voluntatem optimi viri, optima fide, ad obolum executi sunt. Jam dudum, iudices, quietus verba facio, absque contentione,

&

& multa me dixisse sentio extra comparisonem<sup>3</sup> non tamen eadem videri possunt extra causam. Quid enim ad ea, quæ extremo loco plurima de Civitate nostra prædicavi, adversarii habere possunt, quod de suo Municipio mutiant? eo autem tendit mea tantarum virtutum de Civibus nostris prædicatio, quas commemoravi omissa omni contentione, ut, quod inter mortales semper fuit difficillimum, gloria invidiam saltem vinceremus.

Hæsterna, hodiernaque actione breviter profectus sum singula, quibus quæque Civitas alia aliam antecellere possit. Nam in dicendo, in omni scientiarum, artiumque, & virtutum genere semper mihi se amplissima silva offerebat præstantissimorum hominum Civium nostrorum, verum in pauca contuli, ut hanc molestiam citius a vobis, qui maxime estis occupati, dimoverem. Et enim in singulis rebus ejusmodi materies redundat, ut singulos dies commode consumere possem. Verumtamen in omnibus facile probavimus Cremonam Papiam longe superiorem esse, ut quisque manifeste intelligere possit, Papienses de excellentia cum omnibus provinciæ Civitatibus contententes dejectos esse omnino de principatu, eosque hære in salebra, & undique teneri, a tergo, a fronte, a lateribus; eorum causam labare, totam rem vacillare, convulsis iis omnibus fundamentis, quæ eis validiora, solidioraque videbantur, probavimus, Cremonam longe Papiam antecellere antiquitate originis, nobilitate generis, frequentia populi, civiumque splendore; ædificiorum item,

L

tam

tam publicorum, quam privatorum magnificentia; censu quoque, ac divitiis; soli felicitate, & ubertate agrorum; moribus, legibus, & institutis; industria, optimarumque artium studiis, virtute imprimis; fideque, ac gloria rei militaris, Quæ omnia non modo locupletissimis testimoniis, firmissimisque argumentis probavimus, sed etiam physicis, exploratisque rationibus confirmavimus, quas nunquam adversarii illa emptitia Oratione refellere valeant, quam ardentibus studiis audire cupimus, ut videamus quæ sit tanta Oratoris conducti eloquentia, aut potius confidentia. Adducere poterunt, ut ad hæc respondere, aut omnino hîscere audeant, cum res ipsa loquatur, cum omnia non modo explicaverim, sed ante oculos ita representaverim, ut queatis ea, non dico intelligere, sed etiam sensibus comprehendere? Si mentis erunt sanæ, nec ita prorsus excordes, non elaborabunt ut confutent ea, quæ, non dico, vicinarum Civitatum, sed Orbis terræ iudicio, ac testimonio comprobantur, ipsi etiam eadem confitebuntur, atque approbabunt, & si qui Viri graves, & probi sunt apud eos, esse enim complures arbitror, ii si me audient, omnem culpam transferent in cupidam juventutem, ejus dementiam deprecati, quæ non publico consilio, sed privata temeritate turbulentissima ratione controversiam in re tam perspicua, tam alieno tempore excitavit, solaque confessione dabunt pœnas rei male salutaris, & penitus omissam hanc causam, atque desertam abjici, taciteque antiquari patien-

patientur, nisi velint ab omnibus explodi, atque exhibilari. Ita, Iudices, vestrarum occupationum rationem habentes, a vobis hanc molestiam dimovebunt, ne crastino die vobis audire sit necesse me refellentem ea, quæ secundum se facere adversus nos contendunt.

MULIOMINI



L 2

CRE.



## CREMONENSIIUM ACTIO TERTIA.

*Adversus Papienses in Controversia  
Principatus.*



Perabam, Judices, ex iis, quæ hesternâ actione satis explicate pro facultate differui contra Papienses in contentione amplitudinis, me imposterum dicendi labore, & vos audiendi tardio pariter levatum iri. Nemo enim ex illis, qui aderant, fuit, ut intelligo, qui non judicaret adversarios tot constantibus rationibus superatos, planeque convictos, ac manus dantes ultro cessuros, abiturosque deserta, abjectaque causâ, cum ad ea, quæ ego differuissem viderent, nihil quod eos admodum levaret responderi posse. At vero illos de suscepta causâ nulla vis, nulla ratio depellere potest controversos, & inquietos; suamque temeritatem nimis impudenter, perfractæque defendere adhuc volunt. Mirabar mecum quænam esset istorum tanta arrogantia, undeve originem duceret. Interim quidam



dam adolescentes nostræ Civitatis nobilissimi, qui hoc tempore Papiæ juris civilis scientiæ perdiscendæ dant operam, me admonuerunt, se totam actionem Papiensium legisse in hac controversia dignitatis, ab aliis adolescentibus sibi familiaritate conjunctis imprudenter traditam; & eam quidem, retulerunt, haudquaquam esse perpetuam orationem, sed interruptam potius scriptionem, & quædam quasi tantum capita rerum instar commentarii paulo plenioris, quibus rationes, & argumenta Papiensium continentur, quorum quatuor, ad summum quinque validiora, & firmitiora sibi videri, reliqua vero posita esse, ut numerum augerent, & Orationem ipsam pleniorē, ac referriorem efficerent. Nihil illos magnopere efferre antiquitatem originis urbis suæ, aut conditorum nobilitatem; nihil minus quam de populi frequentia elaborare, nihil de optimis majorum institutis; de moribusve, & legibus Civitatis, de censu, & fortunis, urbisque amplitudine mirum silentium; de splendore civium, ne verbum quidem; de virtute, & industria hominum illos omnino obmutescere, ut intelligatis, eos non esse usque adeo stolidos, ut ausi sint mentionem facere de præstantia eorum virorum, qui doctrina exculti se literis, atque artibus dedunt homine libero dignis: nihil illos penitus de arte Militari, deque minorum opificum solertia, nihil de fide præstita, nihil de majorum suorum commendatione dicere. Omnem illorum fiduciam in illis quatuor, aut quinque positam esse, illaque eos sola prædicare, atque intoleranter jactare. Demum præter ea, quæ jam.

pridem in iudicium attulerunt pro sua causa, ne  
 literam quidem addere exceptis contumeliis, quas  
 nobis imponunt. Significarunt enim nostri illi ado-  
 lescentes, eorum Orationem admodum dentatam esse,  
 & rabiosulam, magisque eis esse aculeos, quos in  
 nos exerceant, quam nervos; pro quo parem gratiam  
 relaturus eram, nisi Civium meorum æquitas, ac le-  
 nitas, meaque modestia obstarent; nunquam illi pro-  
 fecto apud ingratos beneficium posuissent; verum no-  
 stræ gravitatis semper fuit jus nostrum prosequi sine  
 summa adversariorum ignominia, tametsi Oratoribus  
 ubique gentium antiquissimum fuerit, Romæ præ-  
 sertim, & etiam in Græcia, ubi humanitas nata  
 esse dicitur, cum adversario agere, non modo li-  
 bere, sed interdum etiam accusatorie, cumque  
 cavillando, probris, & maledictis, citra tamen  
 petulantiam, figere. Illi nobiscum, ut libuerit,  
 nos autem cum eis agemus more nostro. Videamus  
 tandem quænam ea sint, tam solida, tam  
 firma tantæ superbæ firmamenta. Audite quæso;  
 Iudices, atque animadvertite. Ajunt, Papiam Cre-  
 monæ præferendam; primo; Quod in ea historia,  
 ubi agitur de pace Constantiæ, cum contingerit  
 utriusque Civitatis fieri mentionem, ordine præ-  
 positam fuisse Papiam, ut ibi legatur, PAPIAM,  
 CREMONAMQUE. Idem factum fuisse in no-  
 vis Constitutionibus Caroli V. Imperatoris nuper  
 editis in provincia Mediolanensi servandis; eun-  
 dem quoque ordinem semper tenuisse ferunt Sfor-  
 cias Mediolani Regulos; & quotquot huic pro-  
 vincię ab Imperatoribus Romanis præpositi fue-  
 runt, eosque in omnibus decretis, & epistolis,

tam

tam publicis, quam privatis, cum nomen suum ascribunt, Papiam fere semper anteponere solitos hoc ordine DUX MEDIOLANI PAPIÆ ANGLOMERIÆQUE COMES GENUÆ ET CREMONÆ DOMINUS. Afferunt secundum argumentum non multo firmitus primo; se, nescio cujus Imperatoris Diplomate sejunctos esse penitus, ac sejugatos a Mediolanensis imperii ditione, Papiamque per se esse Præfecturam, quam vulgo Comitatum vocant. Inculcant deinde complura Imperatorum Diplomata, quibus municipium suum multis honoribus, & dignitatibus cohonestatum prædicant. Quarto loco multum spei jaciunt in Academia, & literarum Gymnasio, quod relictis, ac præteritis cæteris provinciæ Civitatibus Papiæ institutum fuit. Ultimo pugnant, se omnino Cremonensibus præponendos, vel ob id solum, quod Papiam Regum, regnique sedem per multos annos fuisse constat; cur non potius latronum receptaculum? Nihil eos præterea addere accepi, exceptis verborum contumeliis, quibus nos lacerant; sed in iis paucis esse omnem fomitem eorum arrogantiae, atque superbiae. Quæ quam nihil sint, non vereor, Judices, quin hodie vobis Oratione breviter planum faciam, si me benigne, attenteque, & bona cum venia audieritis, quod heri, & nudius tertius, vos facere in tota actione animadverti, & gavisus fui. Ad hanc reliquam dictionem alacri animo supra modum ingredior.

Jam enavigavit e scrupulosis cotibus Oratio, jam ex undis, & scopulis emergit, partem periculosissimam prætervecta, ut arbitror, sine offen-

ſione ; jam mihi adempra illa vinçula , quibus alligatus , atque impeditus non poteram meo more excurrere , & Oratione volitare , jam compedes excuſſæ , quibus detinebar ; rem vobis tantum nutu , & ſignis innuere cogebar , cum de dignitate , atque excellentia noſtræ Civitatis agerem , ne Vobis , Judices , omnibuſque illis , qui tunc aderant , quos etiam hodie , & multo plures adeſſe intueor , videremur de fortunis noſtris , de virtutibus , & laudibus ad omnem excellentiam intolerantius gloriari , ſineſque modeſtiæ transgredi . Verebar , ne vanitatis a vobis notaremur , neve ſociis Civitatibus honeſtiſſimis invidiam , atque aliquam offenſionem excitarem ; in illis locis invita verſabatur Oratio , cui juſſa meorum Civium ſemper moderabantur , neque extra cancellos egredi licebat , & ſi quando ſepta mihi circumdata tranſire , & velis paſſis longius provehi viſus ſum , meam eam omnem , non meorum Orationem fuiſſe confiteor . Prodeamus tandem in aciem , & diſcrimen . Inſpiciamus adverſariorum ſingula argumenta , eaque conſtantiffimis , & neceſſariis rationibus ita infirmata proſternemus , ut luce clarius perſpiciant , quam nihil penitus afferant , quantisque in tenebris verſentur , tam in nonnullis hitoriis , quam in novis Conſtitutionibus Caroli V. Imperatoris nuperrime editis . Cum contingit fieri mentionem utriuſque Civitatis , conſtat aliquando principe loco numerari Papiam . Hui ! tam firmum , tam certum , tam inexpugnabile argumentum ? tam exploratam rationem ? Videte , Judices , quid tam perverſum , præpoſterumve excogitari poſſit , quaſi  
enim

enim id semper consulto fiat, & deindustria, neque magis casu, atque fortuito, ut quæque prior Civitas in mentem venerit scribentis, ejusque memoriam moverit? quod facile judicare possunt, non modo illi, qui historias conscribunt, sed etiam omnes, qui earum lectione delectantur. Hic ideo non multus ero in congerendis exemplis, quibus luculentissime ostendere possem, talem esse scribentium consuetudinem, cum neque Papienses audeant affirmare, se ubique principe loco nominari; Id. manifeste videri potest apud Livium tam consumatum rerum Scriptorem, quoties ei contingit duas præclaras Romanorum Colonias numerare, Cremonam, & Placentiam; non enim eundem ordinem semper servavit, sed aliquando Placentiam, interdum Cremonam priore loco nominavit. Si adversarii in jure peritum aliquem consulissent, nunquam procul dubio tam inconstanti ratione innixi fuissent. Placet enim jurisconsultis prudentibus viris, istiusmodi ordinem non attendendum, nisi in rebus penitus involutis, atque obscuris, in quibus nulla alia apparent vestigia, unde veritas erui possit. Atqui hesternæ, & superiore actione enumeravimus plurima indicia, & certissima argumenta, quibus manifesto constat, Cremonam longe Papia præstare; ideoque non opus esse nos ad istas argumentorum quisquiliæ, ad tam inconstantis, inquam, rationis angustias, & angulos compelli, cum jam, Papienses, probatum fuerit nostram Civitatem vestra longe antecellere antiquitate Originis, nobilitate generis propter Conditores, populi frequentia, civium  
am-

amplitudine, & splendore, optimis institutis, opibusque, & omni virtutum genere, industria item, & arte militari; quæ sane omnia cum sint indicia, insignia, & admodum manifesta, veritatis, quid me revocatis ad obscura quædam signa, & fallacia vestigia? cum, inquam, mihi clarissima solis luce frui datur, cur me in tenebras noctis ultro conijci sinam? Eijcienda est ista omnis vestra ratio, quæ tota est nugatoria, & a sapientissimis viris jurisperitis jampridem repudiata; neque enim ulla ratione defendi potest, nisi forte velitis vestra caussa sanctissimas Leges etiam in jure pontificio antiquari, aut penitus abrogari, in quibus numerari contingit Italiæ antiquas Academias, & literarum Gymnasia, nulla habita antiquitatis, aut dignitatis ratione, ut interdum Bononiense, quod est antiquissimum, postero loco numeretur. Atqui in decretis, & epistolis Regulorum Mediolanensium constans, & perpetuus ordo, semperque idem servatus fuit, ut ascriberetur, Dux Mediolani, Papiæ, Angleriæque Comes, Genuæ, & Cremonæ Dominus. Ad ineptias identidem reditis, quasi vero istud ex proposito constantique Senatus consilio factum sit, & non potius fortuitu, ut quæque Civitas in mentem venit illi librariolo, qui primus in describendis illorum Principum epistolis fuit auctor istiusmodi ordinis. Si ista ascriptionis formula, Judices, pro cuiusque dignitate nomen cuiusque Civitatis numeratur, neque id potius casu, aut fortuitu fit, fateri erit nobis necesse Papiam, non modo Cremonæ, sed etiam Genuæ præferendam tam præ-

claræ ( Dii boni ! ) Civitati, quæ ad regiæ Urbis prope majestatem accedit, Angleriamque, perexiguum, & desertissimum oppidulum, itidem, & Cremonæ, & Genuæ anteferendum. Quo quid dici potest obtusius? non enim negare possunt adversarii Genuam, & Cremonam enumerari tam post Papiam, quam post Angleriam, in eadem ipsa formula ascriptionum, quam tantopere præse jactant, nisi forte etiam Papienses nulli Civitatum amplitudine concedentes præfractæ defendere velint, & Papiam, & Angleriam ipsam quantumvis contemptissimam, Cremonæ, & Genuæ omnino dignitate esse præferendas. Exspecto an ita ferrei, ita impudentes respondeant, ut homines ab illis vix manus abstinere queant. Aut igitur, Judices, ille Civitatum ordo in ista formula incertus est, & fortuitus, aut si ulla subest ratio, nulla alia esse potest, quam quod ille, qui eas civitates isto ordine enumeravit imitatus est optimos Oratores, qui semper potissima quæque partim in principio, partim in fine Orationis locant, medium vero referciunt segnioribus; aut certe ille, quod maxime probo, rationem habendam duxit potius temporis quam dignitatis, ut primo loco eam Civitatem numeraret, quæ prius in Mediolanensium Regulorum ditionem, & potestatem venit. Siquidem Cremona nemini subiecta multos annos suis legibus vixit, multoque post Papiam adjecta fuit Mediolanensi imperio; quæ quidem ratio perspicue nosci potest in illa longissima regnorum enumeratione, quam Cæsar in Epistolis ascribere solet, ubi hæc de causa, si ad dignitatem respiciamus, omnia fere

fere præpostere numerantur ; nam interdum quæ tenuissimæ sunt Præfecturæ regnis amplissimis præferuntur. Non pluribus agam, neque longius progrediar ; iis, quæ dixi satis liquet, quam hæc omnis istorum ratio sit inconstans, inconsultaque, & quam tenui filo pendeat, cui plane ab omnibus, præsertim in jure peritis contradicatur. Nullum aliud argumentum afferre possunt voluntatis, ac judicii hac de re fortissimorum virorum, qui Mediolano, & toti provinciæ imperarunt, nisi in nominis ascriptione tenuem quandam, & perexiguam formulam, qua contendunt gravissimos viros, magnos illorum temporum heroes, de omni hac dignitatis, & honoris controversia statuisse ; tantam inquam, rem, tam tenui, & obscuro indicio, tamque exiliter dijudicasse. Quid si vobis ostendo, Judices, quid iidem illi Heroes, non tenuiter, aut involute, non signis, & argumentis, quæ sæpe fallere possunt, sed re ipsa manifesto utriusque Civitatis præstantia statuerint ? Possem hoc loco multa eorum recensere beneficia, quibus Civitatem nostram præ cæteris totius provinciæ post Mediolanum cohonestarunt, quibus tanquam certissimis, firmissimisque argumentis indicarunt, quam sibi causa nostra semper probata fuerit, quamve illustri loco semper nostram Civitatem præ vestra habuerint ; sed ne nimius videar, omissis cæteris, quæ afferre possem, unum satis solum refragari poterit isti inani adversariorum numerationi.

Notissima loquor, & recentissima. Franciscus Sforcia novissimus Mediolanensium Dux ex Sforciarum nobilitate cum primum Caroli V. Cæsaris



ris nutu in regnum, & ditionem Majorum suorum restitutus fuit, ut erat vir summo ingenio, multa etiam doctrina, & plurimarum rerum usu præclarus, non modo ad Cremonensium postulata, sed ipse sua sponte, divino consilio, atque optima mente cavit, ne quis Cremonæ Prætor jus diceret, nisi esset ex amplissimo Senatorio Ordine tanquam ex Arcopago sumptus, nisi, inquam, ex hoc Sacrosancto Collegio vestro, ex vestris inquam Confessoribus, Judices, quos Vir ille perspicacissimus cooptavit, in hunc locum non gratia ulla, amicitiae, aut commendatione majorum inductus, sed quos frequens fama excellentis cujusdam ingenii, & spectatæ virtutis undique commendabat, hoc honore amplificavit, nec solum ex provincia, Civitatibusque suæ ditionis accersivit, quos ea dignitate ornaret, sed ex omni Italia, totaque prope Europa lectissimos viros undique ascivit, quorum virtus spectata esset magno theatro; florem scilicet totius Italiæ, & prope Universi terrarum orbis quoddam selectissimarum virtutum quasi specimen. Neque eos facile probabat, qui tantum juris essent periti ad respondendum, & cavendum exercitati, sed ab omnibus præterea exigebat eloquentiam, & plurimarum rerum scientiam, atque usum, gravitatem, honorem, fidem, ut plurimis virtutibus ornati essent, simulque moderatis moribus commendati, omnesque, ut breviter expediam, virtutis numeros implerent. Ex iis floribus collegit bene amplum numerum, quos lectissimos in provincia juri dicundo, civitatumque gubernaculis præficeret, totius Italiæ, & omnis

nis Europæ insignia quædam lumina, atque ornamenta. Hunc gravissimum Ordinem, ut Vos quotidie experimini, qui habent in provincia controversas graves, atque arduas quæstiones, adeunt, jusque, & opem a vobis implorant, ne injuste iniquis, præposterisve municipalium Judicum sententiis conficiantur. Quodcumque Vos censueritis, judicariisve firmum manet, atque perpetuum, neque ulterius ab hoc Ordine datur provocatio, & quæ a Vobis facta sunt Senatus consulta, pro oraculis habentur, & Cæsaris vocantur responsa, ejus etiam nomine inscribuntur. Functo deinde vita Sforcia, omnis potestas provinciz ad Cæsarem omnino translata fuit, vel potius reversa. Hic sapientissimus Imperator non minore cura, ac diligentia vestro Collegio studet, ac favet; nam cum contingit, aliquem ex Collegis vestris morte e medio tolli, semper ex omnibus provinciis, ac regionibus lectissimum quemque accersit, quem in demortui locum Vobis approbantibus sufficiat. Quo factum est, ut tam Sacrosancti Concilii gloria sit usque ad Cælum evecta; jamque non tantum privatorum hominum controversiæ e provincia, sed tota ex Italia, finitimisque provinciis rerum publicarum causæ gravissimæ interdum huc deferuntur. Quotidie Regum Legati ad Vos confluunt hac eadem de causa, ut e Collegio vestro sumant sibi Judices, arbitrosque constituent; jamque Mediolanum omnibus provinciis, gentibus, nationibusque, & regnis præstat, quod olim toti Græciæ Athenæ. Arbitror equidem Vobis omnibus, qui adestis, Judices, notum esse quanta con-

tro-

troverſia fuerit ſuperioribus annis inter Ferdinandum Romanorum Regem, & Venetos, de finibus, deque maximis rebus. Metus erat ne res ad vim, ad manuſque deveniret, magnumque inde bellum inter eos oriretur. Demum convenit utriſque, ut Iudex tantis controverſiis daretur de Collegio veſtro. Datus eſt Vir ſingularis ingenii, exquisitæque doctrinæ Lodovicus Porrus, quo diſceptatore omnes illæ controverſiæ paucis menſibus ſublatae fuerunt, utriſque partibus iudicato acquieſcentibus, iudiciumque ultro approbantibus. Coactus fui hæc, Iudices, longius fortaffe, quam oportebat repetere, & Vobis præſentibus, atque audientibus, de Vobis ipsis verba facere, & de veſtra in omnibus rebus præſtantia, atque excellentia plura fortaffe, quam hic locus patiebatur, dicere, in quo metuebam, ne quis Orationem meam parum probaret; quod inepte laborarem, ut Vobis ipsis, qui effectis, oftenderem, quantave eſſet veſtri Ordinis dignitas. Ego vero in eam Orationem non caſu lenſim, ut fit interdum, prolapſus incidi, ſed neceſſitate compulſus dicendi, non propter Vos, quos minime lateret, quam alto, & illuſtri loco ſita ſit dignitas veſtra, ſed ut adverſarii, qui nihil ſentiunt, oculis intueri poſſint ſaltem ex Ordinis veſtri dignitate, quanto majoris honoris prærogativa Cremonam præ Papiam dignari fuerint non modo Duces Mediolanenſium, ſed etiam quanto honeſtiore loco nos habeat Cæſar ipſe, qui perpetuo decreto ſanxit non aliunde Cremonæ Prætozem dari, quam e Sanctiſſimo Collegio veſtro, neque eum, qui Senator

tor verbo tantum sit, factis vero minus, ad tempus tantum, dum Prætura durat, simulatus, sed eum, qui tam re, quam nomine sit in Ordinem vestrum cooptatus, quique per aliquod tempus vilus fuerit vobiscum in publicis judiciis præesse Collega vester, atque confessor. Papiæ vero, ut cæteris Mediolanensis ditionis Civitatibus, ac Municipiis, Prætor datur utcumque juris peritus, undecumque ascitus. Mediolano tamen non magnopere est necesse tam exquisita ratione prætorem dari, quod in ea Civitate tamquam Regina, totius provinciæ Domina, Senatus ipse, & cæteri summi Magistratus Prætoris munus in maximis rebus explere possunt. Quid ultra tenditis, Papienses? quid adhuc tergiversamini? Quid frustra pugnare nitimini? Si rationem vestram cum nostra conferatis, videtis quam nostra præstet, quam emineat, quam superior dominetur. Illa vestra enumeratio præpostera, ad quam unam, tanquam ad anchoram confugitis, cui uni omnibus præsidiis deserti, ac destituti mordicus inhæretis, verbo continetur, nostra autem re fulcitur; vestra, in eo consistit, quod casu; nostra in eo, quod consulto fit; vestra, incerta est, atque instabilis; nostra, firma, atque semper eadem; vos præ nobis fortuito numeramini; at nobis ex Decreto firmo, stabili, atque perpetuo, ex amplissimo Senatorum Ordine Prætores destinantur, qui Viri, Dii immortales! nam semper ipsius Collegii lumina, floremque omnem totius Concilii propter rei dignitatem ad nos mittunt, ut clarissimus Vir Jacobus Philippus Saccus totius Collegii facile Princeps inter-

terdum quodammodo moleste ferat, cōqueraturque, quod singulis bienniis necessario semper Collegio dexter oculus effodiatur. Possem hic connumerare multos præclaros Viros, qui ex eo Ordine in Civitate nostra cum potestate prætoria, atque imperio fuerunt; nec quemquam eorum ibi fuisse pænitere arbitror. Semper enim exactis bienniis, eo magistratu expleto, a nobis recedunt ita agere, ita affecti, ut a carissima patria revelli videantur. Non est quod singulos honoris causa nominem, quoniam eorum maxima pars hic præsentis estis, sentitisque me minime mentiri. Hinc factum est, ut Placentini vicini nostri, & nunc quoque socii, homines acutissimi, non ignorantes quam præstet, Civitatem optimum Prætorem sortiri, nuperrime in ditionem Cæsaris, & potestatem ultro dediti inter cætera, quæ postularunt a te, Ferdinande, qui eam Civitatem in fidem tuam recepisti, id primam fuit, ut sibi æque, ac Cremonensibus daretur Prætor ex Ordine Senatorio; quod tibi visum est illis non negare, & ex omnibus Patribus mærente Senatu, & ne id fieret obsecrante, misisti Virum optimum P. Paulum Arigonium summa integritate præditum, plurimisque, & optimis virtutibus ornatum, qui ibi Prætor jus diceret, cum maxime is unus ab illis expeteretur, quibus propter vicinitatem innotebat, quam strenue, quam integre, sancteque, & prisce, is Præturam Cremonæ paulo ante gesserit, amabilis omnibus bonis, improbis vero, & audacibus formidolosus. An vero vobis, Papienses, non videtur id per se manifestum argumentum

M  
judi.

judicii, quod Mediolanensium Duces haberent de viriutque Civitatis dignitate, atque præstantia? quidve Cæsar ipse de nobis, ac vobis sentiat? ut enim nobis alia deessent, quæ omnia summa adsunt, & pro nobis pugnant, nonne id unum tale est, ut posset vobis eripere illud unicum præsidium relictum, quod locatis in præpostera ista formula, ubi principe loco numeramini? aut ita vobis contemnendus videtur Ordo Senatorius, ut id pro nihilo habeatis? Resipiscite tandem, Papienses; pudeat tam incertæ, tam inconstanti, & inconsultæ rationi vos totam causam commisisse. Cognoscite tandem, discussis vestris tenebris meæ Orationis radiis, quanto inflati errore ducere mini. Jam vero, Patres, videamus, quid rationis Papienses secundo loco afferant, qua innixi contendunt, se Cremonensibus dignitate antecellere.

Ajunt, quorundam Imperatorum Decreto suum Municipium penitus sejunctum esse, ac sejugatum a Mediolanensi ditione, neque omnino tanquam provinciæ partem, provinciæ legibus obnoxium parere; atque de hoc sane extare Diplomata luculentissimis literarum monumentis clarissima. Huic rei argumento esse, quod in Decretis, ac Literis tam publicis, quam privatis, Reguli Mediolanenses cum nomen suum ascribunt, nominant se prius quidem Duces Mediolanensium, deinde Papiæ Comites, seu mavis Græco more *καμάρχους*. Comitatus enim vulgo barbare dicitur, quod Præfecturam latine appellare possumus, cujus nominis rationem hanc esse ferunt. Nam cum aliquam regio-

gionem, tractumve cum oppidis, & Municipiis; Romanorum Imperatores commendabant alicui ex familiarissimis, quos semper secum affectatores habebant, ejusmodi Præfecturas Comitatus vocabant; quod illi, quibus eæ demandabantur, comites essent Imperatoris. Hinc etiam dicebantur Palatini, quod in Palatio cohabitarent; ne forte Papienses nostri tam verborum, quam rerum ignari errore ducantur; autumentque propter incipientiam, eo nomine se omnes esse Cæsaris comites; & sodales: Præfecturam igitur fuisse aliquando Papiam, neque concedo, neque valde repugno; nec me multum movent vestra ista aut commentitia, aut jampridem exolera, & planè mortua Diplomata; ea vero per nos carissima habeatis, & quantumlibet diligenter conservetis, dum intelligatis tamen vos rem, quæ nihili est, ob incertitiam vestram magnipendere. Itidem Cremonam, si quid ad rem spectat, Præfecturam aliquando fuisse probare possem; & ut alia deessent; quæ multa suppetunt, id unum satis esse posset argumentum, quod videmus in nostra Civitate sacrorum antistitem Cremonæ Episcopum; & Comitem vocari; publicisque Decretis inscribi: Sed quæ inani est ista ratio? In agro Cremonensi sunt non parùm multa oppidula minutissima, ac contemptissima, quæ i stiulmodi Præfecturæ nomen habent; immo pene ausim dicere; quot oppida, pagique, & vici sunt in tractu Papiensi; tot Præfecturas, Comitatusque apud nos esse, & ut aliqua, non tantum magni honoris causa nominem; Covum, Antiniacum; Persicum, Castelletum Pon-

tionorum, Romanengum, & si Diis placet, etiam Machefturma, ne inter ea enumerem Soncinum agri Cremonensis nobilissimum oppidum, quam Præfecturam superioribus annis adeptus fuit Maximianus Stampa ob fidem Cæsari præstitam, operamque egregie Reipublicæ navatam post obitum Francisci Sfortiæ secundi Mediolanensium Ducis Mediolani arce, cui præfectus fuerat, bona fide, ut æquum erat, voluntate Imperatoris tradita. Tempestate M. T. Ciceronis Tusculum suburbanum Municipium non erat Præfectura, quod quidem erat Atina: cum autem esset quæstio nobilitatis inter G. Plancium Atinatem, & M. Latrentem Tusculanum, qui eum accusaverat, Cicero, qui Plancium defendebat, cum conferret Atinam Præfecturam cum Tusculano Municipio, quod non erat Præfectura, non est ausus tamen Atinam Tusculo adæquare, quod ea Præfectura, ut ipse fatetur, non esset tam prisca, tam honorata, tam suburbana: ut intelligatis Præfecturam, Comitatumve nomen esse potius Magistratus, quam honoris alicujus excellentis. Idem dicendum censeo de nomine Principatus, quo se adversarii, ut audio, jactant, fuisse insignitos a Maximiliano Romanorum Imperatore, id postulante Lodovico Maria Sforzia Mediolanensium Duce; quod quidem quamvis mihi sit sane novum, nec hactenus unquam auditum, & ut ego quidem suspicor, commentitium, sit tamen ut lubet; mea causa estote Comiti, aut Principi subiecti; nos Carolo V. Romanorum Imperatori una cum cæteris provinciæ Civitatibus interim obtemperabimus; cique,



etique, ut Domino parebimus, quoniam Cremonæ Dominum se profiteretur, vos autem ut Comiti; itemque, si ita magis lubet, ut Principi patetote, aut ego id quale sit prorsus non intelligo, aut vos plane desipitis. Rogo vos, utrum honoratius arbitramini, principem ne esse Urbis, an Dominum? Neminem ita hebetem, ita obrusum esse reor, qui si ei detur optio, velit ne esse Civitatis Dominus, an Princeps, non protinus clamet, se malle Dominum esse, cum aliquis possit esse Civitatis Princeps, qui tamen ejusdem non æque sit Dominus; contra vero nemo Dominus, quin etiam simul Princeps. Nimirum hæc vox nihil aliud notat nisi quandam Ordinis prærogativam; idem est enim principem esse, & esse primum; dominari vero non est tantummodo ordine antecellere, verum etiam ditionem affert, regnum, atque imperium. Hinc ROMANOS, dixit ille RERUM DOMINOS; is enim titulus est tantæ dignitatis, & excellentiæ, ut non tantum Regibus conveniat, sed etiam Deo regum omnium Regi a mortalibus tribuatur. Hanc ob rem Augustus Cæsar moderatissimi animi Imperator edicto cavisse memoratur, ne quis se Dominum vocaret, superbissimum id esse ratus. Domitiano autem postea maximæ arrogantiae datum fuit, quod hoc titulo non abstinuerit; Principis vero nomen nullus quantumcumque moderatus Imperator unquam recusavit. Id si negabitis, Papienses, cogetis me præter consuetudinem hujus loci, contraque meum institutum confugere ad Poetas, apud quos sancte, ac religiose Latinarum vocum sence-

ritas custoditur incorrupte; vulgatum est enim TU DOMINI NOMEN, PRINCIPIS ILLE TENET, carmen clari admodum Poetæ, qui fuit Augusti Cæsaris temporibus, cum maxime vigeret eloquentia; id contra quid adhuc pugnare possitis non video. Verum ne disputatio nostræ videatur circa verba tantum versari præter hujus loci dignitatem, ad Græcorum quasi consuetudinem, alia aggrediamur via. Franciscus Sforcia, qui primus in Sforciarum domum insignia Imperii Mediolanensis intulit, antequam totius Provinciæ ditione potiretur, cum Blancam Mariam Philippi Vicecomitis filiam in matrimonium duxisset, tradita est ei a Socero Mediolanensium Duce Cremona dotis nomine, & cum is etiam Angliæ Præfecturam simul obtineret, quæro a vobis, quonam titulo eum magis honoratum fuisse putatis, quia ne esset Angliæ Comes, an quod Cræmonæ Dominus? Porro ille etiam nullam habuerit Præfecturam, quas vero retulisse in agro Cremonensi permultas, detulerit omnes affectatoribus suis. Rogo vos, utros existimetis honore, ac dignitate præstantiores, eos ne quibus ab illo attributæ essent Præfecturæ, an illum ipsum, qui omnes attribuisse, nullamque se prorsus retinuisse contentus sola Cræmonæ Dominatione? Videtis vos undique circumclusos; nam nisi secundum nos responderitis, rideant omnes.

Jamdudum, Judices, nimium tenuiter argumenta colligo, nimisque multa a me disputata super de re apertissima, quam nemo nisi excors vocaret in dubium. Id genus etiam est illa eorum dis-

fin-

ſinſtio, ac ſecretio a ditione, ac dominatu totius Provinciæ Mediolanenſis, quam tantum præ ſe jaſtant, namque ab eodem Diplomatum tam inanium fonte, quæ diſtitant ſe habere, tota derivatur. Eam etiam probant illa ipſa eadem inſcriptionis formula, quam modo conſutavimus, exploſimusque. Nam Sforciæ Reguli nomen ſuum Decretis, & Epistolis aſcribentes, profitebantur, ſe non tantum eſſe Mediolanenſium Duces, verumetiam ſpeciatiim Papiæ Comites, cum neque Placentiam, aut Parmam, neque Laudem, neque Novariam, neque Comum, neque Derthonam, neque Alexandriam, neque pleraſque Civitates nominatiim numerarent, eas gneratiim omnes complexi Mediolani nomine prolato. Vero, inquam, Papienſes tam inconſulta ratione nobiſcum agitis. Non vident cæci, ſi quid id eſſet, ſi quid cauſæ ſuæ id ſuffragaretur, idem iudiciū de noſtra Civitate faciundum, cum pariter in eadem aſcriptione a Mediolano Cremona ſecernatur; ſed quæ (mala Crux!) eſt iſta Papienſium a cætera Provincia ſejunſtio, atque ſemigratio? Quis poſſit ſatis iſtorum mirabilitatem admirari? tantam, inquam, inſcitiam, ac ſtuporem? Videte, Patres, quam omnibus claviculis innitantur, ne ruant titubantes, ac collabantes! Non poſſum ſatis eorum inſignem aut impudentiam, aut dementiam, vel potius utrumque ſimul (de improbis tantum loquor, & turbulentis, qui has turbas commorunt; nam, ut ſæpiſſime præſatus fui, Papiæ multi viri graves, & probi inveniuntur, qui iſta non probant) admirari. Audet aliquis dicere Papienſes ſejun-

gatos esse atque distractos a Mediolani ditione, & a communitate sociarum Civitatum totius provinciæ? & id, Patres, vobis audientibus, cum adversus eos res ipsa loquatur? cum quotidie contrarium ipsimet experiantur? Poterunt ne isti negare se cum reliquis sociorum Civitatibus hujus ditiosis, atque Imperii censos esse? evolvatur publicum totius provinciæ tabularium, afferantur publicæ recensionis tabulæ, appellentur, interrogenturque publici Quæstores hujus Imperii, quærendumque ab illis, referant ne in tabulas secretas, atque sejunctas pecuniam, quam a vestigalium Papiensium Redemptoribus annuam exigunt, an in communes totius Provinciæ tabulas? Percontandi etiam ipsi Papienses, profiteantur ne propriis, & privatis tabulis, an potius communibus cum aliis Civitatibus, pro quarumque censu, & fortunis, ut cuique onera exæquantur? sed quæso, quis hæc melius testificari possit, quam vos met ipsi, Judices, ad quos cum a Municipalibus Prætoribus, ac Judicibus provocatur, deferuntur omnes graviores causæ, quæ in provincia agitantur, in capitalibus vero, quis, nisi vestrum Collegium, reos aut absolvit, aut condemnat? Quæ igitur, Papienses, est ista vestra secretio, aut distractio? Docete qua in re vobis suffragetur, ne mihi sit necesse refellere aliam ejusdem generis rationem, Sacerdotum principem vestræ Civitatis esse penitus sejunctum, ac secretum a re Pontificia Mediolanensi, neque Papiam agnoscere Antistitem eum, qui in tam regia Civitate, sacris præsidet, quemve tota provincia suspicit, ac venera-

neratur. Obsecro vos, Papienses, sani ne estis, qui ista tam temere effunditis? quæ vos agunt intemperię? Satiſ erat, vos nihil dicere, quam jejunum istud nescio quid, & contemnendum effutire. Istud quidem falsum esse dico, & a vobis impudentissime confictum. Sed esto, ut libet. Ista ratio est ea, quæ vos nihil prorsum levat; est enim omnino eadem, quæ proxima, & tantidem, vel multo etiam minoris facienda, cū idem quilibet Pontifex in sua Civitate ob levissimam quamque causam a Pontifice Romano quotidie impetrare possit. Si me audietis, posthac libenter manebitis in communione, nec tantopere conſitemini seſungere vos, aut a communibus provinciæ legibus desciscere, quibus præclara Civitas Placentia nuper Cæsaris Imperio adjecta subſijci maximopere postulat; secumque communicari rogat provinciæ jus, moresque, & instituta, ut ejusdem cum reliquis sociorum Civitatibus sit juris, & conditionis, vestraque ista Diplomata inania, jampridem exoleta, & plane mortua, aut detractis aureis bullis, & sigillis projicietis, aut antiquata nullo innumero habebitis. Itidem Cremonenses faciunt, quorum Diplomata, in quibus plurimi Romanorum Imperatores exquisitis verborum ornamentis laudant eorum fidem, ac præclaram virtutem, scrinia vestra non caperent. Valuerunt illa olim, & vobis utilitatem attulerunt; nihil nunc ad rem spectant; mutata est ratio temporum, alia tempora alios, ut ait ille, mores postulant; Longe diversus est status, & noster, & vester, atque olim fuit, diversaque conditio. Non ne explodendi essent,

sent, aut sane derisui habendi Brixiani, vel Bergomates, homines acutissimi, olim socii nostri, nunc tantum vicini, & amici, si a Venetis, quibus hoc tempore parent, postularent sibi eas immunitates, munerumque vacationes præstari, quas a Mediolanensium Regulis, quibus olim subijciebantur, consecuti essent? sed non existimo adeo obtusos populos illos, aut parum intelligentes, cum sint etiam eorum plurimi doctrina præclare exculi, ut ad has ineptias unquam descenderent. Nolo hoc loco multus videri; tota res est nugatoria, videoque vos, Judices, pene omnes in risum effusos. Doleo hic adversariorum vicem pro veteri utriusque Civitatis amicitia. Si mentis essent suæ, nunquam puto ad has nugas deventum esset in re præsertim tam facili, atque illustri. Quod etiam spectat ad ea ipsa eorum diplomata, addunt unum, plane perridiculum, mihi etiam miserabile, cui amicorum inscitia semper misericordiam potius, quam risum movere solet.

Papiam insuper, inquam, ajunt Cremonæ præferendam, quod (expecto hic exquisitam rationem) Papiæ tanquam in propria sede, non alibi, semper commorari convenit Navarchum, ad quem omnes in Provincia navium præfecti respiciant, quique omnibus Navicularibus imperet. O præclaram rationem, Judices! o exquisita argumenta Papiensium, qui quotidie cum literatis hominibus in Academia versantur! quænam fanatica anus istæ deliramenta loqueretur? Videtis quam tenuiter omnia ramenta, omnes quisquillas ratiuncularum colligant! Quos mihi Navarchos, quos mihi Naviculario.

Iatores narratis? quasi vero non in omnibus alijs locis, quæ habent commoditates fluminum; aut maris oportunitatem, non præficiantur ubique Navarchi, qui in cæteros navicularios jus habeant. Esto autem, omnes alios navium Præfectos, ubicumque sint gentium, sit necesse parere Navarcho illi, quem opus est Papiæ habere domicilium, ibique continenter habitare, cui per me vel ipse Neptunus serviat, cui Nereo, Glaucoque, vel Inoo Melicerta, quis enim non rideat? ea tamen re Papiam anteponendam Cremonæ pugnabitis, cum id sit potius propter Metropolis vicinitatem, ut ille cum omnibus navibus præsto esse possit Mediolanensium Ducibus quoties aliquo iter habent flumine. Nihil hercle tam præpostere, tam incondite, tam monstruose cogitari potest.

Restant adhuc Papiensibus, Judices, duo præsidia, quibus se tueri posse falsa persuasione indukti, arbitrantur. Quicquid illis reliquum est spei in his duobus fundamentis jaciunt; in iis sita est omnis eorum salus; ea nisi illis adjumento fuerint, nihil præterea habent, quod pro se nobis opponant. Porro alterum quale sit, quam debile, atque infirmum, jam faxo ut intelligatis. Ajunt, se nobis anteferendos (quam tantam ob dignitatem quæso?) quod apud se præ cæteris provinciarum Civitatibus, vigeat florentissima Academia, Gymnasiumque literarum celeberrimum, quo ex omnibus provinciis confluunt adolescentes ad studium tum Legum, & Juris civilis, tum Philosophiæ, cæterarumque optimarum artium. Nisi hoc die fecero planum, Judices, id plus incommodi, quam

quam adjumenti afferre eorum causæ, nihil ultra repugno.

Non possum equidem dissimulare id aliquid esse; magnamque utilitatem, ac non tantum multas commoditates adversariorum Municipio afferre facior, verum etiam eis maximo ornamento esse potuisse, si occasione tam opportuna uti vellent, aut uti scirent. Proposui enim mihi in hac causa tam clara, tamque expedita nihil omnino calumniari, sed omnia, quæ vera sunt, aut esse possunt ingenue confiteri. Nego tamen, immo etiam pernego, hinc Papienses ullam dignitatem, prærogativamve, aut præstantiam sibi arrogare jure posse, cum istud Gymnasium, quod ipsi etiam non audebunt negare, non industria sua, non sua pecunia, aut impensa instituerint, sed quicquid est inde commoditatis, & ornamenti, id omne acceptum referre debeant Regulis Mediolanensibus, quorum beneficio, ac liberalitate institutum fuit. Poterant illi sane æque utiliter hac commoditate aspicere quamlibet aliam suæ ditionis Civitatem, Alexandriam, Novariam, Laudem, Novum Comum, Derthonam, Parmam, Placentiam, Cremonam, & quæcunque aliæ Civitates eis tunc parebant, quarum nulla est, quæ nobilitate, civium splendore, copiaque, & omnibus opportunitatibus Papiæ cedat; sed pleræque etiam omnibus virtutis, & fortunæ prædiis antecunt, una superbia, qua sola a Papiensibus istis antecelluntur omnes, excepta. Quæ vero causæ impulerint sapientissimos viros Heroes illos, ut potius Papiæ, quam alibi istum literarum ludum voluerint aperiri,



riri, licet vobis, Judices, exploratum esse arbitrer, dicam tamen propter externos, quos hic adesse plurimos, & attente audire video. Duo potissimum in causa fuisse reperio. Primum quidem; quod semper fulcienda debiliora, sustentandique sunt, qui ruunt. Qui primus hanc studiorum, literarumve exercitationem in provinciam importavit, animadvertit proculdubio Municipium Papiense propter vicinitatem valde opportunum fore Mediolano, quæ Civitas est ejus ditionis, & imperii caput, si quo modo paulo amplius, locupletius, lautiusque effici posset. Est enim Papiensis ager, ut docui, & ipsi consentitur, plerumque miser, atque jejunos, solumque exile, ac mæcrum, opes Civium tenues, atque exiguæ, ne mihi repetenda sint, quæ superiori actione memoravi de infrequentia, & solitudine ejus Municipii, quo, docui, nihil desertius, nihil contemptius esse posse, ne toties ante oculos vestros oratione repræsentem, Judices, Papiensium sociorum nostrorum ignobilitatem, & deformitatem; populumque infrequentem, semper nescio quid egestatis præferentem. Huic solitudini, & infrequentia, inopiaque, ac squalori ut sapientissimi illi viri optima ratione occurrerent, Academiam apud vos, Papienses potissimum esse voluerunt, eo consilio, ut nobilium adolescentium ad vos, studiorum causa confluentium hospitibus continuis vestra Civitas levaretur, simulque locupletior, ac frequentior redderetur, essetque receptaculum multorum hospitum, Ea re illi imitati videntur experientem, atque

atque industrium patrem familias aratorem optimum, qui eam partem fundi, quam magis aridam, & jejunam contemplatus, aut etiam arando expertus sit, sapius stercorando adjuvat; si quo modo ad fructuum ubertatem queat elicere, fertilemque, & optimam facere, ut multo plus reddat, quam accepit; quæ causa nisi eos movisset, quanto commodius, meliusque Mediolani [ in qua Civitate Dii immortales! ] quicquid est Gymnasii, & Academiæ instituere poterant? ubi non modo Gymnasium Papiense, sed totius Orbis terrarum digne, ac percommode esse poterat, ubi, inquam, omnia insignia Reipublicæ Romanæ recognoscere possis, cum magnificis ædificiis, operibusque, tum ubertate agrorum, atque abundantia rerum omnium, ubi summa omnia, ubi cuncta splendescunt victu regio, atque cultu. Quod unum hætenus defuit eximæ Civitati, id tu, Ferdinando, supplere ingressus es ea animi magnitudine, qua cuncta ardua, ac difficilia aggredi soles, atque expugnare. Equidem dicere audeo, nihil intra universi Cæli ambitum præclarius Mediolano contineri, si tam ampla, & spatiosa Civitas, ea minorum corona septa fuerit, quam nuper admirando opere cæptam surgere conspexi. Mirum sane, Papienses, quod non etiam hac eadem ratione Municipium vestrum huic Urbi amplissimæ audeatis anteferre, quod apud vos sit literarum Gymnasium, & exercitatio, qua commoditate, atque ornamento urbs Mediolanum omnino careat. Videbimus postea quid vobis istud Gymnasium cō-

ferat.

ferat, quod tantopere præ vobis jactare soletis, ac si esset Atheniensis illa Academia, quæ e Cælo Philosophiam devocasse dicitur.

Altera caussa fuit, [ præposui enim, duas maxime ob res, Duces Mediolanensium adductos fuisse, ut Papiæ Academiam, potius quam alibi instituerent ], quod iidem illi sapientissimi Viri animadverterunt, Papienses homines, plerumque ( non enim loquor de omnibus ) natura quidem rudes, ac duros, ut semibarbaros, & a literis plane alienos ( date mihi veniam, refero quæ audivi sæpius a prudentissimis viris, quæve etiam ipse re comprobavi ) quod eorum Patres, ac majores nimiam operam dedissent barbaris, qui Papiæ aliquot annos regiam suam habuere, literarum, atque optimarum artium, omnisque humanitatis hostes perpetui. Neque ista commemoro, Judices; caussa vituperandi adversarios meos: accuti ne, an hebetes simus, non est in nobis, sed ipsius naturæ culpa. Ut igitur hac saltem ratione Heroes illi nostri id genus hominum aliquando extunderent, mollirentque, & aliqua doctrina expolirent, istam Academiam apud istos instituere; neque enim fieri posse arbitrabantur, ut qui cum literatis hominibus, bonarumque artium studiosis die noctuque versarentur, omnino literarum, omnisque humanitatis expertes essent, utque doctrina prorsus nulla eis, consuetudine saltem ipsa, & ut ita dicam, contagione adhæreresceret. Quis nescit, eos homines, qui assidui sunt cum fabris, facile fabros evadere? An vero illis sapientissimis Viris ex sententia processerit, aut potius oleum,

&

& operam, ut dicitur, luferint, non dicam nisi coactus. Quid vos tanquam vestrum memoratis, quod vos non fecistis? non instituitis? non excogitastis? Cujus, ne mentionem quidem facere potestis, nisi etiam una infirmitatem, & imbecillitatem vestram commemoretis, cujus rei gratia Gymnasium habetis? Quid si ego nunc vos interpellem, & a vobis exigam rationem tantæ commoditatis a Ducibus Mediolanensium vobis comparatæ impensa communi totius provinciæ? quos fructus hujus culturæ proferetis? Quid vobis, inquam, profuit ista vestra Academia? Quos mihi excellentes Viros ex vestratibus in literis emeruisse commemorare potestis? Bononia Civitas Italiæ præclarissima, in qua viget illud antiquissimum Gymnasium, quo totius Europæ frequentissimi adolescentes confluunt, veluti ad literarium celeberrimum orbis terrarum emporium, semper ostendit quantum profecerit ex illa nobili literarum officina, domesticaque Academia. Namque in omni ætate semper habuit, quos ipsa tulit, Viros in omni genere literarum præclaros, nec ei, quemadmodum Papiæ, semper opus fuit exteris, adventitiosque magistros, qui publice optimas artes, ac scientias docerent, magna mercede foris conducere, cum sepe semper domesticos habuerit, per quos proficeret. Quod etiam de Patavina, Perusina, Pisanaque, & de omnibus Italiæ Academiis, præterquam de vestra affirmare possum. Sed, quid ego Civitates, quæ Academiis sunt celebres, atque illustres, cum vestra confero? Cum vel Cremona ipsa, quæ nunc caret hæc publi-

publica commoditate, longe plures, quam Papiæ viros, in omni doctrinæ genere præstantes semper habuerit, ut abunde supra demonstravimus?

Si in mentem venisset Regulis Mediolanensibus nos potius, quam vos hac commoditate afficere, quam nunc Urbem Cremonam [ Dii Immortales! ] Carolus V. Imperator haberet? quam celebrem? quam ingeniis florentem? Multo libentius ad nos adolescentes ex tota Italia, ex omnibus terrarum orbis partibus confluerent, ut omittam, propter majorem copiam rerum, quæ ad victum pertinent, multasque alias ob commoditates, de quibus rebus, in utriusque Urbis collatione nudius tertius fusius disputavimus; conferendam ne censes, Judices. cum istis nostrorum hominum liberalitatem, humanitatem, affabilitatem, quibus innata quadam virtute, animique magnitudine hospites prosequi solent? Quos, rogo, nostri, Cremonam divertentes non alliciunt in amicitiam? Cives nostri, sicut belli tempore, armis, ac militiæ dediti nemini virtute, atque animi robore, cedunt; ita in pace, natura, & consuetudine, disciplinaque, lenissimi, atque humanissimi sunt sensus, præsertim erga pacatos. Adeunt interdum, studio quodam innato, ac prope naturali, animi causa meritoria, diversoria, ut est nostra Civitas semper multorum hospitem, non tantum sibi notos, & aliqua consuetudine conjunctos ibi repositos, quorum gratia eo concesserant, a communi hospitio liberaliter abducunt, sed etiam, si quos ibi advenas conspexerint, virtutem aliquam præclaram, generisve nobilitatem, ingenuitatemve,

N

ser.

sermone, aut ipsa oris indole præferentes, eos humane appellant, & liberaliter domum quisque suam invitant, atque allectant, coguntque vi quadam liberali ad se divertì, illisque omnia hospitalitatis officia exhibent, atque impendunt. Neque id sæpenumero facientes boni adolescentes offendunt seniores suos patres familias, quod ætas ea solet esse minus splendida, & liberalis, sed illi in hac causa præstant se filiis faciles, largiusque impendunt propter vetustissimam Urbis consuetudinem, ut in susceptos hospites æquales suos sumptum facere possint. Experti sunt nostra memoria Patavini exules; omnis, inquam, illius præclaræ Civitatis nobilitas, qui cum gravissimum bellum arderet contra Venetos, quibus illi subiecti parebant, prodicionis insimulati fuerant, quod nimium studuissent Maximiliano Romanorum Imperatori, cæterisque hostibus fæderatis, ideoque exilio mulctati fuerant, cumque eos ad Urbem nostram fortuna appulisset, communi Civitatis sumptu, primum, omnibus domus conductæ est in celebri Urbis parte capax admodum, atque pro hominum numero satis bene ampla; comportata deinde, non tantum necessaria, verum etiam magnifica, & prope ad delicias suppellestile, omnibus copiis, quas vita postulat, miserati eorum egestatem, & inopiam, referferunt, procuraveruntque, ne quidquam decisset illarum rerum, quæ ad victum, vestitumque pertinent, donec exacto bello, ab exilio revocati fuerunt. Experti sunt item eandem Civium nostrorum liberalitatem suis temporibus Brixiani, Veronenses, Placentini, Parmen-

menes, totaque vicinitas illius oræ, quibus a nobis sæpius omne liberalitatis genus impensum fuit, ac persolutum. De vobis, Mediolanenses, nihil dico, quoniam adestis frequentissimi, & hæc vos non latent. Hinc factum est, ut pleræque Civitates illarum, quas nominavi, ut se gratas, ac beneficii memores comprobarent, tam illi, qui hospitio recepti fuissent, quam alii, qui domi remanserant, omnes cives nostros perpetuo Decreto in Civitatem suam ascriberent, eandemque immunitatem, quam ipsi haberent, nostris apud se negotiantibus, aut quoquo modo eo divertentibus elargirentur. Nollem esse multus; non possum tamen tacere de nostræ Juventutis studiis, atque humanissimo animorum sensu, erga hospites præsertim æquales suos, atque cœvos. Dabo operam ne nihis aberret Oratio, diffluatve, atque redundet. Quædam omnino mihi necessario sunt dicenda, ut noscatis in collatione, non modo quam liberales se se gerant Papienses erga nobilissimos adolescentes apud illos studiorum gratia agentes, verum etiam quam dignos se esse comprobent illa Academia, totius Provinciæ sumptu, instituta. Qui semel ad nos casu aliquo, atque fortuna apulsi diverterunt, admirati humanitatem, studiaque, & mores suavissimos nostræ juventutis non possunt se continere, quin postea Civitatem nostram consilio, valentibusque animis, sæpius accedant. Nihil illi antiquius habent, quam cum nostris Civibus suis æqualibus amicitiam jungere, studiorum societatem coire, in eorum sodalitatem recipi, cum eis operam literis navare, optimas

artes perdiscere, disputare, colloqui, simul ambulare, conquiescere, sæpius cænare, aliquando pernoctare, jucundissimis, & [ ut ita dicam ] discretissimis pervigilationibus, idest suavissima consuetudine simul vivere. Nostra enim Civitas tota ferme est in iis sodalitatibus, liberalibusque, & ingenuis conventibus, ut plerique vestrum, qui Cræmonæ fuistis, vidisse potuistis. In omni ætate, in omni gradu, æquales cum æqualibus, certa diei hora conveniunt; jucundum est videre plurimos quotidie adolescentes, florem nobilitatis, & virtutis in Civitate laudibus florentissimos, binos, alios post alios pacatissimos simul per totam urbem inambulare, nulli nocere, prodesse quibus possunt. Si quando accidit sodalitatem sodalitati obviam fieri, videas summa humanitate alteram alteri libenter viam dare, diuque utramque certare, ne ab altera, humanitate vincatur. Si quis inter alios in conventu morosior, insolentiorque visus fuerit, eum statim defugiunt, ac vitant cæteri omnes, atque ob difficiles, & feros mores, asperamque naturam, eo commercio ut intractabilis privatur, e cætuque, & sodalitate ejicitur. Adeunt interdum congregati, modo hæc, modo illa sodalitas præstantissimos viros Civitatis seniores, quemcumque pleniore ore laudandum judicarint, qui sit in ocio cum dignitate, multis, atque optimis artibus præditus, cujus consuetudine adipisci possint amplissimam bene vivendi, tam ejus vita, quam literis, disciplinam. Neque vero desunt nobis unquam optimi viri nati ad laudem, summa prudentia, multa etiam doctrina exculti, in omni



ni munere vitæ, plurimarum rerum usu præclari, nec minus optimarum disciplinarum præstantia excellentes, quam temperatis moribus insignes, a quibus juvari possis, in iis quoque studiis, atque artibus, quæ reconditis, atque abditis fontibus exhauriuntur, quæve non sine summo ocio facile discuntur. Talem virum nacti adolescentes, virique optimi, ad eum, non modo propter hominis virtutem, ingeniumque, & doctrinam, sed etiam propter humanitatem, miramque tam morum, quam sermonis suavitatem, confluunt tanquam ad oraculum. Eo audiente tanquam arbitro, & disceptatore de multis quæstionibus difficillimis disquirunt inter se, de literis incredibili humanitate differunt, de virtute fere semper, sæpe de officio, de utili, atque honesto, deque amplissima bene vivendi disciplina, interdum de arte Militari, de Agriculturæ suavitate, de Architectura, de Muscis, de Piëtoribus, de Statuariis, deque artificibus etiam inferioris ordinis, quorum tamen artes, non tantum operæ, emuntur. Multa virum doctissimum interrogant, plura audiunt, pendentque ad ejus responsa. Semper inde discedunt, non tantum doctrina, ac scientia meliores, sed etiam vita, ac moribus magis exculiti, & perpoliti. Et si quando, ut in sermone fieri solet, natura suadente, ad mansuetiores Musas, idest ad familiæ colloquia descenditur, ne optimus vir adolescentibus difficilem, ac morosum se præbeat, aliqua per jocum ultro citroque jactari æquissimo animo patitur; nihil tamen inde audiri contingit nisi pudicum, nisi ex optimo more,

ac sanctissima disciplina. Hic sæpe colloqui suavitatem illecti bonam diei partem perjucunde absumunt; adventante nocte discedunt inviti, quam primum redeundi cupidissimi; gravissimæ lites, ac civium controversiæ, quæ in foro diu agitatae, nullum neque modum, neque finem reperire poterant, huc sæpe devolvuntur, nullaque impensa, ex bono, & æquo, ut inter bonos agitur, terminantur, & quod tot judicum prudentia, patronorumque solertia, multorum annorum labore in foro consequi non potuit, hic optimorum hominum æquitas paucissimis horis conficit, ideoque apud nos, jam in proverbii consuetudinem venit; cum in foro aliqua lis gravissima diu versata fuit, neque unquam dijudicata, transmittendam esse ajunt ad Thermas, innuentes, ad optimorum virorum hunc conventum, similitudine a Medicis translata, qui cum in alicujus difficilis, diuturnique morbi curatione, admotis frustra omnibus remediis, nihil, aut parum se profecisse vident, nihil ultra quid faciant habentes, laborantem, affectumque desperata ejus salute, ad balneas calidarum aquarum rejiciunt. Idem fit de perniciosis tam civium, quam exterorum similitudinibus, atque inimicitiiis, quæ hic quotidie, adinventis, propositisque æquissimis conditionibus, finem capiunt; neque ulla fere dies præterit sine aliqua pacificatione, & ubi discordiis modum difficile est reperire, hi boni animorum conciliatores, tanquam belli, ac pacis interpretes summa dignitate, atque auctoritate suadent, coguntque exquisitis rationibus, ultro citroque interpositis induciis, ab armis disce.

discedere, extorquentque de manibus iratorum adolescentium fidas, & gladios, dum irritati, exacerbantque animi utrimque deferbuerint. Hinc a Civibus nostris, ut in plerisque Civitatibus, raro graves inimicitiae suscipiuntur; rarissime civis civem ob acceptam injuriam in periculum capitis accersit; accusatores, delatoresve ab omnibus, ut pestilentes, vitantur, defugiunturque. Si forte etiam controversia coorta fuerit inter Civem, & peregrinum, omnes se nostri Cives pacificatores interponunt, hospitemque ab omni injuria tectum reddunt, civem graviter verbis castigant, solliciti, ne jus hospitii apud nos sanctissimum violetur; quæ res fuit semper apud nos capitalis, & quasi majestatis. Cogunt imprimis amici Civem, velit, nolit, peregrino reconciliari, atque omnem injuriam, si qua affectus fuit, cum eam facile vindicare posset, patriæ condonare. Ideo nostra Civitas semper floruit, floretque etiam hodie hospitibus hominum nobilissimorum, maxime adolescentium, qui permoti fama nostrarum Academiarum, conventuumve ad nos se frequentissimi conferunt, speciemque, & númerum quasi publici Gymnasii præbent. Nondum de pueris locutus sum, qui ad nostræ Civitatis Rhetoras, Grammaticosque instituendi a parentibus Cremonam, ex omni vicinitate transmittuntur; de quo nihil mihi est necesse dicere, cum res ipsa loquatur. Nemo vestrum est, Judices, qui non audierit, viderit etiam fortasse, ac re ipsa in liberis suis expertus fuerit, quam diligenter, quam fideliter, & sancte in no-

stra Civitate pueri, atque adolescentuli primis illis artibus erudiantur, quæ ad alias artes, summasque virtutes aditum præbent, tanquam janua, & fundamentum omnium disciplinarum, usque adeo ut Musarum, idest literarum, & bonarum artium domicilium, ac sedes habita semper fuerit Cremona, quod negari non potest, nisi detestabili scelere. Habuit enim omni ætate, habetque etiam hodie bono quodam fato, aut cœli beneficio, homines eruditissimos semper duos, aut tres, pudore, ac temperantia cum primis insignes, qui præceptis, & literis adolescentulos, cum primum sapere cæperint, instruant, caventes in primis, ne illi in illo ætatis flexu totos se voluptatibus dedant, & ab illis vitiis, quibus ea ætas implicari solet, abducunt, sed ut mos, virtusque majorum nostrorum, prius eis ingerunt, quæ ad Religionem, Deique optimi maximi cultum spectant; deinde latine eos loqui docent, non nullam nihilominus interea literarum Græcarum notitiam instillant; ita eos, tum literis, tum moribus assuefaciunt, ut deinde constanti ætate eorum sit omnis impetus ad laudem, nec patiuntur eos ab se longius aberrare, neque per urbem discurrere. Feriis quoque eos secum esse volunt bonam diei partem, cum quiescere ab opere jubet Religio. Iis diebus exercent eos in sacris Literis, ut primis saltem labiis pietatem, sanctitatemque religionum degustent; sacros etiam poetas tunc eis interpretantur, si quis inter bonos de Christi pietate, quem nos sequimur, colimusque, elegantius scripserit, propiusque ad antiquorum Poetarum

tarum excellentiam accesserit, ut una, eademque opera, & religionum, & linguæ latinæ elegantiam, ac proprietatem arripiant, & assuescant de Divis recta numeris loqui, & scribere, relictis antiquorum superstitionibus, ne molles adolescentulorum animi perniciosus, portentosisque religionibus imbuantur; donec paulum ætate progressi commentitia possent disjungere a fabula. Adeunt deinde ædem sacram hora, qua Sacerdotes rem divinam faciunt, ut sacris intersint, & cum sacerdotibus Deum precantibus secum taciti precentur. Videas Præceptores præcedere non tumidos, non inflatos, neque hinc sibi in adolescentulos regnum arrogantes, sed potius, ut bonos homines decet, modestia quadam temperatissimos; sequitur gregatim tor nobilissimorum Epheborum cætus, ut sit omnibus civibus quidem perjucundum, exteris vero, atque advenis etiam visu speciosum. Ubi vero ætati paulum roboris accessit, transvolant, aut ad Jurisperitorum scientiam, aut ad Philosophiam, ad easque artes, quæ nobis traditæ sunt disciplinis, ac monumentis; & in quacumque se exercuerint, evadunt plerique summi, quod in Grammaticis, & in Poetarum cognitione fuerint prius apud nos optime instructi; remanent complures in patria eloquentiæ dediti, Rhetorum præceptis etiam infirma ætate delectati, quod quidem apud nos semper abundavit, fuitque Civitati nostræ proprium, ac peculiare. Hinc omnibus ætatibus plurimi in literis excellentes prodire, qui mos, virtusque majorum adhuc durat propter Magistrorum excellentiam. Id vere est, Judices, ha-  
bere

bere in Civitate Gymnasium, Acadamiâque literarum, & bonarum artium exercitationem. Si cui Civitati hanc ob rem gloriari liceret, nostra hercle Civitas id jure facere posset.

Jactant pro se Papienses nobisque objiciunt literarum Gymnasium, quod Regulorum nostrorum institutioni, liberalitati, atque impensæ, velint, nolint, acceptum referre debent. Habemus nos in Civitate nostra, si ad omnia respiciatis, Judices, non impar, non inferius Gymnasium, nostra cura, nostrapte industria, atque impensa, nostroque (ut ita dicam) Marte institutum, ne potius natura contendam; in quo etiam heroicis temporibus, monumentis gravissimorum Scriptorum proditum est, maximos viros in re literaria summos evasisse, quibus si credendum est, gloriari possumus in Academia Cremonensi Publium Virgilium Maronem, illud Poetarum omnium ætatum omnis memoriæ clarissimum lumen profecisse; cujus rei memor ille, ut aliquam gratiam referret, nomen Civitatis nostræ suis carminibus, honoris causa, inseruit. In Gymnasio Papiensi juventutem docent Magistri aliunde publico Provinciæ sumptu conducti, exteri quidem, & adventitii homines, inter quos aliquando nostri etiam Cives tam in Philosophia, quam in Legum, ac Juris scientia excellentes magna mercede conducti ab illis fuerunt. Nostrates nos habemus semper, per quos proficiamus domi, in illis etiam studiis, atque artibus, quæ non addiscuntur nisi quadam exquisita ratione, atque doctrina. Nos, ut jam ostendimus, habuimus semper in omni studiorum genere plures,

res, ac præstantiores viros in Philosophia, in Legum facultate, in Medicina, in omnibus Mathematicis, in arte Oratoria, ut Poetas omittam, cæterosque Scriptores, qui implerunt Orbem terrarum nominis sui gloria. Hoc, inquam, est, Judices habere Gymnasium, quo tamen Civitas nostra non tantopere gloriatur; quod si faceret, ut isti sæpissime identidem usque ad nauseam solent, sua quidem jactaret, non aliena; sua opera, sua indultria, sua pecunia, atque impensa, non Regulorum liberalitate sibi collata prædicaret. Amplius dicam, Judices; odiosum sane esset per se solum, plenumque fastidi, & nausæ, si tantum commendationem Papienses aucupari vellent ab hujuscemodi Gymnasio, quod alieno beneficio habent; quanto vero intolerabilius videri debet, quod omnia faciunt ut eo careant?

Quippe, quo impensius, studiosiusque Cæsar, ac Cæsaris jussu Ordo vester nititur, ac laborat, nunquam sumptui parcens, ut percelebre sit, ac perfrequens, eo isti semper magis pugnant feris, ac barbaris moribus, idest inhospitalitate (de improbis tantum loquor, ut soleo, & ut millies in tota Oratione præfatus sum) ut nobiles adolescentēs, qui è diversis Orbis partibus eo confluent, a suæ Urbis accessu deterreantur, cum illisque habent perpetuum bellum, & nisi vestra Ediçta, formidolosaque Senatus Consulta obstant, quibus cavetur, ne quis hujus ditionis, rei literariæ gratia, peregrinetur alibi, quam Papiæ, nemo sit in tota Provincia, qui in solo Papiensi ponat pedem; ad barbaros potius, efferaeque nationes se

con-

conferrent. Vobis Papienses in externos adolescentes hospites vestros est odium insitum, naturale, barbarum, atque immane. Omnes vos vitant; omnes defugiunt, ac detestantur, cum eis est nulla Civium vestrorum consuetudo, aut familiaritas. At si quando aliquid rixæ inter civem, & hospitem coortum fuerit, omnis fere juvenus vestra odio communi sese erigit; conclamatur, & ad arma simul ruitur; clauduntur tabernæ omnes, dato signo, in miserum hospitem fit impetus, & quoscumque alios adolescentes hospites, aut peregrinos interim obvias habent, licet omni culpa vacent, tantique tumultus penitus sint ignari, crudelissime trucidant. O rem; tetram, miseram, ac detestabilem! Non loquor audita, vidi, vidi ipse, Judices, iis oculis, atque olim expertus fui; & bis a periculo vix me exemi. Apud Lestrygonas, apud, inquam, Cyclopes tutius, commodiusve peregrinaremur. Quot miseros parentes honesto loco natos, quot infelices matres familias nobilissimas in diversis Orbis partibus arbitramini ab istis privatos, liberisque orbatos fuisse? Expectabant illi quidem fortasse, summisque votis cupiebant videre tandem filios domum redeuntes insignibus, & ornamentis studiorum suorum cohonestatos, condecoratosque, ut tandem tot laborum, sumptuumque aliquem fructum reportarent; & jam forte illi pro eorum reditu vota Diis faciebant. O fallaces parentum spes! o irrita pietissimarum matrum vota! pro carissimis filiis redeuntibus sæpissime illis venit tristissimus famulus, aut pædagogus, qui eos ab hospitibus immanissime

mē



me interceptos nuntiaret! Sed quid ego hæc vobis, Iudices, quibus quotidie est opus Papiam id propter pacificatorem, aut Quæsitorem mittere, quos etiam non latet quam bene acceptos Magistratus optimos viros a se semper exacto biennio dimittere consuerint? O pacatissimas, & humanissimas Civitates Bononiam, Patavium, Ferrariam, Pisas, Senas, Perusiam, Salernum, Taurinorum Augustam, ne transalpinas appellare mihi sit necesse, apud quas omnes, adolescentibus rei literariæ gratia peregrinantibus is fere est honos, quem paulo ante dicebam in nostra Civitate a nostris hominibus haberi omnibus hospitibus! Ea propter multum mecum mirari soleo, quæ tanta sit Cæsaris, vestraque, Patres, patientia, quod hanc studiorum commoditatem, quam a se Papienses tantopere projicere, & a se abalienare conantur, non hætenus in aliam hujus ditionis Civitatem transfuleritis, ubi agnoscat, libentiusque suscipiatur.

Jandudum, Papienses, totum vestrum ædificium, dejectis, demolitisque omnibus substructionibus ad duas tantum columnas redegeram; nunc etiam, ut videtis, altera everfa est, atque subtracta; tota machina collabascit, ultima tantum relicta columella, qua innititur omnis vestra arrogantia, atque superbia; ea deinde sublata, subito in perpetuum casuri estis, quin potius arbitror, jam intelligitis vos concidisse; ita contracta vestra res est, & adducta in angustum. Neque mihi persuaderi potest, ut de REGNO iis Iudicibus mentionem facere audeatis. Cum animadverto qui fuerint

tint illi vestri Reges, quamve jucundam nominis sui memoriam toti Italiæ reliquerint; cumque attendo qua prudentia sit Orator a vobis conductus, non puto eum hoc tanto confesso, hoc amplissimo conventu adeo abusurum, & hanc frequentiam pro solitudine usque eo habiturum, ut non perhorrescat excitare illorum temporum memoriam jam vetustate repressam, ut, inquam, representer vobis, Judices, illam tempestatem subitam, atque improvissam formidinem, tenebras Italiæ, ruinam, atque incendium pulcherrimarum Urbium, quæ plus mali Italiæ intulit, quam Annibal cum omni Pœnorum exercitu, ut commendationem honoris Papiensibus petendam arbitretur a barbarorum injuria: ejus potius prudentiæ erit clientum percupidorum incitiæ, & imprudentiæ obviam ire, & vobis, Papienses, persuadere, ut destinatis ea pro vobis jactare, quæ potius extant monimenta scelerum, atque omnium dedecorum, quam ornamentorum; ne eorum temporum renovetis memoriam, quibus iniusta est vobis labe sempiterna, nisi vobis in aliquam suspicionem velit incidere, se a nostris callide appositum fuisse prævaricatorem, qui vos adversarios nostros suos Clientes pro nobis vituperet, & nobis silentibus, causam nostram agat, eaque dicat adversus vos, quæ nos tacuissimus, neque vos ad illa usque tempora revocavissimus.

Dii faciant, ut contra Leges Romani Imperiî in urbe Mediolano de isto Regno sædissimo hiscere audeat; quod quidem, Judices, eum facturum esse de quodam audiui, cum illi penitus desit caus-

sa, aucupeturque undecumque argumentationes, & omnes ratiunculas colligat, ut aliquid saltem dicat, neu videatur nullo fructu magna mercede conductus; nam ea solum tabula eis restat a tanto naufragio. Ita eos detractis regiis insignibus trahebam, ita versabo, ita abjiciam, ut non modo dejecti a regni possessione, in quam injuste, & violenter invaserunt, sed etiam omnibus suis ornamentis spoliati, ridiculi, ne dum miserabiles plane redantur. Prodeat sane, prodeat iste ferreus Orator cum illa plumbea, atque infabricata Oratione, nihil hercle longius mihi, quam cum audire! Ita ego Regnum illud inauspicato positum, & Legibus Imperatorum nostrorum abrogatum, totamque Regiam, probrorum, ac crudelitatis aulam deturbabo, ita affligam, ita comminuam, & tanquam in pulverem, aut fumum redigam, et præter probra, & scelera, quæ neque Oceanus omnibus undis unquam eluere posset, nullum penitus appareat vestigium. Satiis isti, si me audient, sponte sua regno iniquissimo se abdicabunt, sceptrumque illud cruentum, & diadema ultro poscient, ut altum dormiant, & aliam operam navabunt, qua se nobiles asserant, ut se nobiscum, non injuria conferre possint.

Ajunt itaque, Papiam vel hoc solo nomine Cremonæ præferendam, quod aliquot annos Longobardico tempore, Italia a prædonibus capta, atque direpta, ibi sedes regia fuerit, cum interim Crémonea, quæ nulla vi, nullis malis cogi potuit, ut a Romano Imperio descisceret, a barbaris illis Regibus

gibus Papiensium, direpta, devastata, peneque complanata vix urbis vestigia retineret.

Hæc est arx totius istorum confidentiæ! hoc unum superest propugnaculum! Obsolevit jamdudum ista Oratio, magis re, quam verbis confutata. Vide quanto fastu istorum, despiciamur omnes. Ista enim ratione necesse sit Papiensibus cedant etiam ipsi Mediolanenses, qui se Reges habuisse in sua Civitate regnantes non contendunt, regiæque urbi tunc rerum Dominiæ Mediolanum obtemperasse necessario fatendum sit, quorum primum si vobis Papienses concessero, fuisse, inquam, ea tempestate in Municipio vestro Regum domicilium, ac sedem Imperatoriam, & ea re vobis primas detulero, velitis ne, rogo, hoc nomine antecellere omnes alias provinciæ Civitates, quas nulli Reges pro domicilio habuerunt? etiam ne, obsecro, Mediolanum, illam, illam Civitatem, tot, tantisque prædiis, & ornamentis redundantem, tam magnis opibus, copiisque fluentem, ut merito, non modo urbium hujus ditionis sit caput, sed etiam digna sit, quæ perpetuam sedem, ac domicilium præbeat universi terrarum orbis imperio, provinciisque omnibus, nationibus, & regnis præscribar, atque imperet? Quæso ne etiam, Papienses, [nam quo non progrediatur audacia?] eadem ratione præ vobis despicitis, ac pro nihilo habetis illam Venetorum clarissimam, atque amplissimam Civitatem, quæ non modo Italiæ, sed etiam totius Imperii, ac nominis Christiani semper Arx fuit munitissima, firmissimumque contra bar-

barbaros propugnaculum? etiam ne, inquam, si Diis placet, Venetis vultis præferri, quod illi nunquam servierint Regibus barbaris in sua Civitate dominantibus; qui semper suis institutis, suisque legibus liberi vixerunt? Quasi vero in hac re non sit mihi penitus exploratus vester sensus? quasi vestra arrogantia non sit omnibus notissima? ac si non plane constet, vos cunctas Civitates præ vestra animis premere, atque despiciere, & pro nihilo habere? dignitateque nulli urbium cedere, una vix, ægreque excepta Roma, quod etiam vos metipsi omnibus, quibus contingit ad vos divertiti, testatum esse voluistis, literis in saxo insculptis, quod in portæ Ticinensis poste positum visitur? Quid enim aliud sibi vult ROMA SECUNDA VALE MUNDI CAPUT? furentis hominis, ne dum insani Poema. Quid expressius, quid illustrius expectatis? Legunto quæ sequuntur non minore majestate, quicumque illaciter habuerint, & risum si poterunt, teneant, non minus propter hominum inauditam arrogantiam, aut potius dementiam, quam propter Poetæ illius inscientiam, ac stuporem.

Admoneo vos per amicitiam, vicinitatemque, obnixè caveatis, ne a populo lapidibus obruamini. Colligite vos per fortunas vestras, ac tandem rescipiscite. Mihi vos fideliter admonenti auscultate; cogitate qui sitis, quam contempti, quam despecti, quam ejecti, quam nulli, quam saltem indigni, non dico, qui vos Mediolano, Venetiis, Neapoli, Florentiæ, Genuæ, Bononiæ, cæterisque principibus Italiæ Civitatibus præferatis, sed

O

qui

qui nobiscum veniatis in contentionem honoris, & amplitudinis. Aliud porro molimini, ut vos quoque inter mortales aliquid esse videamini. Saxum illud multis literis illiteratum sine ulla mora demolendum locate, atque in Ticinum projicite; quamprimum, inquam, si sapitis summove-  
te, atque abducite illud ludibrium a prætereun-  
tium aspectu, ut designatis omnibus mortalibus esse fabulæ, ac deridiculo. Scio tamen, me acta agere, & hæc frustra vos monere, atque, ut ajunt, cantilenam surdis canere; novi optime cer-  
vices vestras, sed jam agite, si placet Majestati vestræ, Papienses, rem cominus aggrediamur, ut cogam vos statim cruentissimum sceptrum, atque infame diademā deponere, & vos metipsos ultro regno abdicare. Nunc penitus in hujus causæ arcem invado; hic capietur Troja. At-  
qui sane vereor, Judices, in hoc ne vobis mole-  
stus sim, neve vestris ingeniis diffidere videar, si de re tam absurda diutius laboravero, atque in-  
consultam rationem, quæ prorsus nulla est, plu-  
ribus verbis confutavero; machinasque, & tor-  
menta adhibuero, ubi omnia sint pervia.

Primum dicō, nullam Civitatem dignam esse, quæ regia appelletur, nisi quæ tanti honoris no-  
men sustinere possit. Vidimus superiore actione, quantis opibus, quanta magnificentia prædita sit Papia, ne toties vestra patientia, Patres, abutar, animosque vestros afficiam, torqueamque, & affli-  
gam, cum sæpius ante oculos vestros istorum squa-  
lorem, atque egestatem oratione repræsentō, vos-  
que ad misericordiam tam sæpe revoco, cum ego  
ipse

ipse efficere nequcam, quin me quoque istorum  
 misereat, non tam quod eorum sint opes tenues,  
 fractæ, atque debilitatæ, quam quod in tam re-  
 nui, afflictaque fortuna se Reges appellent, idest,  
 quod plane insaniant, nec eis in mentem veniat,  
 se esse sub ditione, sibi que aliorum imperio, ne-  
 cessario obtemperandum, Papiamque agnoscere a-  
 liam Civitatem principem, dominatricemque to-  
 tius provinciæ, hujusque imperii caput. Esto, fui-  
 stis Reges, nunc exuti diademate, regisque orna-  
 mentis, alteri Civitati subiecti paretis, ne dicam  
 servitis. Fuistis Troes. Quis Oedipodem abdicat-  
 um regno, atque ejectum, cultu miserabili contra  
 decus regum, pro Rege Thebis habuit? Spoliati  
 regno Reges, deformatique ærumnis, nihil aliud  
 regale apud homines retinent, præter inane simu-  
 lacrum pristinæ dignitatis, præter, inquam, so-  
 lam opinionem, recordationemque majestatis, &  
 regis fortunæ; quæ res solum eos in calamitate  
 magis misericordia dignos, quam cæteros homines  
 efficit, ut Priamum, multosque alios Regno eje-  
 ctos, & omnibus miseriis coopertos. Quem Epa-  
 minundæ quæso in scena non moveant miseriæ?  
 cui non eliciant lacrymas Philoctetæ calamitates,  
 & ærumnæ? nihil in illis præterea regii reliquum  
 est. Esto, Papiæ fuit Regum sedes, & aula. Fuit  
 illium, & ingens gloria Papiensium, nunc con-  
 temptissimum Municipium cum cæteris hujus im-  
 perii, ac provinciæ Municipiis, Colonis, ac Præse-  
 cturis, alteri Civitati paret. Fuit illorum regnum,  
 nunc spoliati regio nomine, regalique splendore  
 obsolescentes, in squalore, & sordibus marcent.

Jili

O 2

Omnia

Omnia regalis nominis, atque honoris insignia, & ornamenta ab eis recefferunt. Si præteriti status, honoris, ac dignitatis ulla ratio habenda foret, longe Papiam dignitate antecellit Cremona. Illa, cum esset Regum sedes, non iccirco tamen Papienses Reges erant ipsi, sed Regibus subiecti serviebant, dicam postea quibus Regibus, quasi vero ipsi essent Reges, non barbarorum, aut prædonum servi? vobis, Papienses, nihil illud regnum attulit, nisi quod barbaris Tyrannis servistis, coacti quidem primum, & vi capti, ut cæteri, sed postea servitutis assuefacti vos metipfos illis sponte subjecistis, dominosque, ultro illos vobis, projecta in sempiternum ( quantum in vobis fuit ) libertate, imposuistis, uti gens ad servitutem nata, & ad omnem ignominiam perpetiendam facilis, nihil de laude, ac decore cogitans. Videte, quantum differat mea sententia a vestra opinione; vos ponitis in maxima laude, quod Reges aliquando in Civitate habueritis, quibus majores vestri serviebant, ego vero eos, qui se sponte in servitutem subjiunt, in eaque libenter permanent, non tantum nulla laude, aut honore dignos esse existimo, sed omnino ex hominum numero ejciendos, & finibus humanæ naturæ exterminandos censeo. Occurretis fortasse, atque pugnabitis, non vestra sponte illud servitutis jugum vestris cervicibus imposuisse, sed fatali quadam necessitate adactos cum cæteris Italiz populis in illas miseras incidisse. Hanc defensionem, Papienses, jamdudum vobis ipsi amputantes eripuistis, dum contenditis eam turpitudinem maximo vobis fuisse.



fuisse ornamento, quam omnes detestantur, ac perhorrescunt, atque inde vos tam insolenter effertis, in quo quidem ostenditis, vos, majoresque vestros jugo turpissimo delectatos voluntariam servisse servitutem. Jam intelligitis, quam levis, quam inconstans, quam inconsulta sit vestra ratio, qui dignitatem quaeritis ab injuria illorum, qui vos in miseram servitutem redegerunt, decus ab ignominia, gloriam ab infamia, a labe nitorem. Vos tunc barbaris Regibus eratis in sinu, atque in oculis, cum interea nostri Cives de libertate, ac decore cogitantes, existimantesque homini Romano nihil esse turpius servitute, omnibus incommodis afficiebantur, quod nullis persuasionibus, nullo terrore, nulla vi cogi poterant, ut ab Imperii Romani societate discederent. Vos barbaris regibus eratis in deliciis servitutem servientes, quod eos in cervicibus Italarum populorum collocaveratis. Nos interea a sedibus nostris, Penatibusque ejecti, profugique vitam inopem, ac vagam persequabamur, ne cerices nostras latronibus daremus. Regum sedes, ac domicilium fuit multos annos vestra Civitas, at nostra jam tunc ea erat, quæ non modo barbaris Tyrannis sedem, ac domicilium præbere posset, verum etiam, si historiis credimus, digna, quæ esset Romanis Imperatoribus sedes. Vestra Civitas regia fuit, at nostra multo magis digna erat non dico illorum, sed optimorum Regum domicilio, si ultro voluisset se barbaris in servitutem dare. Affecuti sunt Papienses ornamenta sine ullis meritis; at nos libenter isto honore caruimus. Sem-

per ego is fui, qui malle[m] virtute prædictus esse, eaque mecum frui sine virtutis insignibus, quam insignia virtutis habere sine virtute. Fuerit verò etiam Papiæ ea civitas, quæ omnibus ornamentis redundans, digna esset Regum sede. Fuerint etiam illi Reges iusti, & legitimi; non tamen propterea nos illi dignitate antecederent. Quippe nostra Civitas, si fides habenda est annalibus, multos annos in libertate fuit, suis legibus, atque institutis nixa, nulli Regi, aut Imperatori subiecta, neque ullo pacto obnoxia, ut quondam Athenienses, Spartani, Romani, & nunc quoque Veneti, Epidaurii, & novissime, præclari Viri Andrew Doricæ beneficio, Genuenses Ligures; Papienses erant Regum servi, non Reges, ac majores nostri erant nostræ reipublicæ Reges, ac dominatores, nulli, præterquam legibus optimis, parentes; quibus præcipuum semper fuit libertatem, nisi cum vita, non amittere; utra conditio magis honorifica, magisve optanda foret, in animis vestris, Iudices, atque in vestris ingeniis relinquo.

Tandem ad majora deveniamus, neque jam mihi ulterius dissimulandum; jam loquamur, jam detractis integumentis, involucrisque explicatis, rem sicuti est, fari incipiamus; erumpatque aliquando vera, & me digna vox, atque Oratio. Quasi vero illi Reges fuerint, & non potius Tyranni, latrones, piratæ, prædones teterrimi, omnem diritatem, atque immanitatem superantes, in quibus nullus sensus humanitatis, nulla pietatis ratio, sed contra omnes divinas, atque hu-

manas

manas religiones, qui omnia divina, atque humana jura tyrannide polluerunt, pestes illorum temporum, furiae Italiae, tempestas omnium bonarum artium, insigne odium omnium hominum, commune incendium naturae, & humanitatis inimici. Dii, tales Reges terris avertite! Non vos puduit esse Papienses, beluas tam immanes, tam diras, atque pestíferas Reges appellare, ut res teterrimas, honesta praescriptione teneretis? Reges esse oportet, qui ab aequitate, a legibus, & institutis non recedunt; ab aliqua gente, aut Civitate, ob virtutem, aut suam, aut majorum suorum ad gubernacula reipublicae vocati, a Pontifice Maximo, & a supremo Romanorum Imperatore comprobati fuerunt. Vestri vero Archipiratae, & praedonum Principes, Sacrosancti Romanorum Imperii perpetui hostes ex gurgustio nescio quo, ex caeno, atque ex tenebris emergere, a nemine, praeterquam a vobis, nisi vi, & injuria comprobati, atque suscepti. Et istos Reges appellare non vos pudet? Credo equidem, si aliquis Cerberus, aut Demogorgon, aut quoppiam aliud tetrius monstrum, & naturae portentum in vestris oris nescio quo fato, insedisset, id quodcumque fuisset, pro Rege statim habuissetis. Porro si illi Reges fuerunt, fateri necesse est Occidentale Romanorum Regum imperium contra jus, & fas institutum fuisse, minusque ex lege; & illud omnium gentium, atque omnis memoriae clarissimum lumen Carolum ejus nominis primum minus legitimum Imperatorem fuisse, qui magni cognomen meruit ob id ipsum, quod incredibili

quadam, eximia, atque divina virtute illas pestes, Reges vestros, tanquam teterrima monstra, illius tempestatis prodigia domuit, & Italiam, sublata eorum tyrannide, a misera servitute liberavit, Dei Optimi Maximi beneficio illis temporibus procreatus. Si illos Reges fuisse contenditis, Carolum, justum, aut legitimum Imperatorem non fuisse vobis omnino fatendum erit. Progrediar paulo ultra. Si ille Imperator non fuit (quod, si dixeritis erit extremae dementiae) neque tot alii magni, & clari Reges, qui ei longa serie succedere, Imperatores dicendi; cogemurque (audite, audite, atque attendite, Papienses) hunc nostrum ab eo ejusdem nominis quintum, cujus praeclarissime res gestas domi, militiaeque nulla unquam obscurabit oblivio, velimus, nolimus, Regem non esse necessario confiteri; hac enim artius ratio astringi non potest. Malam potius illis latrunculis, vestris Regibus, Crucem, ac pestem! Cavete; per amicitiam rogo, ne quis, ista tam inconsiderate, atque inconsulte effutientes, vos perduellionis reos, lege Cornelia, aut Apuleia, deferat Majestatis, neu vosmetipsos inducat in eas captiones, quas nunquam explicetis. Rursus etiam, si Carolum, & qui in imperium usque ad nostra tempora succedere, Imperatores fuisse conceditis, nulla ratione defendi queat vestros, fuisse Reges. Nihil enim tertium esse potest. Circumspicite quid agatis, utrumlibet attigeritis, ulcus erit; utrocumque convertamini vosmetipsos in praecipitem locum committitis; nullo enim pacto, & hos, & illos legitimos extitisse admitti potest. Si illos,

illos, idest vestros latrones, pugnatis fuisse Reges, cur Carolo, ob id maxime, quod illos, regno everfos spoliavit, domuit, necavit, regnum, atque imperium defertur? Si illi inquam iusti, & legitimi, qui Caroli iusta arma dici possunt? Quæso vos, vultis ne etiam contra Imperatores, qui Carolo successerunt, agere interdicto UNDE VI, ut Reges illi vestri, aut eorum posterii in majorum suorum regnum restituantur? Si illud legitimum regnum fuit, cur Imperatores nostri sancti, atque augusti illorum regnum damnaverunt, non modo acta infirmantes, ac plane rescindentes, sed etiam omnes eorum leges, quarum nulla erat optimæ reipublicæ consentanea, refigentes? ipsique tulerunt Legem, qua illæ omnes non antiquarentur modo, & paulatim ab usu recederent, sed etiam expresse abrogarentur, dissolverenturque, utpote iniquæ, & perniciosæ, per vim, libidinemque, contra omnia exempla, contra gentium, & ipsius naturæ jus latæ, provinciarque per scelus, & latrocinium impositæ, & cunctæ fere Italiæ iniustæ, quibus nos, nostraque omnia addicebamur barbaris, ac servis? non leges, sed latrocinia, sed injuriæ, & nefaria optimo cuique irrogata privilegia, quæ cum neque animi hominum, neque fasti ferre possent, nostri Cæsares una rogatione abrogarunt, ac deleverunt? Si Regum vestrorum leges, & acta defenditis, necesse est sacrosanctas Imperatorum nostrorum sanctiones infirmetis, impugnetis, convellatis. Utræque simul nullo modo consistere possunt. Eligite utras malitis stare, utrorum etiam Regum acta, Rei.

Reipublicæ magis conducat esse sancta, atque integra. Scio, Patres, me injuriam facere tot magnis, clarisque Imperatoribus, quos cum illis pestibus comparo; quod facere coactus fui propter pervicaces, ne dicam, ignorantes, si forte istos tanto errore inflatos possem ad aliquam lucem, si minus ad frugem perducere. Sed qui malum, tandem, Papienses, isti fuerunt vestri Reges? jam intelligitis, Municipium vestrum non fuisse Regum domicilium, sed teterrimarum belluarum infame lustrum, non regiam, sed plane latrocinii aulam, seu potius haram, ejusque omnem regni memoriam e fastis vestris omnino tolli, ac deleri oportere, nisi Cæsarum legibus adversari vultis: sed quid ego ipse quoque dixi regni? cum, inquam, regnum non fuerit, sed magis superba, crudelisque barbarorum dominatio, aut potius Italiæ quædam calamitas, vel Dei Optimi Maximi ingenus humanum ira, atque vindicta. Cum in Græcia Romanorum Imperatores rempublicam negligentius administrarent, anno a partu Virginis DLXVIII. Justino ejus nominis II. Imperatore gens Longobardorum, Ostrogotorumve immanissima, collecto ingenti latronum exercitu ab Oceano, & ex Pannonia movens, Albuino duce Romani imperii perpetuo hoste, in Italiam irrupit; quæ barbarorum immanitati facile patuit, quod illorum adventus subitus fuit, & improvisus, nec Italorum Civitates conspirare potuerunt conjunctis viribus, communicisque consiliis, subito conflato exercitu, ut malo, periculoque communi occurrerent, quod abesset interim longe Romanorum Imperator Italia

Ita barbarorum direptioni, atque incendiis relicta, potitque ideo sunt Longobardi hac opima, atque optima Italiæ parte, quod omnibus fere aliis Italiæ Municipiis, ac coloniis barbarorum irruptioni, prout cuique pro se copia erat, resistentibus, Ticinenses post paucorum dierum obsidionem se facile hostibus dedidere, projecta sua, Italiæ prodita libertate; quibus oportebat non tantum muros, sed etiam corpora sua opponere, ne se, & socios populos, totamque Italiam traderent in turpissimam servitutem, quam viri fortes, non tantum in maximis malis semper duxerunt, sed postremum omnium malorum, non modo bello, verum morte etiam repellendum. Quod quidem finitimis, cæterisque Civitatibus valde perniciosum fuit, quoniam barbari postea usi sunt eo receptu, tanquam arce, & propugnaculo ad expugnandas cæteras Italiæ munitiones, ipsamque Italiam in fædissimam servitutem redigendam. Intercepto mox suorum fraude per insidias Albuino, sufficitur in ejus locum ab exercitu latronum Clephis archipirata, qui omnem Italiam præter Romam, Tybur, & Cremonam, occupavit. Ei nemo, qui summam rerum unus administraret, successit; sed triginta duces, ad quos totus exercitus respiceret, creati fuerunt. Hi per decennium nullo Imperatore Italiam depopulati sunt. Tandem Eutharis ab exercitu Imperator dicitur, Eo dominante Cremona adhuc perstabat in fide cum Imperio Romano. Post illum Agilulphus Taurinorum Dux, Theodolindæ feminæ primariæ optione, & Ducum voluntate, summæ rerum præficitur, Primus hic nomen

nomen regium sibi arrogavit, & Papiæ Regiam constituit; sub quo Cremona triginta dierum obsidionem passa, vi tandem capta est, direpta, & pene solo æquata, tela omnia Papiensibus submitrantibus. Succedere mox aliis alij ea durante calamitate, ac tempestate, compertumque est animalium memoria, eam immanissimam gentem circiter annos ducentos Italiam divexasse, devastasseque, & eorum Duces omnes hostes Imperii Romani, atque summis Pontificibus semper infestos fuisse, semperque fovisse illos; qui de religione, prava sentirent, præsertim qui essent ex Arrianorum hæresi. Tandem Carolus Gallorum Rex incredibili, ac divina virtute, magnis Italiæ luctibus, funeribusque subvenit, eamque liberavit a crudelissima servitute, compressa barbarie, capto, & interfecto Desiderio ultimo Longobardorum Imperatore. Victori, liberatorique habiti sunt tota Italia, finitimisque in provinciis honores prope divini. Ne vero de cætero propter Romanorum Imperatorum absentiam Italia direptionibus barbarorum, & incendiis indefensa relinqueretur, Romani Pontificis nutu, atque auctoritate, mira totius Italiæ ipsius, & omnium provinciarum, regnorum, & nationum consensione, ipse Carolus immanissimæ Gentis victor, Romanorum Imperator appellatus fuit, hac lege, ut diviso imperio, ipse, & ejus successores in Occidentali plaga regnarent, Græci vero in Orientali. Hæc mihi fuerunt altius repetenda, ut intellexeretis, Papienses, quod superius diximus, necessario fatendum esse, fuisse, inquam, injuria Imperium



perium divisum; neque Carolum Magnum justum, & legitimum Imperatorem dici potuisse, neque eos, qui ad hæc usque tempora ei successerunt jure institutos, si Reges fuisse comprobentur illi, qui vos in miseram, & turpem servitutem adduxerant, qui contra omnes divinas, atque humanas leges, religionesque regnarunt, quorum regnum, non modo ab ullo Romanorum Imperatore, ut opus est, comprobatum, aut a Pontifice Maximo laudatum, receptumve fuit, nisi per vim, verum etiam contra ipsum Romanum Imperium, contra omnes Pontificum Religiones, semper stetit, barbarique per latrocinia, & cædes, nullo instituto, nulla religione, nullo more, nullo exemplo tyrannidem crudelissimam adorti, hujus sacrosancti Imperii, & sacrorum perpetui hostes, prædonesque religionum, ad facinus, prædamque nati. Nullum jus tam sanctum, tam integrum, quod regnum vestrum illud non violarit, atque immiserit, genus hominum ferum, tetrum, barbarum, inauditum, inusitatum, ex illa vetere, & fabulosa immanitate, si ulla apud vos foret annalium memoria, aut cura. Nisi plane nihil sciretis, nunquam in Regni illius mentionem præcipites ruissetis, nunquam rationes vestras tam infeliciter ad hos scopulos appulissetis; perhorruisset illius nefariæ tempestatis miserias; reformidasset vobis animus renovare illorum temporum calamitates, quibus nullæ unquam in Italia majores fuere, cum immaniissimi prædones bellum in tota provincia Diis, hominibusque indixissent, cum præclare Italix Urbes exhaurirentur, vasta-

ren.

rentur, urerentur; cum illi a sacrosanctis delubris sacrilegas, impiasque manus non abstinere, cum nullum crudelitatis genus omitterent, cum non hominum modo, aut more, in victoria exultarent, cum provincias popularentur, vexarent, everterent, affligerent, Civitates vastarent, domos exinanirent, quicquid auri, quicquid argenti, stragulae, ac pretiosae vestis in Italiae urbibus, sedibus, delubris fuit, abriperent, atque auferrent, cum delubra sanctissimis religionibus consecrata spoliarent, fana diriperent, omnia pulcherrima, & antiquissima signa, pictasque miro opere tabulas, & opera, quae paulo magis affabre, atque antiquo artificio facta videbantur, non modo auferrent, verum etiam nullo compendio, aut usu, barbare perfringerent, scelerarentque omnis humanitatis, atque elegantiae hostes; barbare dixi, cum non occurreret mihi gravius vocabulum, quo libenter usus fuisset, vix hoc vulgari contentus, desunt enim mihi saepe verba ad tantam immanitatem apposita. Nullum crudelitatis genus ab illis omissum fuit; rota ardebat Italia; oppida evertebantur; diripiebantur villae; vastabantur agri; Matres familias, Virgines, pueri ingenui raptabantur. Quae tempestas, Diis immortales! quae flamma! quae vastitas Italiae! o vere spectaculum illud non modo hominibus, sed faxis ipsis, & scopulis luetsuosum! quaecumque ibant, omnia vastabant, omnia abripiebant, omnia cruentabant, ad praedam, facinusque, & crudelitatem nati. Nunquam Poeni tantum Italiae malum, non dico jam intulerunt, sed optarunt, quantum illi fecerunt Poeni.

Ponite vobis ante oculos, Patres, miseram fugam civium ex omnibus municipiis; tamen omnia crudelitatis exempla animis vestris complexi fueritis, nihil, scio, adhuc dignum illa immanitate cogitare poteritis. Alios ante suos lares familiares truculentissimi prædones trucidabant; alii ejecti, everisque fortunis omnibus, vi tempestatum, & calamitatum concursu, miseram fugam suorum per solitudines comitabantur, lassitudine, morboque, ut inquit ille, exilio, inopia circumventi deprehendebantur in speluncis, cavernisque, & sepulcris latitantes. Erat barbaris in cædendo nullum discrimen; nulla conditionis, nulla sexus, aut ætatis ratio habebatur; non ætate confectis, non mulieribus, non infantibus parcebant; agri undique, fossæ, rivi, ac fluvii civium sanguinem exsorbabant; ubique formido, ubique luctus, ubique supremi gemitus morientium audiebantur; e parentum complexu parvulos abripiebant, ad necemque ducebant, & sub eorum oculis trucidabant; infelicissimas Matres pro sepultura liberorum, prætium deposcebant, quo persoluto, eas quoque nichilominus crudelissime obruncabant; aliorum capita a cervicibus amputata, aut avulsa, palo præfixa circumgestabant; reliquum corpus in mare, aut flumina laceratum abiciebant; alios in crucem agebant; alii dispersis bustis, insepulti jacebant; cæteri semianimes, incuria, fame, vastitate, illuvieque consumpti optatissimam mortem expectabant. Hic optanda mihi esset ea in dicendo vis, ea copia, atque facultas, qua summi Poetæ, quales multos habet nostra Civitas, præditi sunt;

ut

ut hæc pro atrocitate rei, digne defflere possem?  
 quove vobis, Patres, planum facerem quod homi-  
 num genus, si tamen illi homines judicandi, pro  
 Regibus suis præ se jactitant Papienses. Saltem  
 utinam adesset aliquis ex magnis illis nostris  
 Oratoribus, quos domi reliquimus omni laude cu-  
 mulatos, exillis, inquam, quorum oratio aculeos  
 habet, & nervos forenses. Subvenite igitur vos,  
 Judices, meæ mediocritati, aut potius in dicendo  
 tenuitati; providete, ne paupertas Orationis, no-  
 stræ causæ noceat, neve nobis sit fraudi inopia  
 verborum. Cogitate per vos ipsi, vestris animis,  
 plusquam ego dicam, nullam crudelitatem majore-  
 rem unquam fuisse post omnium annalium memo-  
 riam; statuite vobis ante oculos miseram, & fle-  
 bilem speciem illam, vincula, verbera, equuleos,  
 carnifices, tortoresque barbaros. Cæterum vos  
 hic oratos volo, ut vestra bona venia liceat mi-  
 hi de prædonum nefariis stupris nihil penitus di-  
 cere; illorum tetras, tragicalque, & in omni in-  
 temperantia effusas libidines commemorare mihi  
 animus plane refugit, ad illarum memoriam to-  
 tus perhorresco, natus in ea Civitate, ubi vere-  
 cundiæ, ac pudori, qui ingenuos decet, semper  
 locus fuit. Quæ modo, Judices, commemoravi, in  
 bello facta fuerunt, atque in victoria, in qua im-  
 manissimæ bellæ exercuerunt suam insatiabilem  
 crudelitatem immaniter, scelerate, nefarie.

In pace vero qualem fuisse creditis nefariorum  
 latronum dominatum, nisi teterrimam, nisi cru-  
 delissimam tyrannidem? qualem putatis fuisse to-  
 tius provinciæ trucidationem, afflicta, atque ever-  
 sa

sa Italia? Quis, quæso, erit, qui pro rei magnitudine non dico verbis exæquare, sed animo complecti possit teterrima immanissimæ, ac spurcissimæ gentis furta, rapinas, crudelitatem, avaritiam, superbiam, scelus, tyrannidem inusitatam, inauditam; feros, ac barbaros mores, asperam eorum naturam, difficilem aditum, gravem vultum, superba responsa, insolentem vitam, crapulam, & vinolentiam, atque fastidium intolerandum? illis nulla Religio fuit sancta, nulla Lex integra, nullus exstimationis pudor, nullius apud illos gravis autoritas, nullum exemplum, quod sequi vellent; omnia judicia in potestatem suam redegerant, omnia contra leges facere, omnia ex libidine, cuncta testamenta mortuorum, & jura vivorum evertere; omnia repagula juris, pudoris, officii perfringere; apud illos nullum forum, muta curia, omnia infirmata judicia; atque deleta; denique jus, & fas omne abolitum, & ab omni hominum consuetudine, atque memoria penitus evulsum. Inter feras erat satius ætatem degere, quam videre; & pati tantam illam immanitatem. Omnis nobilitas Provinciæ erat in carcere, in tenebris, in squalore, in sordibus, omnibus Civibus ob oculos semper mors versabatur; majores vestri, qui soli erant barbaris cari, aderant testes flagitiorum, & omnium furtorum custodes; ex tota provincia veniebat ad vos præda; spolia totius Italiæ Papiam comportabantur recepticem furtorum, flagitiorum sociam; adjutricem icelerum; erat semper acervis cadaverum referta, & Itolorum sanguine omnes ejus viæ redundabant.

P

In

In vestram Urbem erat perfugium omnium scelerum, & flagitiorum; ibi tormenta, & cruciatus infantium; ibi miserrimæ servitutis supplicia; credo equidem, adhuc parietes, postesque domorum vestrarum sanguine sociorum funestati vestigia retinent crudelitatis; solum totius Municipii, cruore Provinciæ adhuc pingue luxuriat. Fecerunt, ut prædones facere solent; nam quamvis illi sint communes hominum\*hostes, tamen aliquos deligunt, quos sibi unos amicos parent, quibusve non modo pareant, sed etiam cum eis furta communicent; plerumque tamen eos eligunt, qui, & oppidum opportuno loco habeant, quosve humili, atque illiberali quadam natura, dimissisque animis, omnia probra, ac dedecora ferre posse existimant ad servitutem natos. Nullum Municipium, nullam Coloniam, nullam Præfecturam invenire potuerunt, quorum incolæ magis moribus, & vita sui similes sibi visi fuerint, magisque ad sua flagitia appositi; nulla Civitas judicata est ab illis magis quam vestra, sua consuetudine digna; nulla æque ac vestra reperta est suæ crudelitati accommodata.

Hic, Papienses, si ego hanc causam Oratorum modo agere vellem, possem facile partem omnium malorum, quæ barbari fecerunt in Italia, in majores vestros derivare, & omnia illorum scelera vobiscum communicare. Qui enim fieri potest, ut Dominatoribus suis Papienses, qui tunc erant, non fuerint in eorum crudelitatibus percommodi adjutores, atque administri, aliqui etiam scelerum socii, atque participes? cum eis opus esset parere,

re, & obsequi, ac quicquid latronibus collibuisse, faceffere? erant enim ejusmodi, ut si quid non ad nutum suum, libidinemve factum esset a vobis, omnia in vos exempla, & cruciatus edidissent; quod a me dictum sit honoris Vestri causa, ut interdum etiam Oratoris vestri partes agam. Itaque nisi meorum civium jussu, ac voluntate dignitati vestræ parcerem, ita hunc locum tractare possem, & vos Oratione exultans hoc modo plena manu urgere, & quatefacere, in majores vestros invehere. Vos, tota gemente Italia, barbaris pactione prædæ, empti emissarii, & ad ministri eratis omnium crudelitatum; a vobis Cruces fugebantur, tormentaque omnis generis a vobis sufficiebantur; vos, populata, afflicta, atque eversa provincia, perditis, profligatisque sociis prædam, & spolia cum latronibus partiebamini, cum quibus illi scelera, & latrocinia communicabant; vos prædonibus eratis in oculis propter prædæ, ac furtorum societatem; vos inusitata, inauditaque avaritia ardentes, ut major furtorum portio ad vos veniret, indicabatis Barbaris ubi occultarentur socii Italiæ populi mortem fugientes, eorumque lagibula, funestam facem præferentes, illustrabatis; omnia miserorum sociorum loca noveratis; omnes eorum aditus tenebatis; vobis, venaticis veluti canibus, odorem sequentibus, prædam illi capiebant, quam ad vos deferrent; vos opima, atque optima sociorum, retrusa, atque abdita eruebatis, & effossa in lucem efferebatis. Proponite vobis ante oculos, Judices, detestabilem prædonum ora, vultum, incessum, spiritum,

ritum, importunitatem, fastidium, animisque vestris cogitate Papienses nostros, humanissimam gentem, barbaros tyrannos ad omne crudelitatis genus inflammantes, & in socios populos, in omnem provinciam, in totam Italiam instigantes, latronibusque adulantes, ac supplicantes, quos ultro sibi Dominos imposuerant. Proh Divum, atque hominum fidem! Cœlum, & terram contestor, atque imploro! Ubi terrarum sumus? etiam apud vos; Patres, contra omnia vetustatis exempla, contra ipsius naturæ legem, præmia scelerum, ac flagitiorum illi deponunt, qui maxime perfidiæ pœna plectendi essent, oppugatores patriæ, hostes Imperii Romani, & sociorum proditores? etiamne Mediolani? in urbe, inquam, Principe provinciæ Romanis Imperatoribus fidelissimæ, aliqui ornari vestris sententiis petunt, quod saveant eorum memoriæ, qui hostes Imperii publice judicati fuerunt, quam Imperatorum leges deletam omnino, obolitamque esse voluerunt? Ubi nunc, obsecro, mos ille, virtusque majorum? Petunt Papienses vel hoc maxime augeri dignitate, & Cremonensibus præferri, quod eorum majores consecrati fuerint; quod cum Longobardis hostibus hujus Imperii se contra socios conjunxerint, consenserint, conjuraverint contra Italiam; cum latronibus prædam partiti, & cum eisdem provinciam deprædati fuerint, quod barbaris fuerint scelerum, & flagitiorum administri, latronibus excussores, & in crudelitatibus emissarii; quod cum Urbes fidelissimæ Romano Imperio, afflictæ fortuna jacerent, ipsi communicatis cum hoste



ſe flagitiis, ſoli nedum in provincia, ſed in tota Italia triumpharint; quod, cum hoſtes immaniſſimi cunctam Italiam laniarent, ipſi ſociorum ſanguinem ſitibundi lambere non deſierint, & nomen Romanum, quantum in ipſis fuit, ſuſtulerint, perſtiterintque ſemper fideliffimi in hoſtium ſocietate, communicato etiam cum barbaris trucibus ſanguine per mutue connubia, donec Gens illa exitiales habuit exitus; ea propter ſe nobis dignitate anteferendos pugnant, vel ſaltem adæquandos, veluti, ſi lupæ, ac vulgaria ſcorta contenderent præferri Matronis vel hoc uno, quod ipſæ præ illis haberent pudicitiam in propatulo. Uſque adeo ne Papienſes leves, atque inconfiderantes vos oſtenditis? adeo ne abutimini patientia noſtra? aut potius tantorum Viroꝝ, qui ſedent, lenitate? Ite nunc, & regni illius probroſi, ac deteſtandi mentionem facere audete. Videtis quantam labeculam vobis inſperſerit veſtrum iſtud Regnum cruentiffimum; non ne, ſi Cremonenſibus ſuperiores eſſetis cæteris in rebus, ob id unum tamen vos illis longe inferiores judicari oporteret? Ex illo Civitas veſtra apud totam provinciam maxima ſemper deſlagravit invidia, ſermonesque hominum de vobis parum commodi ſemper fuerunt; Civitates ſociorum perditæ, atque everſæ, totaque vicinitas maximam partem ſuarum calamitatum vobis acceptam referunt; vos, non tantum adiutores ſcelerum, ac flagitiorum, ſed etiam auctores fuiſſe prædicant; vos hoc nomine, odio proſequentur; omnes nomen Papienſe commune odium, labem, & probra illorum

temporum execrantur; solum illud detestabile, ubi conditum est vestrum Municipium, non modo non habendum in pretio, quod fuerit Regum sedes, judicant, sed potius loci illius Genium multa religione placandum, sedemque illam crudelitate, ac stupris pollutam, majoribus victimis expiandam, delendaque omnia barbarorum vestigia, & monumenta comburenda censent. Quod, si facere potius animum induxissetis, quam latronum regnum, probrosum, & detestabile præ vobis tam inconsiderate jactare, & inde commendationem querere, nunc essent fortasse meliore loco res vestrae, nec tamdiu egestate laboraretis, nec quocumque intenditis essent vobis res adversae. Id vobis faciunt diraë imprecationes Manium illorum, quorum sanguine fora urbis vestrae, templa, & omnes viæ inundarunt; inde etiam tanta vobis cæcitas venit, ut quæ pro vobis sunt, quæve adversus vos faciunt (quod in maximis malis ducitur) non videatis, usque eo, ut quæ in hac causa contra vos pugnant, pro vobis in medium afferatis, tanquam firmamentum, & robur totius Actionis vestrae, commendationemque honoris inde aucupamini, unde maxime vituperandi estis. Videte quanta sit inter nos controversia, atque judicatio! Si vobis, Papienses, res esset cum aliis adversariis, qui inimicissime, & infestissime agerent, eorum Orator optimis verbis causam explicans, hanc partem libera Oratione ita tractasset, vos ita exercuisset, ita versasset, atque jactasset. Nostri vero Cives, quibus vos negotium exhibere nulla provocati injuria, haud veriti estis quosve

quosve maluistis vobis adversarios, quam socios, & amicos, nolunt hoc modo in vos perorari, & quæ a me dicta sunt, nullo pacto volunt ad vos pertinere, vel saltem in omnes convenire, vestraque dignitati omnino parcunt, ut in hoc ipso servant suam. Sibi satis esse existimant ad causam, vobis intactis, describere illos Reges, amores, delitiasque vestras, in quos omnem culpam rejiciunt, conferuntque, qualesve fuerint toti huic confessui ostendere nituntur, cui plane rei jam a me pro facultate satisfactum fuisse arbitror, voloque ea, quæ de regno memoravi ad memoriam antiquitatis, non ad contumeliam Civitatis referri. Dum hæc, Patres, animo perhorrescens memorarem, admonebar recentis beneficii Caroli V. Par enim Italix Calamitas, atque tempestas proximis annis a Germania imminabat, in eademque fere mala, ac tempora recidissemus ( non enim puto dici posse illis pejora ) nisi tam præstantis Imperatoris divina, eximia, atque incredibilis virtus tetram crudelitatem barbarorum, nobiscum de tota fere religionis ratione dissentientium a jugulis nostris dimicatione capitis sui, vitæque periculo, ut heri inuimus, avertisset, jugumque acerbissimum servitutis a cervicibus totius Italix repulisset. Pro quo immortalis beneficio hæc ætas, omnisque posteritas, dum latine loquentur literæ, Carolo V. Romanorum Imperatori, se suaque omnia debere fatebitur. Ut intelligentia assequi valeatis, Judices, qualis fuerit illa barbarorum crudelitas, vestris animis cogitate, qualis totius Italix futurus erat status ( nos enim pro-

piora semper magis movent ) si cedente Cæsare superatisque nostris legionibus in Germania illi victores fuissent, qui fortunis nostris imminabant, suam cupiditatem religionis nomine velantes. Dii boni, dum hæc animo versarem, qui me perfudit horror! Credo itidem vobis omnibus usu venire. Superest tantum, ut vobis, Papienses, nubem, quam densissimam præ oculis gestatis, lumine Orationis meæ eripiam, vobisque ipsis breviter, tanquam in speculo ostendam, qualis sit omnis ista vestra ratio a regno illo profecta, quam perversa, quam præpostera. Neque tamen id vos, ut ego autumo, non intelligitis; sed usque eo, quid arguatis, non habetis usque ad insaniam, & impudentiam pertinaces.

Literarum monumentis proditum est, Cacum furem insignem Vulcani creditum filium, in iis locis, ubi postea Roma fuit condita, insedisse, & in Aventino monte speluncam habitasse furtorum, ac rapinarum recepticem, quod esset loci natura munita, & pene inaccessa. Cum igitur is maximo terrori esset omnibus late circum incolentibus, omnesque eum metuerent, caverent, atque vitarent, videbatur quodam modo in illa regione regnare, & in eo monte regiam suam constituisse. Non ne mentis parum sanæ esset, & ad agnatos deducendus judicaretur, si quis propterea eam urbis Romæ partem cæteris anteferebat, Aventinumque desertissimam, & contemptissimam regionem nobilissimis, & celeberrimis collibus Tarpejo, Palatino, Quirinali, Exquiliis, cæterisque præferret, quod in eo fur ille, ut naturæ odium, illo.

illorum temporum prodigium ab omnibus execrandus regnaverit, donec ab Hercule domitus, ac profligatus fuit? Non ne merito potius sedem illam Romani ulque in hodiernum diem maxime oderunt, ac jure detestantur, Herculi que ab incolis tanto metu liberatis habiti sunt divini honores, cujus templa, ac delubra adhuc, mutata tamen Religionis ratione, visuntur? Non ne Carolus ille cognomento Magnus, Dei beneficio illis temporibus natus, Hercules noster fuit, qui tot vestros Cacos repressit, domuit, profligavit, totamque hanc Italiae partem tanto malo liberavit, & placatis rebus, cunctam Italiam quietam, ac securam reddidit? Hoc est regnum vestrum, Papientes, quod elati, inflatique tantopere jactatis; illius exemplar, quibus potui coloribus, vobis expressi. Animadvertite, & vosmetipsi judicate, an illi fuerint Reges, quorum regnum Augustissimi Imperatores nostri non tantum armis everterunt, verum etiam legibus in ære incisis expresse damnatum abrogarunt, & eorum legibus iniquissimis refixis, actisque omnino rescissis, oblivione sempiterna deletum, perpetuoque Decreto ex omni hominum memoria, e fastisque ipsis evulsum esse voluerunt. Interdum aliqui evertuntur Regno, quorum tamen regnum manet indemnatum, & eorum memoria restat incolumis; interdum vero, & Reges, & regnum ipsum pariter damnantur; leges tamen ab eis latæ, & ipsa acta, propter pacem firma permanent, ut de Lege Hieronica dicitur, quam Siculis Romani intactam reliquerunt, Hieronis regno abrogato; quod etiam  
dein-

deinde Romæ factum fuit post C. Cæsaris interitum restituta Republica, superioris temporis exemplo. Jam enim Lucius Flaccus Interrex tulerat legem de Sylla, ut omnia quæcumque ille fecisset, essent rata. Hic autem, & Reges, & Regnum, Legesque, & acta insuper, & nomen ipsum, omniaque Regni vestigia, una rogatione, damnata fuerunt, atque abolita. Nihil expressius, nihil illustrius expectari potest, aut desiderari. Siquidem consecrarium semper fuit, & aliter esse non potest, & in ipsa quasi natura positum, atque infixum propter perpetuam, ac necessariam rationis legem, ut quorum acta, & leges abrogantur, damnetur etiam simul eorum dominario, & regnum penitus deleatur. Jam sentire potestis quam debile, quam nullum sit talis regni, unde penitus a me dejecti estis, fundamentum, & nihil ad vos inde ornamenti pervenire posse, sed potius maximam ignominiam pervenisse, labemque vobis sempiternam inspersam fuisse, constat, qui soli fuistis auctores, ut barbari tam tetri, non solum tota ferme Italia fuerint potiti, sed etiam ut in ea inveterascerent. Nimirum propter hanc unam Regni mentionem dignoscere possumus, vos esse barbarorum genus, quibus tam propensis studiis favetis, ac cupitis communicato illorum cum majoribus vestris per monstruosas propinquitates, & affinitates sanguine, & hinc aliquibus ex civibus vestris incompósitos mores contractos fuisse, asperamque, & feram naturam, quæ eos efficit inhumanos, atque intrastabiles, in hospites præsertim adolescentes studiorum

diorum caussa, apud vos peregrinantes, & in omnes magistratus, redditque finitimis omnibus, ac sociis Civitatibus invisos. Jubete, Judices, potius Papienses quotannis, stata die, locum rite, ac religiose expiare, omniaque monimenta ad illud nefarium regnum spectantia, quæ isti in sacrario scelerum condita habent, ætutum comburi, detestandam, execrandamque illorum temporum memoriam a fastis, atque ab annalibus, si fieri potest, revelli, atque ut Imperatorum nostrorum sanctioni deferatur, nomen illud provinciae ab illa barbarie deductum, quod jam vulgo inolevit, barbarum, illiteratum, immemorabile, penitus abolete. Augete potius commodis illas Civitates, quæ tot injurias, tot calamitates, ac clades accepere illis temporibus, omnia libenter perpeßæ, ne ab Imperio Romano discederent. Et posthac Papienses regnum illud cruentum, probrosum, sceleratum, atque nefarium latrocinium, quo nihil unquam Sol vidit indignius, nobis objicere audebunt? aut nobiscum in contentionem amplitudinis, & principatus hoc nomine venire non verebuntur? & quisquam de cætero dubitabit, utra Civitas honore, ac dignitate sit præferenda? Nec vobis, Judices, dolebit, peraccesceve, quod isti Ordinem vestrum tam nihil duxerint, ut cavillati, vos idoneos haberent, quibus ita laute os sublinerent, has tenebras cuderent, hos ludos facerent, ut confidentissimi sperarent dolis, ac fallaciis, vobis persuaderi posse, rem, quæ summam turpitudinem habet, esse maximo honore dignam? & vos eos esse Judices a quibus faci.

facile, per fabricas, & sycophantias sententiæ ini-  
quissimæ extorqueri queant, improbi ad summam  
impudentiam? Ne quis vero suspicetur me, cum  
de isto scelerato, nefarioque regno verba face-  
rem, barbarorum crudelitatem oratione exagger-  
asse, omniaque eorum scelera vehementi, atque  
atroci dicendi ratione amplificasse, hinc animad-  
vertere potestis me cum adversariis remissius,  
quam res postulabat egisse, quod barbarorum  
multa terre, ac crudeliter facta, quæ acriter ver-  
bis, & vociferationibus erant urgenda plane præ-  
terivi, ut de libidinum flagitiis, ac portentis,  
quas corporibus suis satiasse minime ambigi pos-  
sit, non dico Papienses, sed omnes populos, quos  
illi in miseram servitutem egerant, omnibus igno-  
miniis appetitos, ut omnes intelligere possint, me  
non studio, sed officio potius Papiensibus adver-  
sari. Erant, erant, Judices, memoranda alia,  
quæ etiam nunc nos tangunt, & vehementer pre-  
munt, quorum, inquam, virus usque ad hæc tem-  
pora emanavit, longiusque in futurum emanabit.  
Ut enim cætera omittam, quam nunc censetis  
floreret Res Literaria; nisi illi Papiensium Reges  
omnia devastassent? quam amplo in statu essent  
omnes egregiæ artes, quam integræ, quam per-  
fectæ, & expolitæ? Qualem ætatem haberemus  
hodie, cum præsertim tot ingeniorum præsidii  
abundet? quam florentem! quam felicem! Nihil  
sane desideraremus in illis artibus, quæ fuerunt  
nobis Græciæ disciplinis traditæ, & amplissimis  
monimentis consecratæ.

Siquidem illi omnis elegantiz inimici cum hu-  
mani-



humanitati bellum indixissent, & conspirarunt, una omnes communi odio in omnem politiam, inque omnem literaturam conjurarunt, ut eam stirpitus tollerent, ne una quidem litera in tota Europa inveniretur. Gotorum igitur, seu potius Getarum, quorum erant genus, immanitatem imitati, quicquid librorum ab illis relictum fuerat, nihil isti reliquum fecerunt, ne ullum omnino literarum, humanitatisque, quarum rerum ipsi penitus erant ignari, usquam extaret vestigium, ut Getæ ipsi, præ illis, si Scriptoribus credendum, in hoc genere immanitatis, fuerint abstinentissimi, usque adeo optimum quemque crudeli premebant servitute, malisque omnibus exercebant, ut nihil minus, quam de studiis bonarum artium, literisque cogitare possent. Tum quicumque codices, optimi præsertim, & lautissimi ad eorum manus devenissent, eos tamquam humanæ vitæ venena conscindebant, corrumpebantque, aut igni tradebant, ut omnia vastarent, omnia polluerent nihil pensi, nihil sancti habentes. Itaque sub illo infelicissimo Regno tot egregia monumenta temporum, locorum, hominum, rerumque gestarum interierunt; tot sapientissimorum hominum præcepta tam Græcæ, quam Latine literis mandata ad recte, beateque vivendum amissimus; tot ex illo, veterum annales hodie etiam desideramus; tot Libros de optima Religionis ratione, tot in Philosophia, in Medicina, in Mathematicis, in Juris civilis scientia, in Re Militari, in Architectura, in omnibus artibus, quæ ad civilem usum, & ad omnem humanitatem pertinent.

nent. Tunc literæ omnes, optimaque studia fluerunt; tunc non modo Græci sermonis, verum etiam Latini, idest nostri consuetudinem, usumque amissimus coacti a barbaris victoribus, linguam mutare, omnemque latinitatem exuti, barbaris vocibus assuefieri. Istæ, Iudices, erant a me, non modo acri, sed etiam incitata, atque vibranti Oratione peroranda; quod facile quis vel mediocris Orator facere potuisset, rei ipsius atrocitate per se materiam, copiam, & vim suppeditante. De industria vero hunc locum omisi hac quoque de causa; si enim hanc partem Oratorum more, ac modo tractare voluissem metuebam, ne ob renovatam memoriam tantæ cladis, publicæque jacturæ, dolor, ac fletus, adeo me frangeret, atque infirmaret, ut mihi præcluderetur aditus ad reliqua peroranda. Quoties enim in hujus rei mentionem incido cum amicis, utquandoque solet fieri in sermone familiari, non possum me continere, quin maximam lacrymarum vim profundam, quæ profecto lacrymæ nunquam vereor apud me arescent, quibus etiam absumptis, semper tamen infixus animo hærebit dolor. Videtis ex hac leni, & remissa admodum Oratione, qua vix rem leviter attingi, quantum fletus vocem meam debilitarit, incluseritque; sentio ego ipse quantus mihi mentem impediatur dolor; siquidem experior quotidie quanto fuerit damno, ac jacturæ hominum generi ea labe, illud incendium, aut potius diluvium, sublata penitus bonorum librorum suppellex. Astum plane fuisset de Re Literaria, nisi Medicei Laurentii liberalitas,

litas, ac virtus tantæ cladi subvenisset; qui, capta, atque eversa a Turcis Græcia, quicquid optimorum Librorum in utraque lingua inveniri potuit, grandi pecunia a Victoribus mercatus in Italiam comportari procuravit, conquestis etiam undique, & permagno sumptu in Italiam adductis multis nobilissimis Græcorum optimæ indolis adolescentulis, cum eorum Magistris, ut germana ejus linguæ consuetudo, ratioque Græcarum vocum enuntiandarum in eis conservata ad nostros homines emanaret. Auxit mox paternum beneficium tanto parente dignus filius, illud præclarissimum omnis posteritatis lumen LEO DECIMUS PONTIFEX MAXIMUS, qui optimis artibus favens, ac cupiens, nihil prius habuit, quam toto Pontificatus sui tempore maximis præmiis optima ingenia elicere, & spectatissimum quemque liberalitate sua excitando in omni studiorum genere ad summam perfectionem, excellentiamque perducere, secuto etiam paulo post CLEMENTE SEPTIMO, qui a tanto Patruæ, aque cæteris majoribus suis in hocce liberalitatis genere nihil degeneravit; quo factum est, ut quicquid literarum in tota Europa, totaque Asia Regnum illud Papiensium reliquum fecerat, fatendum sit Italiam plane debere MEDIGÆ GENTIS curæ, & liberalitati; neque Papienses tantum unquam prodesse potuisse rei literariæ ista, non sua, ut dixi, Academia, quantum Regno obfuerunt, ne tantopere posthac suum illud Regnum abrogatum, atque deletum præ se jactent, nihil nisi Reges loquentes, & Regias. Quanto sapientius Jones Græciz

ciæ populi olim potentissimi? Eos capite, & in-  
expiabili religione sanxisse serunt, ne quis Tem-  
pla, atque opera publica a barbaris incensa, at-  
que eversa instauraret, eaque in pristina loca re-  
dificaret, ut semiuista, direpta, ac devastata, essent  
posteris monumentum barbarorum impietatis; ne  
quis de cætero sacrilegis tam nefariis crederet,  
seque eorum fidei committeret, sed egs omnia  
eaverent omnes, defugerentque, & communi odio  
detestati prosequerentur. Isti vero Vobis præsentibus  
immanium prædonum Regnum celebrare stu-  
dent, atque ex barbarorum nefarie, ac scelerate  
factis commendationem, ac nobilitatem aucupan-  
tur, suumque hinc Municipium optimis, atque  
honestissimis Italiæ Civitatibus anteferre non ve-  
rentur, quod in eo barbari regnarent, patriæ,  
Italiæque, & omnis humanitatis perpetui hostes,  
qui humana specie, & figura tantum fuere, be-  
stias autem immanitate facile vicerunt, semper in  
præda, & sanguine versati. Si cæteræ hujus oræ  
Civitates truculentissimas, atque immanissimas il-  
las feras persecutæ fuissent eisdem studiis, quibus  
isti libertatem suam tam facile projicientes, pro-  
cul dubio sublata funditus omni humanitate, to-  
tius Italiæ rebus offusa esset nox sempiterna; id  
propter necesse est, dum erit hominum genus,  
non desint, qui Papiense nomen oderint, detesten-  
tur, atque execrentur. Et posthac Papienses in  
ludis publicis ob publicam lætitiâ audebunt in-  
auspicato inducere pro simulacro Urbis suæ effi-  
giem mulieris mæstæ admodum, & dejecto ore  
consternatæ, cum corona in manu semifracta, at-  
que

que imminuta quasi fortunam suam dolentes prostratam, atque afflictam, & Carolo Magno tantorum monstorum domitori invidentes, & ægre ferentes insignem victoriam tantopere, necessariam, quæ fuit universæ Italiæ non modo salutaris, verum etiam gloriosa? Nec vident cæci, ista tam infauusta, plenaque stomachi specie se detrahare felicitati, ac majestati Cæsarum nostrorum, publicamque illorum ludorum lætitiæ suæ intempestiva mæstitia funestare, totaque spectacula incestare, & quodammodo detestari hoc Sacrosanctum Imperium, quod nunquam existere potuisset, nisi illa feralis, ac detestabilis meretricia mulierculæ infelicitis corona, ipsius Caroli Magni virtute confRACTA esset, ac comminuta?

Hæc habui, Judices, fere dicere de tota Controversia, tum solidis rationibus firmata, tum claris monumentis Scriptorum testata, atque consignata, quæ tota Italia affirmaret si una voce loqueretur. Rem totam explicui argumentis, atque Oratione firmavi, usus testibus incorruptis; nihil a me dictum sine locupletis auctoritate; causaque defensa est tot exploratissimis rationibus, testimoniis, & argumentis, ut nemo de cætero ambigere possit Cremonam Papiæ rerum omnium præstantia longe excellere, utque hanc causam oculis vos judicare possitis. Jam, ut videtis, Patres, adversarii tot testibus convicti, tot argumentis, obruti, oppressique, & undique circumclusi, nequeunt ora vestra intueri, aut os suum auditorum coronæ ostendere. Video eorum paulatim demitti contumaciam, relanguescere audaciam;

Q

pi-

piget tandem eos, puto, incēpti male consulti; pāniter temeritatis, & impudentiæ. Poteram equidem ego cum eis acrius agere, atque acerbius; sed usque mihi temperavi, nec in re minime dubia sum persecutus copiam; quam poteram, & adhibuit Oratio modum, molliusque, & remissius, quam merebatur, quæstio a me fuit pertractata, tenuique in dicendo semper illam moderationem, quam antequam huc ad dicendum venirem mihi proposueram, ut potius alieno sensui, quam meo deservirem, ut Civium meorum voluntati obtemperarem; homo bene appositus ad eorum lenitatem, dum graviter, pudenter, & moderate agunt cum adversariis. Quæ omitti nullo modo poterant, ea leviter attigi; multa præterivi silentio, eaque vestris ingeniis, vestræque conjecturæ commisi; ea præsertim, quæ Cives mei silenda duxerunt ad declinandam invidiam. Dixi tamen, fortasse aliqua, quæ illi ne tangi quidem voluissent; sed ego ea nullo pacto prætereunda censui, ut potius dignitati meorum, quam voluntati deservirem, & ut aliquando etiam sensui meo indulgerem, ne isti modestiam nostram in conscientiam ducerent. Animadvertēbam interim, Judices, cum mihi Oratione temperarem, deque industria, quæ acutius, contentiusve dici poterant, lenius, ac lentius agerem, quasi vós mihi nutu gratificari, eamque lenitatem, ac moderationem in optimam partem accipere, & quasi institutum meum probare, ac tacite vultu collaudare; quamvis contra intuerer vicinarum Civitatum, quæ Cremonensi nomini mirum in mo.

modum favent, ac cupiunt, Legatos honestos viros, qui huc á Civibus suis frequentissimi missi sunt, ut nobis aessent, quasi moleste ferre, & quodammodo indignari, quod viderer eis quasi dissimulare, neque uti velle viribus, & in tanta pugna negligentius, quam res postuleret, agere; usque eo videbatur eis mea Oratio quodammodo flatescere. Si qua tamen interdum apertius, ac significantius visus sum in Papienses dixisse, quæ mihi videbantur in eos percommode cadere, non tam in illos dicta volo, quam in eorum Majores externos homines Longobardos contorta, in totamque illam barbarorum colluvionem.

Jamputo, Judices, intelligitis, honestissimam Civitatem indigne coactam fuisse contendere de principatu cum Municipio sine re, sine magna virtute, sine industria, sine auctoritate, atque existimatione. Omnia, quæ præclaram Civitatem efficere possunt, atque præstantem, collata invicem utrimque, me dicente, in contentionem venerunt, atque discrimen. Pugnavit res cum re, causa cum causa, ratio cum ratione. Vidistis, omnia nobiscum facere; Antiquitatem Urbis, Nobilitatem Originis, Civium frequentiam, Censum, Divitias, Mores, Optimasque Leges, & Instituta majorum; Virtutem, Literas, Optimarum artium scientiam, Studia rei militaris, Splendorem, Ingenium, Humanitatem, Fidem, Gravitatem, Constantiam, Singularia, ac perpetua in rempublicam, atque in hoc Sacrosanctum Imperium merita; quibus rebus liquet, Cives nostros non me-

do Papiensibus non posthabendos, verum omnium rerum præstantia excellentiores, cum eis minime esse exæquandos, quibus maxima semper domi dignitas, foris auctoritas fuit. Vos etiam, atque etiam obtestor, atque imploro, Iudices, qui æqui estis omnibus; quique, ut quisque iniquissime, crudelissimeque oppugnatur, omnes, vestra æquitate, atque iustitia sublevatis, ne patiamini nos de honoris nostri gradu dejici; excluditote adversariorum importunitatem; repellite eorum pruruptam audaciam, arrogantiam, ac temeritatem, quos videtis ambitione ferri tam intolerabili; comprimite novam intemperantiam, ne longius emanet, atque in multos serpat, ne divina, atque omnia humana jura confundat; indignas, exitiosasque huic Imperio contentiones extirpate, severe, graviter, ac prisce judicando, ut Papiensibus ob arrogantiam a vestro ordine non tantum repulsis, sed etiam ignominia notatis, omnes intelligant in hoc Sacrosancto Consilio locum esse virtuti, iustitiæ, æquitati; veterumque judiciorum vim, gravitatemque hic esse renovatam. Vestræ sapientiæ est, vestræ æquitatis, ac dignitatis providere in posterum, ne in tota provincia hæ perniciosæ contentiones, concursationesve, aut potius seditiones quotidie cooriantur. Hæcres pertinet ad imperium, ad majestatem, ad statum hujus ditionis, ad civitatum, ac populorum quietem, & pacem.

Nostri Civitas suscepit hanc causam, & in ea elaboravit, non tam ad laudem adipiscendam, quam ad vitandam vituperationem, ne jus suum  
ma-



majorum nostrorum virtute comparatum, nobisque tanquam optimam hæreditatem relictum dissolute amittere videretur. Si in principem locum Papienses, audacia, quæ eis semper præsto est, nobis æquo animo ferentibus, dissimulantibusque, se intrulissent, nunquam veritus essem, ne vos vestra auctoritate, vestris sententiis inde deripendos, nostrique honoris insignia nobis reddenda judicaretis. Conservate nobis dignitatem nostram. Discant adversarii vestra æquitate victi, vestris sententiis confixi non extollere se supra vires, atque fortunam; discant conditionem suam æquis animis ferre, neque de cætero audeant præstantissimam Civitatem in certamen honoris, & dignitatis contentionem provocare. Res adeo clara, & manifesta, oculis vestris subjecta, atque exposita est, ut nisi quis expectet, ut pro se ipsa, causa vocem mittat, minime ambigere debeatis utri Civitati vestro iudicio primas deferatis, si sentire volueritis, quod vestra æquitas, quod hujus Ordinis gravitas, quod tanti Imperii dignitas postulat. Videris oculis vestris ex hac parte pudorem stare, ex illa impudentiam pugnare; hinc moderationem, illinc temeritatem; hinc verecundiam, illinc audaciam; hinc constantiam, illinc furorem; hinc honestatem, illinc levitatem, ne dicam turpitudinem; hinc optimarum artium scientiam, illinc inscitiam; hinc splendorem, nitoremque, illinc squalorem, & sordes; hinc humanitatem, illinc immanitatem; hinc copiam, illinc egestatem: atque jamdudum certare vidistis nobilitatem cum obscuritate, antiquitatem cum novitate, frequentiam

tiam cum solitudine, diligentiam cum socordia, industriam cum ignavia, bonam rationem cum perdita, bonam fidem cum ea, quæ concidit, amplitudinem cum tenuitate, bonam spem cum summa rerum omnium desperatione; denique virtutes omnes, & summa omnia hic esse, illic vero vel nullas, vel non admodum multas, & eas quidem mediocres, infimæque, & abjecta jacere omnia; & dubitabitis utri prærogativam vestris sententiis adjudicetis? nec adversarios ignominie notabitis, quod ausi fuerint gravissimæ Civitati nulla causa negotium facessere, & cum ea tam temerarie dimicando se conferre?

Nec apud vos debet adversariis nostris regnum illud detestandum, quod tantum præ se jactant, quicquam suffragari, cum barbari illi nullo pacto fuerint Reges, sed prædonum principes, & archipiratae, quos regno nostri Imperatores armis everterunt, regnum damnarunt, acta infirmarunt, æra refixerunt, leges abrogarunt, omnia regni vestigia, nomenque, & omnem memoriam sustulerunt, evulserunt, deleverunt; quos Reges fuisse nemo contendere possit, quin idem quoque, ut luculenter probavimus, atque evicimus, neget esse reges Imperatores nostros augustissimos. Neque movere vos quicquam debet, quod apud eos Academia, Literarumque Gymnasium institutum fuerit beneficio Regulorum Mediolanensium, cum ab eis id factum fuerit, propter Metropolis, & totius provinciae commoditatem, non propter illius Municipii dignitatem, neque ulla Papiensium causa, nisi ad eorum inopiam, & egestatem sublevandam;

in.

infcitiamque tollendam. Nec quicquam illis prodesse debent ista nescio quæ Diplomata inanum titularum, ac dignitatum, quæ tantopere, tantaque admirabilitate prædicare solent, jam obsoleta, jam antiquata, & plane mortua. Erigite vos, Judices, vestramque in judicando gravitatem, constantiam, auctoritatem retinete. Nihil animos vestros impellere possint opes, aut potentia aliorum hominum, qui occulte pro adversariis nos oppugnant. Retinete vestram in judiciis consuetudinem, vestram libertatem, integritatem, severitatem. Quicquid est, quocumque mentes vestræ inclinant, quocumque ratio, æquitas, atque justitia animos vestros impellunt, intrepide judicetis. Uimini jure, & potestate, quam habetis, quæ tanta est, quanta ullis mortalibus in judiciis unquam gentium concessa fuit. Quicquid enim Cæsar potest in judicando, ad Vos translatum, vel saltem vobiscum communicatum fuit. In eum locum deducta est res, ut jam libere, fortiter, ac prisca severitate judicare sit necesse. Tanta est expectatio hujus actionis, concursusque, & effusio tantæ multitudinis, quam videtis, ut nulla judicii remissio, aut dilatio esse possit e Cæsaris dignitate, aut e tanti imperii Majestate. Ad hujus contentionis famam erexit se cuncta Italia, excitata sunt omnia Municipia, omnes Coloniae, omnes Præfecturæ, conveneruntque ad tantum spectaculum remotæ Nationes. Cavete, obsecro, per Deum immortalem, ne dum hujus, aut illius partis vos nimium mansuetos miseret, severitatis vestræ, atque constantiæ famam, quæ toto terrarum orbe

pervagata est imminuat. Per vos, & vestram fidem, virtutem, sapientiamque, oro, atque obtestor, consulite nomini, ac dignitati hujus sacrosancti loci. Memineritis hic adesse florem, ac nobilitatem totius Provinciæ; multos prudentes, ac sapientes viros huc convenisse, qui hanc questionem, juris civilis, ac multarum rerum scientia præditi recte judicare possent. Cogitate horum omnium animos in Vos ferri, eorum mentes, non minus quam oculos, in Vos conversas expectare sententiam hoc Ordine, hoc loco, hoc sacrosancto Imperio dignam. Res per se manifesta est, causa pro se ipsa loquitur. Nec mihi venit in dubium vestra fides, aut constantia, ut fieri queat quin secundum nos & sentiat, & judicetis. Non existimo Deum immortalem tam aversum esse a salute populi Cremonensis, ut desinat clarissimum lumen animis vestris, ac mentibus præferre, quo veritatem, quæ Oratione mea patefacta est, agnoscere, ac sequi valeatis. Quod vos statuetis, illud utrique Civitati sanctum esse oportebit. Si aliqua vis [ quod detestabile omen longe avertat Deus ] eorum, qui nobis occulte insidiantur, in animis vestris poterit; si quis casus (quem Dii omnes, hominesque prohibeant) gravis, & miserabilis evenerit, non solum Civitas nostra vestris sententiis oppressa mærebit perpetuo squalore, & sordibus, totaque confecta senio, sed etiam tanti doloris propinquæ Civitates, quarum legationes frequentissimas nobis adesse videtis, participes esse volent. Multi Cremonenses hic adsunt ad hoc munus mecum destinati; decre-

crevimus una omnes nunquam nisi e sententia re-  
confecta, domum redire in patriam; sed ad bar-  
baros, ac remotissimas nationes in perpetuum exi-  
lium demigrare, potiusque in solitudine cum fec-  
ris vitam asperam degere, quam ad nostros in pa-  
triam tam malum nuntium afferre, quam videre  
totam Civitatem tam gravi accepto vulnere con-  
sternatam, æterno mærore confici, afflictarique,  
noctes, ac dies in deplorando jure suo, frustra  
consumere. Moriar potius, quam patriam in tam  
miseram, tam luctuosam fortunam dejectam aspi-  
ciam, conquerentem, commiserantemque, Cælum,  
ac Terram obtestantem se non potuisse obtinere  
jus suum; se, judicata, damnataque causa, di-  
gnitate posthabitam contemptissimo Municipio;  
nihil sibi profuisse vetustiora, illustrioraque ha-  
buisse initia; quod fuerit Romani generis, ac se-  
minis soboles, ac propago, cum adversarii a Gal-  
lis, aut a Liguribus nescio quibus, originem ob-  
scurissimam traxerint, eorumque Municipium sit  
adhuc incerti nominis; nihil sibi in tanto discrimi-  
nine præsidio fuisse, quod semper Reipublicæ Po-  
puloque Romano, ejusque Imperatoribus fidem  
datam præstiterit, eamque sanctiorem, quam suam  
salutem semper duxerit; quod toties, ne a Ro-  
manorum imperio descisceret, maximas clades,  
ac calamitates acceperit, sæpius direpta, devasta-  
taque, afflicta, atque everfa, non nunquam et-  
iam solo æquata; quod his etiam temporibus in  
difficultate nummaria, cum populis tributa extraor-  
dinaria, bellicque subsidia imperantur, semper fue-  
rit auctor, & princeps pollicendæ, perfolvendæ

que pecuniæ ; nihil unquam antiquius habuerit quam Cæsari, atque huic Imperio, præ omnibus aliis provinciæ Civitatibus, cum bellum ingrueret, semper præsto esse, corporibus, opibus, copiis, nullumque subsidii genus omittere, quo Res publica defendi, aut juvari posset.

Quicumque vero sequatur casus, nunquam tamen civitatem nostram pænitebit benefactorum, nec desinet unquam de hoc Imperio bene sperare, a Diisque immortalibus semper optabit, præcabiturque votis nuncupatis, ut Carolus V. Romanorum Imperator orbe terrarum ubique incredibili, atque divina virtute pacato, late, longèque diffuso imperio, iisdem regionibus, ac terminis regnet, quibus Solis cursus continetur, atque ita potentissimum Turcarum Regem, ceterosque barbarorum Tyrannos sua virtute, consilio, felicitate fractos, profligatos, domitos superet, sicut nuperrime cum bellicosissimis Germanorum gentibus decertavit, & ad sanitatem reduxit. Nunquam nostra Civitas tam æqui, tam sancti Imperatoris voluntati tantum vulnus acceptum referet, cum ei nostra fides, nostra studia, nostra merita semper fuerint testatissima, semperque ille nos honoribus, & beneficiis complexus, multis, & magnis pignoribus urbem nostram obligarit. Vivat, vivat felix ille maximarum gentium victor, omnium sæculorum, omnis memoriæ facile princeps ; ejus trophæis monumentisque nulla sit unquam finem allatura ætas ; nulla ejus laudes, unquam obscuratura sit oblivio ; nullus in toto orbe terrarum sit locus, qui non fuerit nobilitatus

tus

tus ejus monumentis, plurimisque victoriis illustratus; eo superstite, ac sospite, ex cujus unius mortalis vita, tot mortalium spes, ac salus pendent, floreat, vigeatque Respublica. Sacrosanctum Imperium non terræ, sed cæli regionibus terminetur. Omnes gentes, omnes populi, omnes nationes uni sponte, libenterque obtemperantes in alta pace conquiescant, aureamque, & priscam ætatem pacatissimi, felicissimi que degant omnes; soli Cremonenses perpetuo mæreant, squalcant, lugeant, quorum opera, quoad per eos fieri potuit, nunquam defuit, quin ea, quæ modo dixi tam prospera Reipublicæ evenirent; ii soli in squalore positi, ac sordibus, deserti, rejecti, contemptique jaceant; infra etiam mortuos, si fieri potest, amandentur. Videant Papienses, quorum nulla in Rempublicam extant merita, florentissimos in pretio, in honore, in deliciis, in oculis haberi, nobis etiam dominari. Deum tamen usque dolentes, flentesque, & hominum fidem contestabimur, nos in bona causa oppressos fuisse, & causam ipsam in animis multorum ubique gentium in perpetuum testatam, consignatamque faciemus; atque hæc omnia, quæ ego vobis Judicibus, & disceptatoribus coram dixi pro causa memoriter, exscribi faciemus divisa in multa exemplaria, ut Cæsar ipse, ejusque Consilarii præclarissimi, ac sapientissimi viri, atque omnes mortales saltem intelligere possint, qua justa de causa, quo merito nostro oppressi doleamus; adibimus omnes Italix, & transalpinas Academias, & omnia Juspertitorum Collegia, eorumque sententias im-

implorabimus, non tamen quibus speremus vestras, vestrumque de nobis iudicium rescindi, infirmarive posse, sed ut saltem nobis, posterisque nostris alicui solatio esse queant in tam, misera, indignaque fortuna. Sed quo me deduxit dolor, aut potius indignatio? Diimeliora! omenque omne detestabile, aut obruant, aut avertant potius in adversarios. Moveri sedibus suis urbs nostra potius optabit, atque in alias si fieri possit, terras demigrare, quam a Papiensi Municipio anteiri patiatur. Vidistis, Iudices, dum hæc commemorarem, dum Oratio invita in ea tristitia versaretur, quam multorum, qui hic adsunt, vultus dejecti, consternatique jacerent, ut tota concio tanta indignitate permota vix lacrymas, vocemque, & etiam gemitus contineret. Ea vero conturbatio, atque animorum consternatio non tantum erat, quod plurimi Cremonensis nominis amici commiserati malis nostris permoverentur, nostrisque rebus studerent, ac cuperent, verum multos suos quoque tangebatur dolor, cum in eorum animis tam iniquum iudicium, tanta injuria, tam pravo, ac malo exemplo representaretur; in quo sentiebant, nos quidem maxime, se vero proxime trucidatos. Sciunt plane omnes, sciunt quo honore sit digna civitas nostra tantis opibus firma, tam variis copiis locuples, ea gloria ampla. Norunt omnes quotquot hic adsunt, Papiensibus Cremonenses omnium rerum præstantia excellere; norunt Civitatem nostram virtutis, & fortunæ bonis ornatissimam, optimis moribus, legibus, & institutis temperatam, eo civium numero, ca-

am-



amplitudine præstantem, ut facile omnes alias hujus ditionis Civitates post Mediolanum anteire possit, ea autem modestia, facilitate, ac temperatione præditam, ut cum omnibus aliis quamvis infimis, se semper ultro exæquaverit, parque esse voluerit. Hinc fieri potuit, uti nostris civibus cuncta bona fide agentibus Papienses eorum facilitate abusi interdum sententiam priore loco dixerint, nunc tandem sentimus illos id versute, & malitiose fecisse, ut ad principem locum dolo malo obreperent cæteris Civitatibus indignantibus, nos ob beneficium nostrum plesti, & in ordinem redigi. Nolite obsecro, Judices, vestris sententiis spoliare ornamentis suis Civitatem ornatissimam, honestissimam Romanorum Coloniam, virtute, gloria, dignitate, existimatione amplissimam, omnibus rebus auctam, refertam, atque redundantem, pluribusque mortalibus caram, munitissimum Italiæ, & totius Imperii propugnaculum, rei frumentariæ certissimum subsidium, quæ prædita est ea disciplina, iis institutis, ut ipsis Athenis, si adhuc vigerent, par judicari posset, quam omnes propinquæ Civitates ornata cupiunt, communi-que consensu missis legationibus laudant, quam cuncta Italia, populi, nationes, provinciæ, regna comprobant, cujus apud omnes gentes maximum fuit semper nomen, & grave; quæ Cæsari suam pecuniam in difficultate ærarii, semper promptam, expositamque habuit, præbuitque; cumque viris, armis, equis semper juvit, semperque communibus hostibus se opposuit, belli opportunum subsidium, quæ plures duces habet, quam Papia milites,

lites, longeque militari laude excellit, multis, ac magnis ingenii, atque fortunæ, prædiis munitissima, quæ semper Imperatoribus nostris probata fuit, plurimis eorum beneficiis cohonestata, cui uni ex omnibus urbibus provinciæ, datur Prætor ex amplissimo vestro Ordine; quæ habet eos excellentes viros in Literis, qui apud omnes gentes semper habiti sunt sancti, ac dicti, quique Cæsaris res præclarissime gestas perpetuis literarum monumentis ornare possunt; ubi vigent jus, æquitas, leges, religio, pietas, pudor, pudicitia, ubi in difficultate annonæ semper paratum præsidium; ubi literarum, multarumque, & optimarum artium domicilium; ubi humanitas, doctrina, fruges natæ esse videntur, ubi cuncta splendescunt, ubi summa sunt omnia, unde omnium rerum egregiarum exempla sumi possunt; demum quo Dii, & homines videantur congestasse omnia ornamenta. Vos, vos testor, atque appello clarissimi viri, qui ex hoc Ordine Cremonæ Prætores, olim dati in ea Civitate fuistis cum potestate, & imperio; nostis, me nihil mentiri, nihil oratione amplificare, nihil verbis exaggerare, sed potius verborum penuria cuncta fere extenuare, premere, atque affligere.

Ad te tandem, Gonzaga Ferdinande, tanquam ad anchoram confugio, ut in tua ope conquiescam, qui unus hujus ordinis, hujus judicii Præsidibus præsidet, qui omnes mortales post Cæsarem, cujus auctoritatem, majestatemque in Italia repræsentas, longe antecellis potestate, tuam hic æquitatem, tuam justitiam, tuam virtutem imploramus; te

ju.

judicio præfidente, nihil nobis metuendum existimamus. Sub te reviviscit severitas, & legum observantia, justitia, abstinencia, cohibeturque ad antiquorum Imperatorum laudem militaris licentia. Hic opus est nobis tua severitate, tua fortitudine, contra eorum hominum potentiam, qui cum nos tueri, atque amplificare deberent, nos, non aperte quidem, sed cuniculis occulte oppugnant, atque affligere conantur, tela adversariis nostris subministrantes, nominis Cremonensis perpetui inimici propter virtutis invidiam, propter ingeniorum laudem, ac fortunarum nostrarum mediocritatem, quod eis resistere capimus ne ulterius in bona nostra impetum facere possiat. Oramus te, nos in tuam accipias fidem, fortunarum nostrarum, ac rationum omnium conservator. Civitas nostra conquiescit in tua virtute, atque constantia, in tua justitia, atque integritate, quarum omnium virtutum expressam speciem, atque imaginem, jamdudum in oculis, & in animis omnium populorum in Italia fixisti.

In te omnis spes nostra posita est, nostra Civitas cuncta sua studia, omnem operam, industriam, cogitationem, in tua æquitate statuit, atque locavit. Hanc existimationis nostræ defensionem, injuriæque a nobis propulsionem quoddam jure nostro abs te exigimus. Hanc de Te spem, & opinionem propinquitatis Patriæ tuæ nobis spondet. Semper Civitas nostra Mantuani nominis studiosa fuit. Fuerunt hæc ambæ Civitates, ut propinquitate soli, ita semper animorum studiis conjunctissimæ. Gonzagarum vero præclarissi-

ma

nae familiae quantum Cremona fuerit semper addicta, atque astricta, nemo est, qui nesciat; quod tute ipse jampridem sentire potuisti. Quoties Tu, liberique tui ad nos divertentes, Cremonam venitis, spes venire quædam, certaue fiducia videtur, ipsaque Civitas, cum te divina quadam gravitate præditum intuetur, Deum aliquem, aut certe maximum heroem hospitio se suscepisse putat. Cuperet autem tota Urbs, ubi adventus tui primum nuncium accepit, e solo, sedibusque suis convelli posse, ut tibi obviam venire liceret, teque in sua mania suis humeris importare. Per Te, per dexteram tuam oro, ne tam gravi, ac periculoso tempore defueris ei Civitati, quam tuis sæpe laudibus ornasti. Quicquid de nobis tu senseris, quocumque mens tua inclinarit, in tuam sententiam ii, qui tibi adsunt in consilio, præclari viri libenter discessionem facient. Illi quidem de jure antiquitatis, nobilitatis, originis inter utramque Civitatem judicare possent; tu vero, non tam doctrina, quam habitu naturæ prope divino, & maximarum rerum usu longe melius de utriusque meritis, utra Cæsari, atque huic Imperio magis utilis, atque opportuna semper fuerit, aut esse possit. Nosti utriusque opes, virtutem, studia, voluntatem, ut de aliis rebus sileam, quæ ad tuendum hoc Imperium, propagandum, ac dilatandum sunt necessariae. Nosti, & re expertus es, an Papienses se nostris Civibus adæquare possint cum bellum ingruit, aut aliquod imminet periculum, utra Civitas majores, ac firmiores copias brevi temporis spatio conficiat.

ciat. Scis Cæsarem semper Cremonæ habere paratum exercitum, expeditos Duces, militumque Præfectos; martiam illam Juventutem, quæ Romani seminis naturam servat, tam in animis, quam in nervis, ad tenues belli rumores subito erigi; arma, sagum, bellum flagitare; quod egregie expertus es superiore anno in Placentiæ Urbis recuperatione. Scis ad tenuem rumorem illius occasionis totam Civitatem nostram sponte sua, nemine impellente, isse ad arma, decrevisse tumultum, viros, pueros, senes, tam nobiles, quam opifices, & servitia, nulla ætatis, aut conditionis excusatione, omnes, maximo equitum, ac peditum numero Placentiam maximo imbree, viæque deterrima convolasse. Primos Crēmonēses nullo imperio, eam Urbem ingressos, omnes vias obsedisse, recentem arcem jam quasi perfectam cepisse, tamdiuque tenuisse, donec ipsa Civitas, quæ tota erat in armis, sublata ab optimatibus dominatione, se ultro potius Cæsari dedit, quam Gallis, quorum potentia ob vicinitatem, huic Imperio valde eo tempore erat suspecta, ac formidolosa. Conserva dignitatem suam Civitati, cujus eximia belli scientia, singularis disciplina militaris; quam scis Cæsari, atque huic Imperio non opportunam modo, sed etiam necessariam. Ibi magnæ, ac firmæ Copiæ; ibi seminarium optimorum militum; ibi viri navi, industrii, experientissimi, quorum omnis impetus ad laudem; Ibi, ibi demum est robur, & soboles militum, quos nationes omnes, urbes, populi, Reges, Tetrarchæ, Tyranni probant. Constringe tibi, liberis-

que

que tuis perpetuo beneficio, præclaram Civitatem, quam honos, quam dignitas, quam opes, fortunæ, virtus, splendor, humanitas, fides, commendant. Conserva illi existimationem suam, te oramus, atque obtestamur. Noli per liberos tuos existimare esse quæstionem de nugis. Non minus laborant Cives nostri, de honore dimicantes, ac si hic agatur omnium Civium salus, vita, libertas, aræ, foci, penates, jura, leges, bona fortunæ, vestigalia, domicilia, muri, sepulcra majorum, templa, delubra Divorum immortalium, liberi, conjuges, fama, decus, gloria, Patria. Hæc omnia a Te nobis conservata putabimus, si nos adversus Papiensium temeritatem in nostræ dignitatis gradu, aut retinueris, aut restitueris, DIXI.

F I N I S .

# ERRATA.

Pag. 8. lin. 2. Patria  
 26. lin. 6. meorum  
 62. lin. 5. mendicitatis  
 64. lin. 26. 27. biennis nondum  
                   debitum  
 65. lin. 10. contenti  
 97.       ACTIO I.  
 99. lin. 4. mediusfidios  
 123. lin. 2. latibubis  
 132. lin. 29. Quod  
 133. lin. 3. auctori.  
 147. lin. 10. cooritus  
 177. lin. 19. id primam fuit  
 187. lin. 15. iter habent flumine.

# CORRIGE.

Patria  
 meorum  
 mendicitati  
 biennii nondum de-  
                   bitam  
 contenti  
 ACTIO II.  
 mediusfidius  
 latibulis  
 Quot  
 auctori?  
 cooritur  
 id primum fuit  
 iter habent flumine?

---

Libri pretium L. 3.

005652344









